

欽定遼史

卷十三之三十一

一

二

三

四

五

六

七

八

九



元 中 書 右 丞 相 總 裁 脫 脫 等 修

本紀第十三

聖宗四

八年春正月辛巳如臺湖庚寅驛決滯獄庚子如沈子灤二月丁未朔于闐回鶻各遣使來貢壬申女直遣使來貢三月丁丑李繼遷遣使來貢庚辰太白熒惑鬪凡十有五次乙酉城杏塢以宋俘寶之辛丑置宜州夏四月丙午朔嚴州刺史李壽英有惠政民請留從之庚戌女直遣使來貢庚午以歲旱諸部艱食振之五月戊子以宋降卒分隸諸軍庚寅女直宰相阿海來貢封順化王丙申清暑胡土白山詔括民田六月丙午以北面林牙磨魯古爲北院大王阿薩蘭回鶻于越達刺于各遣使來貢甲寅月掩天駟第一星丙辰女直遣使來貢秋七月庚辰改南京熊軍爲神軍詔東京路諸宮分提轄司置分定霸保和宣化三縣白川州置洪理儀坤州置廣義遼西州置長慶乾州置安德各一縣省遂嬌松饒寧海瑞玉鐵里奉德等十州及玉田遼豐松山弘遠懷清雲龍平澤平山等八縣以其民分隸他郡八月乙卯以黑白羊祭天地九月乙亥北女直四部請內附壬辰李繼遷獻宋俘冬十月丙午以敗宋軍復遣使來告己酉阻卜

等遣使來貢是月駐蹕大王州十一月庚寅以吐谷渾民饑振之丁酉太白晝見十二月癸卯李繼遷下宋麟鄜等州遣使來告女直遣使來貢庚戌遣使封李繼遷爲夏國王癸丑回鶻來貢是歲放鄭雲從等二人及第

九年春正月甲戌女直遣使來貢丙子詔禁私度僧尼庚辰如臺湖乙酉樞密使監修國史室昉等進寶錄賜物有差戊子選宋降卒五百置爲宣力軍辛卯詔免三京諸道租賦仍罷括田二月丙午夏國遣使告伐宋捷丁未以涿州刺史耶律王大爲惕隱甲子建威寇振化來達三城屯戌卒閏月辛未朔日有食之壬申遣翰林承旨耶抱朴三司使李嗣給事中劉京政事舍人張幹南京副留守吳浩分決諸道滯獄三月庚子朔振室韋烏古諸部戊申復遣庫部員外郎馬守琪倉部員外郎祁正虞部員外郎崔祐簡北縣令崔簡等分決諸道滯獄甲子幸南京夏四月甲戌回鶻來貢乙亥夏國王李繼遷遣杜白來謝封册丙戌清暑炭山五月己未以秦王韓匡嗣私城爲全州六月丁亥突厥來貢是月南京霖雨傷稼秋七月癸卯通括戶口乙巳詔諸道舉才行察貪酷撫高年禁奢僭有歿於王事者官其子孫己未夏國以復綏銀二州遣使來告八月癸酉銅州嘉禾生東京甘露降戊寅女直進喚鹿人壬午東京進三足烏九月庚子鼻骨德來貢己酉駐蹕廟城南京地震冬十月丁卯阿薩蘭回鶻來貢壬申夏國王李繼遷遣使來上

宋所授勅命丁丑定難軍節度使李繼捧來附授推忠効順啟聖定難功臣開府儀同三司檢校太師兼侍中封西平王十一月乙亥以青牛白馬祭天地十二月夏國王李繼遷潛附于宋遣招討使韓德威持詔諭之是歲放進士石用中一人及第

十年春正月丁酉禁喪葬禮殺馬及藏甲冑金銀器玩丙午如臺湖二月乙丑朔日有食之韓德威奏李繼遷稱故不出至靈州俘掠以還壬申兀惹來貢壬午免雲州租賦庚寅夏國以韓德威俘掠遣使來奏賜詔安慰辛卯給復雲州流民三月甲辰鐵驪來貢丙辰如炭山夏四月乙丑以臺湖爲望幸里庚寅會羣臣較射五月癸巳朔州流民給復三年七月辛酉鐵驪來貢八月癸亥觀稼仍遣使分閱苗稼九月癸卯幸五臺山金河寺飯僧冬十月壬申夏國王遣使來貢戊寅鐵驪來貢十一月壬辰回鶻來貢十二月庚辰獵儒州東川拜天是月以東京留守蕭垣德等伐高麗

十一年春三月壬寅回鶻來貢丙午出內帑錢賜南京統軍司軍高麗王治遣朴良柔表請罪詔取女直鴨綠江東數百里地賜之二月癸亥霸州民妻王氏以妖惑衆伏誅夏四月幸炭山清暑六月大雨秋七月己丑桑乾羊河溢居庸關西害禾稼殆盡奉聖南京居民廬舍多墊溺者八月如秋山冬十月甲申朔駐蹕蒲瑰坂是時放進士王熙載等二人及第

十二年春正月癸丑朔陰鎮水漂溺三十餘村詔疏舊渠甲寅以同政事門下平章事耶律碩老爲悞  
隱詔復行在五十里丙租乙卯幸延芳淀戊午蠲宜州賦調庚申郎君耶律鼻舍等謀叛伏誅壬戌以南  
院大王耶律景爲上京留守封漆水郡王霸州民李在宥年百三十有三賜束帛錦袍銀帶月給羊酒仍  
復其家二月甲申免南京被水戶租賦己丑高麗來貢甲午免諸部歲輸羊及關征庚子回鶻來貢三月  
丁巳高麗遣使請所俘人畜詔贖還戊午幸南京丙寅遣使撫諭高麗己巳涿州水連理壬申如長春宮  
觀牡丹是月復置南京統軍都監夏四月辛卯幸南京壬辰樞密直學士劉恕爲南院樞密副使戊戌以  
景宗石像成幸延壽寺飯僧五月甲寅詔北皮室軍老不任事者免役戊午如炭山清暑庚辰武定軍節  
度使韓德冲秩滿其民請留從之六月辛巳朔詔州縣長吏有才能無過者減一資考任之癸未可汗州  
刺史賈俊進新麻庚子錄囚甲辰詔龍鳳兩軍老疾者代之是月太白歲星相犯秋七月辛亥朔日有食  
之甲寅遣使視諸道禾稼辛酉南院樞密使室昉爲中京留守加尙父丙寅女直遣使來貢戊辰觀穫庚  
午詔契丹人犯十惡者依漢律己卯以翰林承旨邢抱朴參知政事八月庚辰朔詔皇太妃領西北路烏  
古等部兵及永興宮分軍撫定西邊以蕭撻孛督其軍事乙酉宋遣使求和不許戊子以國舅帳剋蕭徒  
骨爲夷離畢乙未下詔戒諭中外官吏丁酉錄囚雜犯死罪以下釋之九月壬子室韋瑩吐谷渾等來

貢辛酉宋復遣使求和不許壬戌行拜輿禮癸酉阻卜等來貢冬十月乙酉獵可汗州之西山乙巳詔定均稅法丁未大理寺置少卿及正十一月戊申朔行再生禮鐵驪來貢詔諸部所俘宋人有官吏儒生抱器能者諸道軍有勇健者具以名聞庚戌詔郡邑貢明經茂材異等甲寅詔南京決滯獄己未官宋俘衛德升等六人十二月戊寅朔日有食之詔并奚王府輿理墮隗梅只三部爲一其二剋各分爲部以足六部之數甲申賜南京統軍司貧戶耕牛戊子高麗進妓樂却之庚寅禁游食民癸巳女直以宋人浮海路本國及兀惹叛來告丁未幸南京是年放進士呂德懋等二人及第

十三年春正月壬子幸延芳淀甲寅置廣靈縣丁巳增泰州遂城等縣賦庚申詔諸道勸農癸亥長靈軍節度使蕭解里秩滿民請留從之庚午如長春宮二月丁丑女直遣使來貢甲辰高麗遣李周禎來貢三月癸丑夏國遣使來貢戊辰武清縣百餘人入宋境剽掠命誅之還其所獲人畜財物夏四月己卯參知政事邢抱朴以母憂去官起復丙戌詔諸道民戶應歷以來脅從爲部曲者仍籍州縣甲午如炭山清暑五月壬子高麗進鷹乙亥北南乙室三府請括富民馬以備軍需不許給以官馬六月丙子朔啟聖軍節度使劉繼琛秩滿民請留從之丁丑詔減前歲括田租賦甲申以宣徽使阿沒里私城爲豐州丙戌詔許昌平懷柔等縣諸人請業荒地秋七月乙巳朔女直遣使來貢丁巳兀惹烏昭度渤海燕頗等侵鐵驪遣



奚王和朔奴等討之壬戌詔蔚朔等州龍衛威勝軍更戌八月丙子夏國遣使進馬壬辰詔修山澤祠宇  
先哲廟貌以時祀之九月戊午以南京大學生員浸多特賜水硯莊一區丁卯奉安景宗及皇太后石像  
于延芳淀冬十月乙亥置義倉辛巳回鶻來貢甲申高麗遣李知白來貢戊子兀惹歸款詔諭之庚子鼻  
骨德來貢十一月乙巳阿薩蘭回鶻遣使來貢辛酉遣使冊王治爲高麗國王戊辰高麗遣童子十人來  
學本國語十二月己卯鐵驪遣使來貢鷹馬辛巳夏國以敗宋人遣使來告是年放進士王用極等二人  
十四年春正月己酉漁于潞河丁巳蠲三京及諸州稅賦丙寅夏國遣使來貢庚午以宣徽使阿沒里家  
奴閻貴爲豐州刺史二月庚寅回鶻遣使來貢三月壬寅高麗王治表乞爲婚許以東京留守駙馬蕭恆  
德女嫁之庚戌高麗復遣童子十人來學本國語甲寅韓德威奏討党項捷甲子詔安集朔州流民夏四  
月甲戌東邊諸亂各置都監庚寅如炭山清暑己亥鑿大安山取劉守光所藏錢是月奚王和朔奴東京  
留守蕭恆德等五人以討兀惹不克削官改諸部令穩爲節度使五月癸卯詔參知政事邢抱朴決南京  
滯獄庚戌朔州威勝軍一百七人叛入宋六月辛未如炭山清暑鐵驪來貢乙酉回鶻來貢己丑高麗遣  
使來問起居後至無時秋七月戊午回鶻等來貢閏月丁丑五院部進穴地所得金馬冬十月丙辰命劉  
遂教南京神武軍士劍法賜袍帶錦幣戊午烏昭度乞內附十一月甲戌詔諸軍官毋非時收獵妨農乙

西奉安景宗及太后石像于乾州是月回鶻阿薩蘭遣使爲子求婚不許十二月甲寅以南京道新定稅法太重減之甲子擿凜誘叛酋阿魯敦等六十人斬之封蘭陵郡王幸南京是年放進士張儉等三人十五年春正月庚午幸延芳淀丙子以河西党項叛詔韓德威討之庚辰詔諸道勸民種樹癸未兀惹長武周來降戊子女直遣使來貢己丑詔南京決滯囚乙未免流民稅二月丙申朔如長春宮戊戌勸品部富民出錢以贖貧民庚子徙梁門遂城泰州北平民於內地丙午夏國遣使來貢甲寅問安皇太后丙辰韓德威奏破党項捷丁巳詔品部曠地令民耕種三月乙丑朔党項來貢戊辰募民耕灤州荒地免其租賦十年己巳夏國破宋兵遣使來告己卯封夏國王李繼遷爲西平王壬午通括宮分人戶免南京逋稅及義倉粟甲申河西党項乞內附庚寅兀惹烏昭度以地達乞歲時免進鷹馬貂皮詔以生辰正旦貢如舊餘免癸巳宋主昷殂子恆嗣位甲午皇太妃獻西邊捷夏四月乙未朔罷奚王部歲貢麇戊戌錄囚壬寅發義倉粟賑南京諸縣民丙午廣德軍節度使韓德凝有善政秩滿其民請留從之己酉幸南京丁巳致奠于太宗皇帝廟己未如炭山清暑五月甲子朔日有食之己巳詔平州決滯獄是月敵烈八部殺詳穩以叛蕭撻凜追擊獲部族之半六月丙申鐵驪來貢壬子夏國遣使來謝封册秋七月戊辰党項來貢辛未禁吐谷渾別部鬻馬於宋丙子高麗遣韓彥敬奉幣弔越國公主之喪辛卯詔南京決獄訟八月

丁酉獵于平地松林皇太后誠曰前聖有言欲不可縱吾兒爲天下主馳騁田獵萬一有銜橛之變適遭予憂其深戒之九月丙寅罷東邊戍卒庚午幸驍州致奠太祖廟戊子蕭撻凜奏討阻卜捷冬十月壬辰朔駐蹕馳山罷奚王諸部貢物乙未賜宿衛時服丁酉禁諸山寺毋濫度僧尼戊戌弛東京道魚藻之禁戊申以上京獄訟繁冗詰其主者辛酉錄囚十一月壬戌朔錄囚丙戌幸顯州戊子謁顯陵庚寅謁乾陵是月高麗王治薨姪誦遣王同穎來告十二月乙巳釣魚土河己酉駐蹕馳山壬子夏國遣使來貢甲寅遣使祭高麗王治詔其姪權知國事丙辰錄囚是年放進士陳鼎等二人



遼史卷十三考證

聖宗紀四統和十二年正月幸延芳淀十三年九月奉安景宗及皇太后石像于延芳淀○臣宗楷按北  
平古今記謂統和四年命皇族廬帳駐東京延芳淀是東京亦有延芳淀也

遼史卷十三考證

元 中 書 右 丞 相 總 裁 脫 脫 等 修

本紀第十四

聖宗五

十六年春正月乙丑如長瀼二月庚子夏國遣使來貢丙午以監門衛上將軍耶律高羅爲中臺省左相  
三月甲子女直遣使來貢乙亥鼻骨德酋長來貢夏四月癸卯振崇德宮所隸州縣民之被水者丁未罷  
民輸官俸給自內帑己酉祈雨乙卯如木葉山五月甲子祭白馬神丁卯祠木葉山告來歲南伐庚辰鐵  
驪來貢乙酉還上京婦人年踰九十者賜物六月戊子朔致奠於祖懷二陵是月清暑炭山秋七月丁巳  
朔錄囚聽政八月丁亥朔東幸九月丁巳朔駐蹕得勝口冬十一月遣使冊高麗國王誦十二月丙戌宋  
國王休哥薨輟朝五日進封皇弟恆王隆慶爲梁國王南京留守鄭王隆祐爲吳國王是年放進士楊文  
立等二人

十七年春正月乙卯朔如長春宮夏四月如炭山清暑六月兀惹烏昭慶來秋七月以伐宋詔諭諸道九  
月庚辰朔幸南京己亥南伐癸卯射鬼箭北院樞密使魏王耶律斜軫薨以韓德讓兼知北院樞密使事

冬十月癸酉攻遂城不克遣蕭繼遠攻狼山鎮石砦破之次瀛州與宋軍戰擒其將康昭裔宋順獲兵仗器甲無算進攻樂壽縣拔之次遂城敵衆臨水以拒縱騎兵突之殺戮殆盡是年放進士初錫等四人及第

十八年春正月還次南京賞有功將士罰不用命者詔諸軍各還本道二月幸延芳淀夏四月己未駐蹕于清泉淀五月丁酉清暑炭山六月阻卜叛會鶻礮之弟鐵勒不率部衆來附鶻礮無所歸遂降詔誅之秋七月駐蹕于湯泉九月乙亥朔駐蹕黑河冬十一月甲戌朔授西平王李繼遷子德昭朔方軍節度使十二月回鶻來貢是年放進士南承保等三人及第

十九年春正月辛巳以祇候郎君班詳繙觀音爲奚六部大王甲申回鶻進梵僧名醫三月乙亥夏國遣李文貴來貢乙酉西南面招討司奏党項捷壬辰皇后蕭氏以罪降爲貴妃賜大丞相韓德讓名德昌夏四月乙巳幸吳國王隆祐第視疾丙午問安皇太后五月癸酉清暑炭山丙戌册蕭氏爲齊天皇后庚寅以十拽刺詳繙耶律王奴爲乙室大王辛卯以青牛白馬祭天地六月乙巳以所俘宋將康昭裔爲昭順軍節度戊午夏國奏下宋恆懷慶等三州賜詔褒之秋七月丙戌以東京統軍使耶律奴瓜爲南府宰相八月庚戌達盧骨部來貢九月己巳朔問安皇太后戊子駐蹕昌平庚寅西南面招討司奏討吐谷渾

捷辛卯幸南京冬十月己亥南伐壬寅次鹽溝徙封吳國王隆祐爲楚國王留守京師丁未梁國王隆慶統先鋒軍以進辛亥射鬼箭壬子以青牛白馬祭天地甲寅遼軍與宋兵戰于遂城敗之庚申以黑白羊祭天地丙寅次滿城以泥滓班師十一月庚午射鬼箭丙子宋兵出淤口益津關來侵偵候謀津虞人招古擊敗之己卯觀漁儒門灤閏月己酉鼻骨德來貢己未滅關市稅十二月庚辰免南京平州租稅

二十年春正月庚子如延芳淀癸丑東方五色虹見詔安撫西南面向化諸部甲寅夏國遣使貢馬騮辛酉女直宰相夷窩底來貢二月丁丑女直遣其子來朝高麗遣使賀伐宋捷三月甲寅遣北府宰相蕭繼建等南伐壬戌駐蹕鴛鴦灤夏四月丙寅朔文班太保達里底敗宋兵于梁門甲戌南京統軍使蕭撻凜破宋軍於泰州乙酉南征將校獻俘賜爵賞有差戊子鐵驪遣使來貢五月乙卯幸炭山清暑六月夏國遣劉仁最來告下靈州秋七月甲午朔日有食之丁酉以邢抱朴爲南院樞密使辛丑高麗遣使來貢本國地里圖九月癸巳朔謁顯陵告南伐捷冬十月癸亥朔至自顯陵十二月癸亥王府五帳六節度獻七金山土河川地賜金幣是歲南京平州麥秀兩歧放進士邢祥等六人及第

二十一年春正月如鴛鴦灤三月壬辰詔修日麻官毋書細事甲午朝皇太后戊午鐵驪來貢夏四月乙丑女直遣使來貢戊辰兀惹渤海奧里米越里篤越里古等五部遣使來貢是月耶律奴瓜蕭撻凜獲宋



將王繼忠于望都五月庚寅朔清暑炭山丁巳西平王李繼遷薨其子德昭遣使來告六月己卯贈繼遷  
尙書令遣西上閣門使丁振弔慰辛巳党項來貢乙酉阻卜鐵刺里率諸部來降是月修可敦城秋七月  
庚戌阻卜烏古來貢甲寅以奚王府監軍耶律室魯爲南院大王八月乙酉阻卜鐵刺里來朝丙戌朝皇  
太后九月己亥夏國李德昭遣使來謝弔贈癸丑幸女河湯泉改其名曰松林冬十月丁巳駐蹕七渡河  
戊辰以楚國王隆祐爲西南面招討使十一月壬辰故子越耶律休哥之子道士奴高九等謀叛伏誅丙  
申通括南院部民十二月癸未罷三京諸道貢

二十二年春正月丁亥如鴛鴦灤二月乙卯朔女直遣使來貢丙寅南院樞密使邢抱朴薨輟朝三日三  
月己丑罷番部賀正節及冬至重五貢乙未西夏李德昭遣使上繼遷遺物夏四月丁卯朝皇太后五  
月清暑炭山六月戊子以可敦城爲鎮州軍曰建安秋七月甲申遣使封夏國李德昭爲西平王丁亥兀  
惹蒲奴里剖阿里越里篤奧里米等部來貢八月丙辰党項來貢庚申阻卜酋鐵刺里來朝戊辰鐵刺里  
求婚不許丙子駐蹕犬牙山九月己丑以南伐諭高麗丙午幸南京女直遣使獻所獲烏昭慶妻子丁未  
致祭于太宗皇帝廟以北院大王磨魯古太尉老君奴監北南王府兵庚戌命楚國王隆祐留守京師閏  
月己未南伐癸亥次固安以所獲諜者射鬼箭甲子以青牛白馬祭天地丙寅遼師與宋兵戰于唐興大

破之丁卯蕭撻凜與宋軍戰于遂城敗之庚午軍于望都冬十月乙酉以黑白羊祭天地丙戌攻瀛州不克甲午下祈州賚降兵以酒脯祭天地己酉西平王李德昭遣使謝封冊十一月癸亥軍馬都指揮使耶律謀里遇宋兵于洛州擊退之甲子東京留守蕭排押獲宋魏府官吏田逢吉郭守榮常顯劉綽等以獻丁卯南院大王善補奏宋遣人遣王繼忠弓矢密請求和詔繼忠與使會許和庚午攻破德清軍壬申次瀛淵蕭撻凜中伏弩死乙亥攻破通利軍丁丑宋遣崇儀副使曹利用請和卽遣飛龍使韓杞持書報聘十二月庚辰朔日有食之既癸未宋復遣曹利用來以無還地之意遣監門衛大將軍姚東之持書往報戊子宋遣李繼昌請和以太后爲叔母願歲輸銀十萬兩絹二十萬匹許之卽遣閤門使丁振持書報聘己丑詔諸軍解嚴是月班師皇太后賜大丞相齊王韓德昌姓耶律徙王晉是年放進士李可封等三人二十三年春正月戊午還次南京庚申大饗將卒爵賞有差二月丙戌復置榷場於振武軍丁巳夏國遣使告下宋青城辛酉朝皇太后以惕隱化哥爲南院大王行軍都監老君奴爲惕隱乙丑振黨項部丁卯回鶻來貢丁丑改易州飛狐招安使爲安撫使夏四月丙戌女直及阿薩蘭回鶻各遣使來貢乙未鐵驪來貢己亥党項來侵五月戊申朔宋遣孫僅等來賀皇太后生辰乙卯以金帛賜陣亡將士家丙寅高麗以與宋和遣使來賀六月壬辰清暑炭山甲午阻卜酋鐵刺里遣使賀與宋和己亥達旦國九部遣使來

聘秋七月癸丑問安皇太后戊午党頊來貢辛酉以青牛白馬祭天地壬戌烏古來貢丁卯女直遣使來貢阿薩蘭回鶻遣使來請先留使者皆遣之九月甲戌遣太尉阿里太傅楊六賀宋主生辰冬十月丙子朔鼻骨德來貢戊子朝皇太后甲午駐蹕七渡河癸卯宋歲幣始至後爲常十一月戊申上遣太保合住頊給使韓簡太后遣太師益奴政事舍人高正使宋賀正旦辛亥觀漁桑乾河丁巳詔大丞相耶律德昌出宮籍屬于橫帳十二月丙申宋遣周漸等來賀千齡節丁酉復遣張若谷等來賀正旦

二十四年春正月加駕鶯灤夏五月壬寅朔幸炭山清暑幽皇太妃胡輦于懷州囚夫人夷懶于南京餘黨皆生瘴之秋七月辛丑朔南幸八月丙戌改南京宮宣教門爲元和外三門爲南端左掖門爲萬春右掖門爲千秋是月沙州燉煌王曹壽遣使進大食國馬及美玉以對衣銀器等物賜之九月幸南京冬十月庚午朔帝率羣臣上皇太后尊號曰睿德神略應運啟化承天皇太后羣臣上皇帝尊號曰至德廣孝昭聖天輔皇帝大赦是年放進士楊佖等二十二人及第

二十五年春正月建中京二月如駕鶯灤夏四月清暑炭山六月賜皇太妃胡輦死于幽所秋七月壬申西平王李德昭母薨遣使弔祭甲戌遣使起復九月西北路招討使蕭圖玉討阻卜破之冬十月丙申駐

蹕中京十二月己酉振饒州饑民



二十六年春二月如長樂夏四月辛卯朔祠木葉山五月庚申朔還上京丙寅高麗進龍鬚草席己巳遣使賀中京成庚午致祭祖懷二陵辛未駐蹕懷州秋七月增太祖太宗讓國皇帝世宗諡仍諡皇太弟李胡曰欽順皇帝冬十月戊子朔幸中京十二月蕭圖玉奏討甘州回鶻降其王耶刺里撫慰而還是年放進士史克忠等一十三人

二十七年春正月釣魚土河獵于瑞鹿原夏四月丙戌朔駐蹕中京營建宮室庚戌廢霸州處置司秋七月甲寅朔霖雨潢土幹刺陰涼四河皆溢漂沒民舍八月甲申北幸冬十一月壬子朔行柴冊禮十二月乙酉南幸皇太后不豫戊子肆赦辛卯皇太后崩于行宮壬辰遣使報哀于宋夏高麗戊申如中京己酉詔免賀千齡節是歲御前引試劉二宜等三人

遼史卷十四

十一人



遼史卷十四考證

聖宗紀五統和十七年秋七月伐宋冬十月癸酉攻遂城不克次瀛州與宋軍戰擒其將康昭裔宋順○

臣宗萬按康昭裔通鑑作康保裔據通鑑則保裔乃戰死真宗優詔贈恤錄其子孫據遼史則昭裔已

就擒後且以爲昭順軍節度使二者未知孰是

十八年春正月遣次南京○臣長發按宋通鑑契丹知帝親征縱掠而去然則聖宗之遣次南京因真宗

之親征而遼史諱之也

二十三年十二月丙申宋遣周漸等來賀正旦○臣宗萬按周漸之使

宋史不載而正旦所遣乃韓國華也此云張若谷與宋史異

遼史卷十四考證



元中書右丞相總裁脫脫等修

本紀第十五

聖宗六

二十八年春正月辛亥朔不受賀甲寅如乾陵癸酉奉安大行皇太后梓宮于乾州葺遂殿二月丙戌宋遣王儒等來弔祭己亥高麗遣魏守愚等來祭是月遣左龍虎衛上將軍蕭合卓饋大行皇太后遺物于宋仍遣臨海軍節度使蕭虛列左領軍衛上將軍張崇濟謝宋弔祭三月癸卯上大行皇太后諡爲聖神宣獻皇后是月宋高麗遣使來會葬夏四月甲子葬太后於乾陵賜大丞相耶律德昌名曰隆運庚午賜宅及陪葬地五月己卯朔如中京辛卯清暑七金山乙巳西北路招討使蕭圖玉奏伐甘州回鶻破肅州盡俘其民詔修土隄口故城以實之丙午高麗西京留守康肇弑其主誦擅立誦從兄詢詔諸道繕甲兵以備東征秋八月戊申振平州饑民辛亥幸中京丙寅謁顯乾二陵丁卯自將伐高麗遣使報宋以皇弟楚國王隆祐留守京師北府宰相駙馬都尉蕭排押爲都統北面林牙僧奴爲都監九月乙酉遣使册西平王李德昭爲夏國王辛卯遣樞密直學士高正引進使韓杞宣問高麗王詢冬十月丙午朔女直

進夏馬萬匹乞從征高麗許之王詢遣使表表乞罷師不許十一月乙酉大軍渡鴨綠江康肇拒戰敗之  
退保銅州丙戌肇復出右皮室詳穩耶律敵魯擒肇及副將李立追殺數十里獲所棄糧餉鎧仗戊子銅  
霍貴寧等州皆降排押至奴古達嶺遇敵兵戰敗之辛卯王詢遣使上表請朝許之禁軍士俘掠以政事  
舍人馬保佑爲開京留守安州團練使王八爲副留守遣太子太師乙凜將騎兵一千送保佑等赴京壬  
辰守將卓思正殺遼使者韓喜孫等十人領兵出拒保佑等還遣乙凜領兵擊之思正遂奔西京圍之五  
日不克駐蹕城西高麗禮部郎中渤海陀失來降庚子遣排押盆奴等攻開京遇高麗兵敗之王詢棄城  
遁去遂焚開京至清江還

二十九年春正月乙亥朔班師所降諸城復叛至貴州南峻嶺谷大雨連日馬駝皆疲甲仗多遺棄露乃  
得渡己丑次鴨綠江庚寅皇后及皇弟楚國王隆祐迎于來遠城壬辰詔罷諸軍己亥次東京二月己酉  
謁乾顯二陵戊午所俘高麗人分置諸陵廟餘賜內戚大臣三月己卯大丞相晉國王耶律隆運薨庚辰  
皇弟楚國王隆祐權知北院樞密使事樞密直學士高正爲北院樞密副使庚寅南京平州水振之己亥  
以北院大王耶律室魯爲北院樞密使封韓王北院郎君耶律世良爲北院大王前三司使劉慎行叅知  
政事兼知南院樞密使事夏四月清暑老古塌五月甲戌朔詔已奏之事送所司附日曆又詔帳族有罪



黥墨依諸部人例乙未以劉慎行爲南院樞密使南府宰相邢抱質知南院樞密使事六月庚戌升蔚州知州爲觀察使乙卯韓王耶律室魯薨丙辰以南院大王化哥爲北院樞密使丁巳詔西北路招討使駙馬都尉蕭圖玉安撫西鄙置阻卜諸部節度使是秋獵于平地松林冬十月庚子駐蹕廣平淀甲寅贈大丞相晉國王耶律隆運尙書令諡文忠十一月庚午朔幸顯州十二月庚子復如廣平淀癸丑以知南院樞密使事邢抱質年老詔乘小車入朝是月置歸靈二州是年御試放高承顏等二人及第

開泰元年春正月己巳朔宋遣趙湘符成翰來賀癸未長白山三十部女直酋長來貢乞授爵秩甲申駐蹕王子院丙戌望祠木葉山丁亥女直太保蒲撚等來朝戊子獵于買曷魯林庚寅祠木葉山辛卯曷蘇館大王里曷喜來朝二月壬子駐蹕瑞鹿原三月甲戌以蔚州爲觀察不隸武定軍乙亥如葦灤丁丑詔封皇女八人爲郡主乙酉詔卜日行拜山大射柳之禮命北宰相駙馬蘭陵郡王蕭靈樞密使司空邢抱質督有司具儀物丁亥皇弟楚國王隆祐徙封齊國王留守東京夏四月庚子高麗遣蔡忠順來乞稱臣如舊詔王詢親朝壬寅夏國遣使進良馬己酉祀風伯辛酉以前孟父房敝糴蕭佛奴爲左夷高畢五月戊辰朔還上京詔裴玄感邢祥知禮部貢舉放進士史簡等十九人及第以駙馬蕭紹宗爲鄭州防禦使乙亥以邢抱質爲大同軍節度使六月駐蹕上京七月丙子以耶律遂貞爲遼興軍節度使遂正北院宣

徽使張昭瑩南院宣徽使耶律受益上京副留守寇卿彰德軍節度使命耶律釋身奴李操充賀宋國生辰信使副蕭涅衰齊泰賀宋正旦使副進士康文昭張素臣郎玄達坐論知貢舉裴玄感邢祥私曲秘書省正字李萬上書辭涉怨訕皆杖而徒之萬役陷河冶八月丙申鐵驪那沙等送兀惹百餘戶至賓州賜綵絹是日那沙乞賜佛像儒書詔賜護國仁王佛像一易詩書春秋禮記各一部己未高麗王詢遣田拱之奉表稱病不能朝詔復取六州地是月齊國王隆祐薨輟朝五日冬十月辛亥如中京閏月丁卯贈隆祐守大師諡仁孝十月甲午朔文武百官加上尊號曰弘文宣武尊道至德崇仁廣孝聰睿昭聖神贊天輔皇帝大赦改元開泰改幽都府爲析津府薊北縣爲析津縣幽都縣爲宛平縣覃恩中外己亥賜夏國使東頭供奉官曹文斌呂文貴寶珪祐守榮武元正等爵有差癸卯前遼州錄事張庭美六世同居儀坤州劉興廣四世同居各給復三年甲辰西北招討使蕭圖玉奏七部太師阿里底因其部民之怨殺本部節度使霸暗并屠其家以叛阻卜執阿里底以獻而沿邊諸部皆叛十二月丙寅奉遷南京諸帝石像于中京觀德殿景宗及宣獻皇后于上京五鸞殿壬申振奉聖州饑民庚辰賜皇弟秦晉國王隆慶鐵券癸未劉晨言殿中高可垣中京留守推官李可舉治獄明允詔超遷之甲申詔諸道水菑饑民質男女者起來年正月日計備錢十文價折備盡遣還其家歸州言其居民本新羅所遷未習文字請設學以教之詔



允所請貴德龍化儀坤雙遼同祖七州至是詔始征商己丑詔諸鎮建宣救樓

二年春正月癸巳朔以裴玄感爲翰林承旨邢祥給事中石用中翰林學士呂德推樞密直學士張儉政事舍人邢抱質加開府儀同三司守司空兼侍中王繼忠中京留守檢校太師戶部侍郎劉涇加工部尚書駙馬蕭紹宗加檢校太師耶律控溫加政事令封幽王丁未如瑞鹿原北院樞密使耶律化哥封幽王以馬氏爲麗儀耿氏淑儀尙寢白氏昭儀尙服李氏順儀尙功艾氏芳儀尙儀孫氏和儀己未錄囚烏古敵烈叛右皮室詳穩延壽率兵討之是月遼巨國兵圍鎮州州軍堅守尋引去二月丙子詔以麥務川爲象雷縣女河川爲神水縣羅家軍爲閭山縣山子川爲富庶縣習家砦爲龍山縣阿覽峪爲勸農縣松山川爲松山縣金甸子爲金原縣壬午遣北院樞密副使高正按察諸道獄三月壬辰朔化哥以西北路略平留兵戍鎮州赴行在夏四月甲子拜日詔從上京請以韓斌所括贖國撻魯河秦豪等州戶二萬五千四百有奇置長霸興仁保和等十縣丙子如緬山五月辛卯朔復命化哥等西討六月辛酉朔遣中丞耶律資忠使高麗取六州舊地秋七月壬辰烏古敵烈皆復故疆乙未西南招討使政事令斜軫奏党項諸部叛者皆遁黃河北模赧山其不叛者曷黨烏迷兩部因據其地今復西遷詰之則曰逐水草不早圖之後恐爲患又聞前後叛者多投西夏西夏不納詔遣使再問西遷之意若歸故地則可就加撫諭使不報

上怒欲伐之遂詔李德昭令党項叛我欲西伐爾當東擊毋失犄角之勢仍命諸軍各市肥馬丁酉以悞  
隱耶律滌冽爲南府宰相太尉五哥爲惕隱癸卯釣魚曲溝戊申詔以敦睦宮子錢振貧民己酉化哥等  
破阻卜酋長烏八之衆丁卯封皇子宗訓大內惕隱八月壬戌遣引進使李延弘賜夏國王李德昭及義  
成公主車馬己丑耶律資忠使高麗還冬十月己未朔畋鹿井之北命耶律阿營等使宋賀生辰辛酉駐  
蹕長樂丙寅詳穩張馬留獻女直人知高麗事者上問之曰臣三年前爲高麗所虜爲郎官故知之自開  
京東馬行七日有大特廣如開京旁州所貢珍異皆積于此勝羅等州之南亦有二大特所積如之若大  
軍行由前路取曷蘇館女直北直渡鴨綠江並大河而上至郭州與大路會高麗可取而有也上納之十  
一月甲午錄囚癸丑樞密使幽王化哥以西征有罪削其官封出爲大同軍節度使十二月甲子以北院  
大王耶律世良爲北院樞密使封岐王以宰臣劉晟監修國史牛璘爲彰國軍度使使蕭孝穆爲西北路  
招討使放進士鮮于茂昭等六人及第

三年春正月己丑錄囚阻卜酋長烏八來朝封爲王乙未如渾河丁酉女直及鐵驪各遣使來貢是夕彗  
星見西方丙午畋潢河濱壬子帝及皇后獵瑞鹿原二月戊午詔增樞密使以下月俸甲子遣上京副留  
守耶律資忠使高麗取六州舊地三月庚子遣耶律世良城招州戊申南京奉聖平蔚雲應朔等州置

轉運使夏四月戊午詔南京管內毋淹刑獄以妨農務癸亥烏古叛乙亥沙州回鶻曹順遣使來貢丙子以西北路招討都監蕭孝穆爲北府宰相五月乙酉朔清暑緬山六月乙亥合拔里一室二國舅爲一帳以乙室夷窩畢蕭敵烈爲詳穩以總之甲申封皇姪胡都古爲廣平郡王是夏詔國舅詳穩蕭敵烈東京留守耶律團石等討高麗造浮梁于鴨綠江城保宣義定遠等州秋七月乙酉朔如平地松林壬辰詔政事省樞密院酒間授官釋罪毋卽奉行明日覆奏八月甲寅朔幸沙嶺九月丁酉八部敵烈殺其詳穩稍瓦皆叛詔南府宰相耶律吾剌葛招撫之辛亥釋敵烈數人令招諭其衆壬子耶律世良遣使獻敵烈俘冬十月甲寅朔幸中京丙子以旗鼓拽刺詳穩題里姑爲奚六部大王放進士張用行等三十一人及第出身

四年春正月乙酉如瑞鹿原丙戌詔耶律世良再伐迪烈得戊子命詳穩拔姑濕水瑞鹿原以備春蒐丁酉獵馬蘭淀壬寅東征東京留守善寧平章涅里袞奏已總大軍及女直諸部兵分道進討遂遣使齎密詔軍前二月壬子朔如薩堤灤于闐國來貢夏四月癸丑以林牙建福爲北院大王甲寅蕭敵烈等伐高麗還丙寅曷蘇館部請括女直王殊只徐戶舊無籍者會其丁入賦役從之樞密使貫雲奏大破八部迪烈得詔侍御撒刺獎諭代行執手之禮丙寅耶律世良等上破阻卜俘獲數戊辰駐蹕汾柳湖己巳女直

遣使來貢壬申耶律世良討烏古破之甲戌遣使賞有功將校世良討迪烈得至清泥塌時于厥既平朝廷議內徙其衆于厥安土重遷遂叛世良懲創既破迪烈得輒殲其丁壯勒兵渡曷刺河進擊餘黨斥候不謹其將勃括聚兵稠林中擊遼軍不備遼軍小却結陣河曲勃括是夜來襲翌日遼後軍主勃括誘于厥之衆皆遁世良追之軍至險阨勃括方阻險少休遼軍偵知其所世良不亟掩之勃括輕騎遁去獲其輜重及所誘于厥之衆併遷迪烈得所獲轄麥里部民城臚胸河上以居之是月蕭楊哥尙南平郡主五月辛巳命北府宰相劉晟爲都統樞密使耶律世良爲副殿前都點檢蕭屈烈爲都監以伐高麗晟先攜家置邊郡致緩師期追還之以世良屈烈總兵進討以耶律德政爲遼興軍節度使蕭年骨烈天城軍節度使李仲舉卒詔賻恤其家六月庚戌上拜日如禮與麻都骨世勳易衣馬爲好以上京留守耶律八哥爲北院樞密副使秋七月上又拜日遂幸秋山自八月射鹿至于九月復自癸丑至于辛酉連獵于有栢碎石太保響應松山諸山丁卯與夷離畢兵部尙書蕭榮寧定爲交契以重君臣之好丙子以旗鼓拽刺詳穩題里姑爲六部奚王冬十月駐蹕撻刺割濼十一月庚申詔汰東京僧及命上京中京洎諸宮選精兵五萬五千人以備東征十二南巡海徼還幸顯州

五年春正月丁未北幸庚戌耶律世良蕭屈烈與高麗戰于郭州西破之斬首數萬級盡獲其輜重乙卯

師次南海軍耶律世良薨于軍癸酉駐蹕雪林二月己卯阻卜長來朝辛巳如薩埵濛庚寅以前東京統軍使耶律韓留爲右夷離畢戊戌皇子宗眞生三月乙卯鼻骨德長撒保特賽刺等來貢辛酉諸道獄空詔進階賜物丙寅以前北院大王耶律敬溫爲阿扎割只辛未党項魁可來降夏四月乙亥振招州民戊寅以左夷離畢蕭合卓爲北院樞密使曷魯監爲副使庚辰清暑孤樹淀五月甲子尙書蕭姬嚙坐出使後期削其官丁卯以耿元吉爲戶部使六月以政事舍人吳克昌按察霸州刑獄丁丑回鶻獻孔雀秋七月甲辰獵于赤山八月丙子幸懷州有事于諸陵戊寅還上京九月癸卯皇弟南京留守秦晉國王隆慶來朝上親出迎勞至寶德山因同獵于松山乙丑駐蹕杏塢冬十月甲午封秦晉國王隆慶長子查割中山郡王次子遂哥樂安郡王十一月辛丑以參知政事馬保忠同知樞密院事監修國史丁巳以北面林牙蕭隈洼爲國舅詳穩十二月乙酉秦晉國王隆慶還至北安薨訃聞上爲哀慟輟朝七日丁酉宋遣張遜王承德來賀千齡節是歲放進士孫傑等四十八人及第

六年春正月癸卯如錐子河二月甲戌以公主賽哥殺無罪婢駙馬蕭圖五不能齊家降公主爲縣主削圖玉同平章事丁丑詔國舅帳詳穩蕭隗洼將本部兵東征高麗其國舅司事以都監攝之庚辰以南面林牙涅合爲南院大王三月乙巳如顯州葬秦晉國王隆慶有事于顯乾二陵追冊隆慶爲太弟夏四月



辛卯封隆慶少子謝家奴爲長沙郡王以樞密使漆水郡王耶律制心權知諸行宮都部署壬辰禁命婦再醮丙申如涼陞五月戊戌朔樞密使蕭合卓爲都統漢人行宮都部署王繼忠爲副殿前都點檢蕭屈烈爲都監以伐高麗翌日賜合卓劍俸得專殺丙午錄囚己酉設四帳都詳穩甲寅以南京統軍使蕭惠爲右夷高畢乙卯祠木葉山潢河乙丑駐蹕九層臺六月戊辰朔德妃蕭氏賜死葬兔兒山西後數日大風起塚上晝暝大雷電而雨不止者踰月是月南京諸縣蝗秋七月辛亥如秋山遣禮部尙書劉京翰林學士吳叔達知制誥仇正己起居舍人程翥吏部員外郎南承顏禮部員外郎王景運分路按察刑獄辛酉以西南路招討請置靈仁縣于勝州九月庚子還上京以皇子屬思生大赦丁未以駙馬蕭理節度使化哥知制誥仇正己楊佺充賀宋生辰正旦使副乙卯蕭合卓等攻高麗興化軍不克還師冬十月丁卯南京路饑輓雲應朔弘等州粟振之辛未獵鏢子河庚寅駐蹕遼離山十一月乙卯建州節度使石匡弼卒十二月丁卯上輕騎還上京戊子宋遣李行簡張信來賀千齡節翌日宋馮元張綸來賀正旦

遼史卷十五考證

聖宗紀六開泰四年夏四月甲寅蕭敵烈等伐高麗還○

臣長發

按通鑑綱目契丹遣敵烈討高麗高麗

與女直設奇邀擊契丹大敗而還此不書敗諱之也

五月辛巳命北府宰相劉晟為都統樞密使耶律世良為副殿前都點檢蕭屈烈為都監以伐高麗○臣

長發

按遼史高麗傳劉晟作慎行蕭屈烈作蕭虛烈

遼史卷十五考證



元 中 書 右 丞 相 總 裁 脫 脫 等 修

本紀第十六

聖宗七

七年春正月甲辰如達離山二月乙丑朔拜日如渾河三月辛丑命東北越里篤剖阿里奧里米蒲奴里  
鐵驪等五部歲貢貂皮六萬五千馬三百丙午烏古部節度使蕭普達討叛命敵烈滅之夏四月拜日丙  
寅振川饒二州饑辛未振中京貧乏癸酉禁匿名書壬辰以三司使呂德懋爲樞密副使閏月壬子以蕭  
進忠爲彰武軍節度使兼五州制置戊午吐蕃王并里尊奏凡朝貢乞假道夏國從之五月丙寅皇子宗  
眞封梁王宗元永清軍節度使宗簡右衛大將軍宗愿左驍衛大將軍宗偉右衛大將軍皇姪宗範昭義  
軍節度使宗熙鎮國軍節度使宗亮絳州節度使宗弼濮州觀察使宗奕曹州防禦使宗顯宗蕭皆防禦  
使以張儉守司徒兼政事令丙申品打魯瑰部節度使勃魯里至鼻洒河遇微雨忽天地晦冥大風飄四  
十三人飛旋空中良久乃墮數里外勃魯里幸獲免一酒壺在地反不移八月丙午行大射柳之禮庚申  
以耶律留監吳守達使宋質生辰蕭高九馬貽謀使宋質正旦加平章蕭弘義開府儀同三司尙父兼政

事令秋七月甲子詔翰林待詔陳升寫南征得勝圖于上京五鸞殿丁卯蒲奴里部來貢九月庚申蒲呢國使奏本國與烏里國封壤相接數侵掠不寧賜詔諭之戊辰詔內外官因事受賊事覺而稱子孫僕從者禁之庚午錄囚括馬給東征軍是月駐蹕土河川冬十月名中京新建二殿曰延慶曰永安壬寅以順義軍節度使石用中爲漢人行宮都部署丙辰詔以東平郡王蕭排押爲都統殿前都點檢蕭虛列爲副統東京留守耶律八哥爲都監伐高麗仍諭高麗守吏能率衆自歸者厚賞堅壁相拒者追悔無及十一月壬戌以呂德懋知吏部尙書楊又玄知詳覆院劉晟爲霸州度節使北府宰相劉慎行爲彰武軍節度使庚辰禁服用明金縷金貼金戊子幸中京十二月丁酉宋遣呂夷簡曹瑋來賀千齡節是月蕭排押等與高麗戰于茶陀二河遼軍失利天雲石皮室二軍沒溺者衆遙輦帳詳穩阿果達客省使酌古渤海詳穩高清明天雲軍詳穩海里等皆死之放進士張克恭等三十七人及第

八年春正月宋遣陳堯佐張羣來賀壬戌鐵驪來貢建景宗廟于中京封沙州節度使曹順爲燉煌郡王二月丁未以前南院樞密使韓懋爲中京留守漢人行宮都部署王繼忠南院樞密使丙辰祭風伯三月己未以契丹弘義宮使赫石爲興聖宮都部署前遙恩拈節度使控骨里積慶宮都部署左祇候郎君耶律罕四捷軍都監乙亥東平王蕭韓寧東京留守耶律八哥國舅平章事蕭排押林牙要只等討高麗

還坐失律數其罪而釋之己卯詔加征高麗有功渤海將校官壬午闕飛龍院馬癸未回跋部太師踏刺  
萬來賈丙戌置東京渤海承奉官都知押班夏四月戊子朔如緬山五月壬申以駙馬蕭克忠爲長寧軍  
節度使乙亥遷靈州渤海戶于遼土二河之間己卯曷蘇館惕隱阿不萬宰相賽刺來貢六月戊子錄征  
高麗戰歿將校子弟己丑以左夷離畢蕭解里爲西南面招討使御史大夫蕭要只爲夷離畢己亥惕隱  
耶律合萬爲南府宰相南面林牙耶律韓留爲惕隱癸卯弛大擺山猿嶺採木之禁乙巳以南皮室軍校  
等討高麗有功賜金帛有差秋七月己未征高麗戰歿諸將詔益封其妻庚申以東北路詳穩耶律獨迭  
爲北院大王辛酉着里涅哥二奚軍征高麗有功皆賜金帛癸亥詔阻卜依舊歲貢馬千七百騾四百四  
十貂鼠皮萬青鼠皮二萬五千戊辰觀稼己巳回跋部太保麻門來貢庚午觀市曲赦市中繫囚命解靈  
馬翼充賀宋生辰使副八月庚寅遣郎君曷不式等率諸部兵會大軍討高麗九月己巳以石用中參知  
政事宋遣崔遵度王應昌來賀千齡節壬申錄囚甲戌復錄囚庚辰曷蘇館惕隱阿不割來貢壬午駐蹕  
土河川冬十月乙酉詔諸道事無巨細已斷者每三月一次條奏戊子遣耶律繼崇鄭玄瓊賀宋正旦癸  
巳詔橫帳三房不得與卑小帳族爲婚凡嫁娶必奏而後行癸卯以前北院大王建福爲阿扎割只甲辰  
改東路耗里太保城爲咸州建節以領之十一月甲寅置雲州宣德縣十二月辛卯駐蹕中京乙巳以廣

平都王宗業爲中京留守大定尹韓懋爲惕隱辛亥高麗王詢遣使乞貢方物詔納之

九年春正月宋遣劉平張元普來賀二月如鴛鴦灤五月庚午耶律資忠使高麗還王詢表請稱藩納貢歸所留王人只刺里只刺里在高麗六年忠節不屈以爲林牙辛未遣使釋王詢罪並允其請癸酉以耶律宗教檢校太傅宗誨啟聖軍節度使劉晟太子太傅仍賜保節功臣秋七月庚戌朔日有食之詔以近臣代拜赦日甲寅遣使賜沙州回鶻燉煌郡王曹順衣物以查刺耿元吉韓九宋璋爲來年賀宋生辰正且使副九月戊午以駙馬蕭紹宗平章事丁卯文武百僚奉表上尊號不許表三上迺從之乙亥沙州回鶻燉煌郡王曹順遣使來貢括諸道漢民馬賜東征軍以夷裔畢延寧爲兵馬副都部署總兵東征是月駐蹕金鉞灤宋遣宋綬駱繼倫賀千齡節冬十月戊寅以涅里爲奚王都監突迭里爲北王府舍利軍詳繆郎君老使沙州還詔釋宿累國家舊使遠國多用犯徒罪而有才略者使還卽除其罪戊子西南招討奏党項部有宋犀族輸貢不時常有他意宜以時遣使督之詔曰邊鄙小族歲有常貢邊臣驕縱徵斂無度彼懷懼不能自達耳第遣清慎官將示以恩信無或侵漁自然效順復奏諦居迭烈德部言節度使韓留有惠政今當代請留上命進其治狀辛丑如中京壬寅大食國遣使進象及方物爲子册割請婚十一月丁巳以漆水郡王韓懋爲南京留守析津尹兵馬都總管己未以夷裔畢蕭孝順爲南面諸行宮都都

疊加左僕射十二月丁亥禁僧然身煉指戎子詔中京建太祖廟制度祭器皆從古制乙巳詔來年冬行大冊禮放進士張仲舉四十五人

太平元年春正月丁丑朔宋使魯宗道成吉來賀如澤河二月乙卯幸鉞河壬戌獵高祁林三月戊戌皇子勃己只生庚子駙馬都尉蕭紹業建私城賜名睦州軍曰長慶是月大食國王復遣使請婚封王子班耶君胡思里女可老爲公主嫁之夏四月戊申東京留守奏女直三十部酋長請各以其子詣闕祇候詔與其父俱來受約乙卯錄囚丁卯置萊州是月清暑緬山秋七月甲戌朔賜從獵女直人秋衣乙亥遣骨里取石晉所上玉璽于中京阻卜來貢辛巳如沙嶺是月獵潢河九月幸中京冬十月丁未敵烈酋長頗白來貢馬馳戊申錄囚甲子宋使李懿王仲賓來賀千齡節及蘇惟甫周鼎賀來歲元正卽遣蕭善程蕭報聘党項長曷魯來貢己未以薩敏解里爲都點檢高六副點檢耶律羅漢奴左皮室詳穩噪姑右皮室詳穩聊了西北路金吾耶律僧隱御史大夫求哥駙馬都尉蕭春骨里並大將軍庚申幸通天觀觀魚龍曼衍之戲翌日再幸還升玉輅自內三門入萬壽殿奠酒七廟御容因宴宗室十一月癸未上御昭慶殿文武百僚奉冊上尊號曰睿文英武遵道至德崇仁廣孝功成治定昭聖神贊天輔皇帝大赦改元太平中外官進級有差宋遣使來聘夏高麗遣使來貢甲申冊皇子梁王宗真爲皇太子



二年春正月如納水釣魚二月辛丑朔躡魚兒灤三月甲戌如長春州丁丑宋使薛貽廓來告宋主恆  
殂子禎嗣位遣都點檢耶律僧隱等充宋祭奠使副林牙蕭日新觀察馮延休充宋后弔慰使副戊寅遣  
金吾耶律諧領引進姚居信充宋主弔慰使副戊子爲宋主飯三京僧是月地震雲應二州屋摧地陷隗  
白山裂數百步泉湧成流夏四月如緬山清暑五月乙亥朔參知政事石用中薨庚辰鐵驪遣使獻兀惹  
十六戶六月乙未宋遣使薛由等來饋其先帝遺物秋七月己卯以耶律信寧爲奉陵軍節度使高麗國  
參知政事王同顯靜海軍節度使耶律遂忠長寧軍節度使耿延毅昭德軍節度使高守貞河西軍節度  
使九月癸巳遣尙書僧隱韓格賀宋主卽位壬寅遣堂後官張克恭充賀夏國王李德昭生日使耶律掃  
古韓王充賀宋太后生日使副耶律仙靈史克忠充賀宋正旦使副是月駐蹕胡魯古思浞冬十月癸卯  
朔賜宰臣呂德懋參知政事吳叔達樞密副使楊又玄右丞相馬保忠錢物有差辛亥至上京曲赦畿內  
四十一月丙戌宋遣使來謝十二月辛丑高麗王詢薨其子欽遣使來報卽命使冊欽爲高麗國王甲寅  
宋遣劉燿郭志言來賀千齡節是年放進士張漸等四十七人

三年春正月丙寅朔如納水釣魚以僧隱爲平章事乙亥以蕭臺德爲南王府都監林牙耶律信寧西北  
路招討都監辛巳賜越國公主私城之名曰懿州軍曰慶懿二月丙申以丁振爲武信軍節度使改封蘭



陵郡王戊申以東平郡王蕭排押爲西南面都招討進封國王夏四月以耶律守靈爲都點檢五月清暑  
緬山六月戊申以南院宣徽使劉涇參知政事蕭孝惠爲副點檢蕭孝恭東京統軍兼沿邊巡檢使戊午  
以蕭璉爲左夷離畢蕭琳爲詳穩秋七月戊寅以南府宰相耶律合葛爲上京留守封漆水郡王丙戌以  
皇后生辰爲順天節丁亥賜緬山名曰永安是月獵赤山閏月壬辰以蕭伯達韓紹雍充賀宋正旦使副  
唐骨德程昭文賀宋生辰使副冬十月庚辰宋遣薛奎郭盛來賀順天節王臻慕容惟素賀千齡節東征  
軍奏統帥諧領常袞課奴率師自毛母國嶺入林牙高九裨將大匡逸等率師鼓山嶺入閏月未至薊離  
河不遇敵而還以是月會於弘怕只嶺馳馬死者甚衆駐蹕遼河十一月辛卯朔以皇姪宗範爲歸德軍  
節度使北府宰相蕭孝穆南京留守封燕王南京留守韓懋南院大王兵馬都總管仇正燕京轉運使十  
二月壬戌以宗範爲平章事封三韓郡王仇道衡中京副留守馮延休順州刺史郎玄化西山轉運使趙  
其樞密直學士丁卯以蕭承爲太子太師己卯封皇子重元秦國王

四年春正月庚寅朔宋遣張傳張士禹程琳丁保衡來賀如鴨子河二月己未獵撻魯河詔改鴨子河曰  
混同江撻魯河曰長春河三月戊子千齡節詔賜諸宮分耆老食夏四月癸酉以右丞相馬保忠之子世  
弘使嶺表至平地松林爲盜所殺特贈昭信軍節度使五月清暑永安山己未南院大王韓懋薨戊辰以

鄧弘節爲兵部郎中劉慎行順義軍節度使辛未以燕王蕭孝穆子順爲千牛衛將軍甲戌以中山郡王查哥爲保靜軍節度使樂安郡王遂哥廣德軍節度使蕭解里彰德軍節度使庚辰以遼興軍節度使周王胡都古爲臨海軍節度使漆水郡王敵烈南院大王秋七月如秋山八月丙辰以韓紹芳爲樞密直學士駙馬蕭匹敵都點檢九月以駙馬蕭紹宗爲武定軍節度使耶律宗福安國軍節度使冬十月駐蹕遼河宋遣蔡齊李用和來賀千齡節十一月追封南院大王韓愨爲陳王十二月以蕭從政爲歸義軍節度使康筠監門衛充賀宋正旦使副是年放進士李烱等四十七人

元 中 書 右 丞 相 總 裁 脫 脫 等 修

本紀第十七

聖宗八

五年春正月乙酉如混同江二月戊午禁天下服用明金及金線綺國親當服者奏而後用是月如魚兒  
灤三月壬辰以左丞相張儉爲武定軍節度使同政事門下平章事鄭弘節臨潢少尹劉慎行遼興軍節  
度使武定軍節度使蕭匹敵契丹行宮都部署樞密副使楊又玄吏部尙書叅知政事兼樞密使是月如  
長春河魚兒灤其水一夕有聲如雷越沙岡四十里別爲一陂夏五月清暑永安山以蕭從順爲太子太  
師吳叔達翰林學士道士馮若谷加太子中允耶律晟武定軍節度使張儉彰信軍節度使呂士宗禮部  
員外郎李可舉順義軍節度使秋七月獵平地松林九月駐蹕南京己亥以蕭迪烈李紹琪充賀宋太后  
生辰使副耶律守盜劉四端充賀宋主生辰使副冬十月辛未宋太后遣馮元宗史方來賀順天節十一  
月庚子幸內果園宴京民聚觀求進士得七十二人命賦詩第其工拙以張昱等一十四人爲太子校書  
郎韓欒等五十八人爲崇文館校書郎辛丑以左祗候郎君詳穩蕭羅羅爲右夷高畢十二月丁巳以漢

人行宮都部署蕭孝先爲上京留守皇姪長沙郡王謝家奴匡義軍節度使耶律仁舉與國軍節度使甲子蕭守寧爲點檢侍衛親軍馬步軍乙丑北院樞密使蕭合車薨十二月戊辰以北府宰相蕭普古爲北院樞密使己巳遣蕭諧李琪充賀宋正旦使副庚午以叅知政事劉京爲順義軍節度使乙亥宋使李維張綸來賀于齡節是歲燕民以年穀豐熟車駕臨幸爭以土物來獻上禮高年惠鰥寡賜醪飲至夕六街燈火如晝士庶嬉遊上亦微行觀之丁丑禁工匠不得銷毀金銀器

六年春正月己卯朔宋遣徐奭裴繼起張若谷崔準來賀庚辰如鴛鴦灘二月己酉以逃離己同知樞密院黃勳爲兵馬都部署達骨只副之赫石爲都監引軍城混同江疎木河之間黃龍府請建堡障三烽臺十詔以農贖築之東京留守入哥奏黃勳領兵入女直界狇地俘獲人馬牛豕不可勝計得降戶二百七十詔獎諭之戊午以耶律野爲副點檢以國舅帳蕭柳氏徒魯骨領西北路十二班軍奚王府舍利軍己巳南京水遣使振之庚午詔党項別部塌西設契丹節度使治之三月戊寅以大同軍節度使張儉入爲南院樞密使左丞相兼政事令叅知政事吳叔達責授將作少監出爲東州刺史是月阻卜來侵西北路招討使蕭惠破之夏四月丁未朔以武定軍節度使耶律漢古爲惕隱戊申蒲盧毛朶部多兀惹戶詔索之內實如永安山五月辛卯以東京統軍使蕭德古爲契丹行宮都部署癸卯遣西北路招討使蕭惠將

兵伐甘州回鶻六月辛丑詔凡官齎並印其左以讖之秋七月戊申獵黑嶺八月蕭惠攻甘州不克師還自是阻卜諸部皆叛遼軍與戰皆爲所敗監軍涅里姑國舅帳太保曷不呂死之詔遣惕隱耶律洪古林牙化哥等將兵討之九月駐蹕遼河濟冬十月丙子曷蘇館諸部長來朝庚辰遣使問夏國五月與宋交戰之故辛巳以前南院大王直魯衰爲烏古敵烈都詳穩庚寅以蕭孝順蕭紹宗兼侍中駙馬蕭紹業平章政事前南院大王胡覲董同知上京留守安哥通化州節度使乙丑宋遣韓翼田承說求賀順天節十一月戊辰西北路招討司小校掃姑訴招討蕭惠三罪詔都監奧骨禎按之十二月庚辰曷蘇館部乞建旗數許之辛巳詔北面諸部廉察州縣及石烈彌里之官不治者罷之詔大小職官有貪暴殘民者立罷之終身不錄其不廉直雖處重任卽代之能清勤自持者在卑位亦當薦拔其內族受賂事發與常人所犯同科戊戌遣杜防蕭蘊充賀宋生辰使副庚子駐蹕遼河

七年春正月壬寅朔宋遣張保維孫繼業孔道輔馬崇至來賀如混同江辛亥以女直白糲爲惕隱蒲馬爲巖母部太師甲寅蒲盧毛朶部遣使來貢夏四月乙未獵黑嶺五月清暑永安山西南路招討司奏陰山中產金銀請置冶從之復遣使循遼河源求產金銀之所六月禁諸屯田不得擅貨官粟癸巳詔蕭惠再討阻卜秋七月己亥朔詔更定法令庚子詔諭駙馬蕭鈕不公主粘米衰爾於后有父母之尊后或臨



幸祇謁先祖祗拜空帳失致敬之禮今後可設像拜謁乙巳詔轡路所經旁三十步內不得耕種書不在  
訴訟之限九月駐蹕遼河冬十月丁卯朔詔諸帳院庶孽並從其母論貴賤十一月宋遣石中立石貽孫  
來賀千齡節王博文王雙賀順天節辛亥以楊又玄邢祥知貢舉乙未匡義軍節度使中山郡王查萬保  
靈軍節度使長沙郡王謝家奴廣德軍節度使樂安郡王遂哥奏各將之官乞選伴讀書史從之癸亥以  
三韓王欽爲啟聖軍節度使楊佶刑部侍郎甲子以左千衛上將軍耶律古昱爲北院大王十二月丁卯  
遣耶律遂英王永錫充賀宋太后生辰蕭速撒馬保永充賀正旦使副癸酉以金吾蕭高大爲奚舍利軍  
詳繼

八年春正月己亥如混同江庚申党項侵邊破之甲子詔州縣長吏勸農二月戊子燕京留守蕭季穆乞  
于拒馬河接宋境上置戍長巡察詔從之三月駐蹕長春河夏五月清暑永安山六月以韓盩劉湘充賀  
宋太后生辰使副吳克荷充賀夏國王李德昭生辰使癸巳權北院大王耶律鄭留奏今歲十一月皇太  
子納妃諸族備會親之帳詔以豪盛者三十戶給其費秋七月丁酉以遙轡帳郎君陳哥爲西北路巡檢  
與蕭詣領同管二招討地以南院大王耶律敵烈爲上京留守戊戌獵平地松林九月壬辰朔以渤海宰  
相羅漢權東京統軍使壬子幸中京北敵烈部節度使耶律延壽請視諸部賜旗鼓詔從之癸丑阻卜別



部長胡懷來降乙卯阻卜長春古來降冬十月宋遣唐肅萬懷感來賀順天節樞密使魏王耶律斜軫孫婦阿賻指斥乘輿其孫骨欲爲之隱事覺乃並坐之仍籍其家詔燕城將士若敵至總管備城之東南統軍守其西北馬步軍備其野戰統軍副使繕壁壘課士卒各練其事十一月丙申皇太子納妃蕭氏以耶律求翰爲北院大王冬十二月辛酉朔以遙輦太尉謝佛留爲天雲軍詳穩壬申以前北院大王耶律留寧爲雙州節度使康筠崇德宮都部署謝十永興宮都部署旅墳宜州節度使闕菴遼州節度使耶律野同知中京留守耶律曷魯突媿爲大將軍丁丑詔庶孽雖已爲良不得預世選丁亥宋遣寇瑊康德來賀千齡節宋諫曹英張逸劉永釗賀來歲兩宮正旦詔兩國舅及南北王府乃國之貴族賤庶不得任本部官是歲放進士張宥等五十七人

九年春正月至自中京二月戊辰遣使賜高麗王欽物如幹漂河夏五月清暑永安山六月戊子以長沙郡王謝家奴爲廣德軍節度使樂安郡王遂哥匡義軍節度使中山郡王查葛保定軍節度使進封潞王豫章王貼不長寧軍節度使以耶律思忠耶律荷耶律嵩遙輦謝佛留陳邈韓紹一韓知白張震充賀宋兩宮生辰及來歲正旦秋七月戊午朔如黑嶺八月己丑東京舍利軍詳穩大延琳囚留守駙馬都尉蕭孝先及南陽公主殺戶部使韓紹勳副使王嘉四捷軍都指揮使蕭頗得延琳遂僭位號其國爲興遼年

爲天慶初東遼之地自神册來附未有權酤鹽麪之法關市之征亦甚寬弛馮延休韓紹勳相繼以燕地  
平山之法繩之民不堪命燕又仍歲大饑戶部劄使王嘉復獻計造船使其民諳海事者潛粟以賑燕民  
水路艱險多至覆沒雖言不信鞭楚榜掠民怨思亂故延琳乘之首殺紹勳嘉以快其衆延琳先事與副  
留守王道平謀道平夜棄其家踰城走與延琳所遣召黃龍府黃翮者俱至行在告變上卽徵諸道兵以  
時進討時國舅詳穩蕭匹敵治近延琳先率本管及家兵據其要害絕其西渡之計渤海太保夏行美亦  
舊主兵戍保州延琳密馳書使圖統帥耶律蒲古行美乃以實告蒲古得書遂殺渤海兵八百人而斷其  
東路延琳知黃龍保州皆不附遂分兵西取瀋州其節度使蕭王六初至其副張傑聲言欲降故不急攻  
及知其詐而已有備攻之不克而還時南北女直皆從延琳高麗亦稽其貢及諸道兵次第皆至延琳嬰  
城固守冬十月丙戌朔以南京留守燕王蕭孝穆爲都統國舅詳穩蕭匹敵爲副統奚六部大王蕭蒲奴  
爲都監以討之十一月乙卯朔如顯陵丙寅以瀋州節度副使張傑爲節度使其皇城進士張人紀趙陸  
等二十二人入朝試以詩賦皆賜第超授保州戍將夏行美平章事壬申以駙馬劉四端權知宣徽南院  
事十二月丁未宋遣仇永韓永錫來賀千齡節命耶律育吳克荷蕭可觀趙利用充賀宋生辰使副耶律  
元吉崔閔蕭昭古竇振充來歲賀宋正旦使

十年春正月己卯朔宋遣王夷簡賈處約張易張士宣來賀二月幸龍化州三月甲寅朔詳穩蕭匹敵至自遼東言都統蕭孝穆去城四面各五里許築城堡以圍之駙馬延寧與其妹穴地道去惟公主崔八在後爲守陣者覺而止夏四月如乾陵以耶律行平爲廣平軍節度使夏行美爲中順軍節度使李延弘知易州蕭從順加太子太師五月戊申清暑柏坡秋七月壬午詔來歲行貢舉法八月丙午東京賊將楊詳世密送款夜開南門納遼軍擒延琳渤海平冬十月駐蹕長寧淀十一月辛亥南京留守燕王蕭孝穆以東征將士凱還戎服見上上大加宴勞翌日以孝穆爲東平王東京留守國舅詳穩駙馬都尉蕭匹敵封蘭陵郡王奚王蒲奴加侍中以權燕京留守兼侍中蕭惠爲燕京統軍使前統軍委察大將軍節度使宰相兼樞密使馬保忠權知燕京留守奚王府都監蕭阿古軫東京統軍使詔渤海舊族有勳勞材力者叙用餘分居來隰遷閩等州十二月乙巳宋遣梅詢王令傑來賀于齡節漆水郡王耶律敵烈加尙父烏古部節度使蕭普達爲乙室部大王尙書左僕射蕭琳爲臨海軍節度使

十一年春正月己酉朔如混同江二月如長春河三月上不豫夏五月大雨水諸河橫流皆失故道六月丁丑朔蹕大福河之北己卯帝崩于行宮年六十一在位四十九年景福元年閏十月壬申上尊諡曰文武大孝宣皇帝廟號聖宗

贊曰聖宗幼冲嗣位政出慈闈及宋人二道來攻親御甲冑一舉而復燕雲破信彬再舉而躡河朔不亦偉歟既而侈心一啟佳兵不祥東有茶陵之敗西有甘州之喪此徂於常勝之過也然其踐阼四十九年理冤滯舉才行察貪殘抑奢僭錄死事之子孫振諸部之貧乏責迎合不忠之罪却高麗女樂之歸遼之諸帝在位長久令名無窮其唯聖宗乎

元 中 書 右 丞 相 總 裁 脫 脫 等 修

本紀第十八

興宗一

興宗神聖孝章皇帝諱宗真字夷不董小字只骨聖宗長子母曰欽哀皇后蕭氏上始生齊天皇后取養之幼而聰明長而魁偉龍顏日角谿達大度善騎射好儒術通音律三歲封梁王太平元年冊爲皇太子十年六月判北南院樞密使事十一年六月己卯聖宗崩卽皇帝位於柩前壬午尊母元妃蕭氏爲皇太后壬申遣使告哀于宋及夏高麗是年御宣政殿放進士劉貞等五十七人辛卯大赦改元景福乙未奉大行皇帝梓宮殯于永安山太平殿辛丑皇太后賜駙馬蕭鈕不里蕭匹敵死圍場都太師女直著骨里右祇候郎君詳穩蕭延留等七人皆藥市籍其家遷齊天皇后于上京秋七月丙午朔皇太后率皇族大歸于太平殿高麗遣使弔慰上召晉王蕭普古等飲博夜分乃罷丁未擊鞠戊申以耶律韓八爲左夷窩畢特末里爲左祇候郎君詳穩橫帳郎君樂古權右祇候郎君詳穩己酉以耶律鄭留爲于厥迪烈都詳穩高八爲右皮室詳穩庚戌賑薊州民饑癸丑詔寫大行皇帝御容甲寅錄囚以觀察姚居信爲上將軍



建慶州于慶陵之南徙民寶之充奉陵邑乙卯以比歲豐稔罷給東京統軍司糧丁巳上謁大行皇帝御容哀慟久之因詔寫北府宰相蕭孝先南府宰相蕭孝穆象于御容殿以蕭阿姑軫爲東京留守丁卯謁太平殿焚先帝所御弓矢幸晉王普古第視疾辛未錄囚壬申上謁神主帳時輿隈蕭氏始入宮亦命拜之八月壬午遷大行皇帝梓宮於菽塗殿九月戊申躬視慶陵庚戌問安于皇太后辛亥宋遣王隨曹儀致祭王隨許懷信梅詢張綸來慰兩宮范諷孫繼業賀卽位孔道輔魏昭文賀皇太后冊禮戊午焚弧矢鞍勒于菽塗殿庚申夏國遣使來慰庚午以宋使弔祭喪服臨菽塗殿甲戌遣御史中丞耶律爲司農卿張確詳穩耶律勵四方館使高維翰謝宋弔慰冬十月戊寅宰臣呂德懋薨癸未殺鉏不里黨彌勒奴觀音奴等丙戌遣工部尙書高德順崇祿卿李可封致先帝遺物于宋以右領軍衛上將軍耶律遜少府監馬憚充皇太后謝宋使右監門衛上將軍耶律元載引進使魏永充皇帝謝宋使丁酉國夏遣使來賻戊戌以蕭革趙爲果耶律郁馬保業充來歲賀宋正旦使閏月辛亥謁菽塗殿闕玄宮闕器有司請以生辰爲承壽節皇太后生辰爲應聖節從之辛酉閏新造鎧甲丁卯振黃龍府饑民十一月壬辰上率百僚奠于菽塗殿出大行皇帝服御玩好焚之縱五坊鷹鷂甲午葬文武大孝宣皇于慶陵乙未未祭天地問安皇太后丙申謁慶陵以遺物賜羣臣名其山曰慶雲殿曰望仙十二月癸丑至自慶陵皇太后聽政帝不



親庶務羣臣表請不從是歲以興平公主下嫁夏國王李德昭子元昊以元昊爲夏國公駙馬都尉

重熙元年春正月壬申朔皇太后御正殿受帝與羣臣朝宋遣任布王遵範陳琰王克善來賀乙亥宋遣  
鄭向郭遵範來賀永壽節丁丑如雪林二月大蒐三月壬申朔尙父漆水郡王敵烈復爲惕隱是春皇太  
后誣齊天皇后以罪遣人卽上京行弒后請具浴以就死許之有頃后崩夏四月乙巳清暑別輦斗秋七  
月獵平地松林以蕭達溥王英秀蕭麓張素羽充來歲賀宋正旦生辰使八月丙午駐蹕刺河源皇子洪  
基生冬十月己酉幸中京十一月己卯帝率羣臣上皇太后尊號曰法天應運仁德章聖皇太后羣臣上  
皇帝尊號曰文武仁聖昭孝皇帝大赦改元重熙癸未宋遣劉隨王德本來賀應聖節以楊佺爲翰林承  
旨丙戌夏國遣使來賀辛卯五國會長來貢夏國王李德昭薨冊其子夏國公元昊爲夏國王十二月庚  
戌宋遣胥偃王從益崔暨張懷志來賀來歲正旦又遣楊日嚴王克纂來賀永壽節以北大王耶律求翰  
同平章事是年放進士劉師貞等五十七人

二年春正月庚辰東幸乙酉夏國遣使來貢壬辰女直詳穩臺押率所部來貢宋遣曹瑛來告母后劉氏  
哀章得象安繼昌來饋母后遺物遼遣延昌宮使耶律壽寧給事中知制誥李奎充祭奠使天德軍節度  
使耶律卿寧大理卿和道亨河西軍節度使耶律嵩引進使馬世卿充兩宮弔慰使秋七月甲子朔以耶

律楚高升耶律迪王惟允充兩宮賀宋生辰使副以耶律師古劉五常充賀宋來歲正旦使副八月丁酉幸溫泉宮乙卯遣使闕諸路禾稼冬十一月甲申宋遣劉寶符忠李昭述張茂實等來謝慰奠十二月乙未宋遣丁度王繼凝來賀應聖節己酉禁夏國使沿路私市金鐵甲寅宋遣章頻李懿王冲睦張緯李紘李繼一來賀永壽節及來歲正旦庚申以北府宰相蕭孝先爲樞密使

三年春正月丁卯宋使章頻卒詔有司賻贈命近侍護喪以歸辛卯如春水二月壬辰以北院樞密使蕭普古爲東京留守戊申耶律大師奴有侍襁褓恩詔入屬籍夏四月甲寅振耶迷只部五月庚申朔清暑沿柳湖是月皇太后還政于上躬守慶陵六月己亥以蕭普古爲南院樞密使秋七月戊子朔上始親政以耶律庶徵劉六符耶律睦薄可久充賀宋來歲正旦使副壬辰如秋山冬十月己未駐蹕中會川十二月宋遣段少連杜仁贊來賀來歲正旦楊偕李守忠來賀永壽節

四年春正月庚寅如耶迷只里三月乙酉朔立皇后蕭氏夏四月甲寅朔如涼陁五月庚子清暑散水源六月癸丑朔皇子寶信奴生以耶律信昌子宗蕭袞郭揆充賀宋生辰及來歲正旦使副秋七月壬午朔獵于黑嶺九月己酉駐蹕長寧淀冬十月如王子城十一月壬午改南京總管府爲元帥府乙酉行柴册禮于白嶺大赦加尙父耶律信寧政事令耶律求翰耆宿贊翊功臣十二月癸丑詔諸軍砲弩弓劍手以

時闕習庚申宋遣鄭戩柴貽範楊日華張士禹來賀永壽節及正旦

五年春正月甲申如魚兒灤樞密使蕭延寧請改國舅乙室小功帳敝史爲將軍從之四月庚申以潞王查葛爲南府宰相崇德宮使耶律馬六爲湯隱甲子幸后弟蕭無曲第曲水泛觴賦詩丁卯頒新定條制己巳上與大臣分朋擊鞠五月甲午南幸丁未如胡土白山清暑庚申幸北院大王高十行帳拜奧賜銀絹壬戌詔修南京宮闕府署秋七月辛丑錄囚耶律把八誣其弟韓哥謀殺己有司奏當反坐臨刑其弟泣訴臣惟一兄乞貸其死上憫而從之九月癸巳獵黃花山獲熊三十六賞獵人有差冬十月丁未幸南京辛亥曲赦析津府境內囚壬子御元和殿以日射三十六熊賦幸燕詩試進士于廷賜馮立趙徽四十九人進士第以馮立爲右補闕趙徽以下皆爲太子中舍賜緋衣銀魚遂大宴御試進士自此始宋遣東郊王世文來賀永壽節甲子宰臣張儉等請幸禮部貢院歡飲至暮而罷賜物有差以耶律祥張素民耶律甫王澤充賀宋生辰正旦使副

六年春正月丁丑西幸三月戊寅以秦王蕭孝穆爲北院樞密使徙封吳王晉王蕭孝先爲南京留守夏四月獵野狐嶺閏月獵龍門縣西山五月己酉清暑炭山以耶律韓八爲北院大王蕭把哥左夷離畢王子耶律詳穩鼻姑得林牙簽北面事耶律涅哥同簽點檢司甲寅錄囚以南大王耶律信寧故匿重囚及

侍婢贓污命撻以劍脊而奪其官都監坐阿附及侍婢罪皆論死詔貸之丙辰以耶律信寧爲西南路招討使庚申出飛龍廐馬賜皇太弟重元及北南面侍臣有差癸亥以上京留守耶律胡覩哀爲南大王平章事蕭查刺寧上京留守侍中管寧行宮都部署耶律蒲奴寧烏古迪烈得都詳穩甲子以上京留守耶律洪古爲北院大王六月壬申朔以善寧爲殿前都點檢護衛太保耶律合住兼長寧宮使蕭阿刺里耶律烏魯斡耶律和尙蕭韓家奴蕭特里蕭求翰爲各宮都部署上酒酣賦詩吳國王蕭孝穆北宰相蕭八撒等皆屬和夜中乃罷己卯祀天地癸未賜南院大王耶律胡覩哀命上親爲製誥詞並賜詩以寵之丙申以北院大王侯晒爲南京統軍使秋七月辛丑朔以北南樞密院獄空賞賚有差壬寅以皇太弟重元生子賜詩及寶玩器物曲赦死罪以下癸卯如秋山八月己卯北樞密院言越棘部民苦其酋帥坤長不法多流亡詔罷越棘等五國酋帥以契丹節度使一員領之冬十月癸酉駐蹕石寶岡十一月己亥朔阻卜酋長來貢辛亥以契丹行宮都部署蕭惠爲南院樞密使壬子以管寧爲南院樞密使蕭掃古諸行宮都部署耶律裏里知南面行宮副部署蕭阿刺里左祇候郎君詳穩耶律曷主右祇候郎君詳穩庚申幸晉國公主行帳視疾封皇子洪基爲梁王十二月以楊佖爲忠順軍節度使遣耶律幹秦鑑耶律德崔繼

七年春正月戊戌朔宋遣高若訥夏元正謝絳張茂實來賀正旦及永壽節辛丑如混同江二月庚午如  
春州乙亥駐蹕東川丁丑高麗遣使來貢壬午幸五坊闕鷹鷂乙酉遣使慶州問安皇太后三月戊戌朔  
幸皇太弟重元行帳壬寅如蒲河淀辛亥夏國遣使來貢甲寅錄囚夏四月己巳以興平公主薨遣北院  
承旨耶律庶成持詔問夏國王李元昊公主生與元昊不睦沒請其故己卯獵白馬場甲申射兔新淀并  
乙未獵金山遣楊家進鹿尾茸于大安宮六月乙亥御清涼殿試進士賜邢彭年以下五十五人第秋七  
月甲辰錄囚乙巳阻卜酋長屯禿古斯來朝戊申如黑嶺九月丁未駐蹕平淀冬十月甲子朔渡遼河丙  
寅駐蹕白馬淀壬申錄囚十一月癸巳朔以耶律元方張泥韓至德蕭傳充賀宋生辰正旦使副辛丑問  
安皇太后進珍玩庚申錄囚十二月召善擊鞠者數十人于東京令與近臣角勝上臨觀之己巳以皇太  
弟重元判北南院樞密使事北府宰相撒八靈再任兼知東京留守事耶律應穩南府宰相查剌折大內  
惕隱乙室已帳蕭翰乾州節度使劉六符叅知政事王子帳冠哥王子耶君詳穩鈕窋大王平州節度使  
宰臣張克恭守司空宰臣韓紹芳加侍中惕隱耶律馬六北院宣徽使傅父耶律喜孫南府宰相癸未宋  
遣王舉正張士禹來賀永壽節甲申命日進酒于大安宮致薦慶陵丁亥錄囚非故殺者減科南面侍御  
壯骨里詐取女直貢物罪死上有吏能驗而流之



八年春正月壬辰朔宋遣韓琦王從益來賀丙申如混同江觀魚戊戌振品部庚戌弋魚于率沒里河丁巳禁朔州鬻羊于宋二月丙子駐蹕長春河夏六月乙丑詔括戶口秋七月丁巳謁慶陵致奠于望仙殿迎皇太后至顯州謁園陵還京冬十月駐蹕東京十一月甲午詔有言北院處事失平擊鍾及邀駕告者悉以奏聞戊戌朝皇太后召僧論佛法戊申皇太后行再生禮大赦己酉城長春闕十二月壬辰視吳國王蕭孝穆疾宋遣龐籍杜贊來賀永壽節

九年春正月丙辰朔上進酒于皇太后宮御正殿宋遣王拱辰彭再思來賀庚申如鴨子河二月駐蹕魚兒灤三月辛未以應聖節大赦五月乙卯朔清暑永安山六月射柳祈雨秋七月癸酉宋遣郭禎以伐夏來報遣樞密使杜防報聘丁丑如秋山冬十月癸未朔駐蹕中會川十一月甲子女直侵邊發黃龍府鐵驪軍拒之宋遣蘇伸向傅範來賀應聖節十二月庚寅以北大王府布猥帳郎君自言先世與國聯姻許置敵史命本帳蕭胡覩爲之辛卯以所得女直戶置肅州以蕭迪劉三謁耶律元方王惟吉耶律庶忠孫文昭蕭紹筠秦德昌充賀宋生辰及來歲正旦使副詔諸犯法者不得爲官吏諸職官非婚祭不得沉酗廢事有治民安邊之略者悉具以聞



元中書右丞相總裁脫脫等修

本紀第十九

興宗二

十年春正月辛亥朔宋遣梁適張從一宮弼趙日宣來賀甲子復遣吳育馮戴來賀永壽節二月庚辰朔詔蒲盧毛朶部歸曷蘇館戶之沒入者使復業甲申北樞密院言南北二王府洎諸部節度侍衛祇候郎君皆出族帳既免與民戍邊其祇候事請亦得以部曲代行詔從其請夏四月詔罷修鴨綠江浮梁及漢兵屯戍之役又以東京留守蕭撒八言弛東京擊鞠之禁六月戊寅以蕭寧耶律坦崔禹稱馬世良耶律仁先劉大符充賀生辰使副耶律庶成趙成耶律烈張旦充來歲賀宋正旦使副秋七月壬戌詔諸職官私取官物者以正盜論諸敢以先朝已斷事相告言者罪之諸帳郎君等於禁地射鹿決三百不徵償小將軍決二百以下及百姓犯者罪同郎君論八月丙戌以醫者鄧延貞治詳穩蕭留寧疾驗贈其父母官以獎之九月辛亥朝皇太后國舅留寧薨庚申皇太后射獲熊上進酒爲壽癸亥上獵馬孟山草木蒙密患獵者誤射傷人命耶律迪姑各書姓名于矢以志之丙寅夏國獻宋俘以石硬若太保郭三避虎不

射免官冬十月丙戌詔東京留守蕭孝忠察官吏有廉幹清彊者具以名聞庚寅以女直太師臺押爲曷蘇館都大王辛卯以皇子胡盧幹里生北宰相駙馬撒八監迎上至其第飲宴上命衛士與漢人角觚爲樂壬辰復飲皇太后殿以皇子生肆赦夕復引公主駙馬及內族大臣入寢殿劇飲甲午幸中京庚子以駙馬都尉蕭忽列爲國舅詳穩十一月丙辰回鶻遣使來貢十二月丙子朔宋遣劉沆王整來賀應聖節乙未置撻朮不姑酋長以胡撻刺爲平章事上聞宋設關河治壕塹恐爲邊患與南北樞密吳國王蕭孝穆趙國王蕭貫窻謀取宋舊割關南十縣地遂遣蕭英劉六符使宋庚寅宋遣張沔侯宗彥薛申侍其潛施昌言潘永照來賀永壽節及來歲正旦以宣政殿學士楊佺爲吏部尙書判順度軍節度使事丁酉議伐宋詔諭諸道

十一年春正月戊申奉迎皇太后于內殿庚戌遣南院宣徽使蕭特末翰林學士劉六符使宋取晉陽及瓦橋以南十縣地且問興師伐夏及沿邊疏濬水澤增益兵戍之故二月壬寅如駕鸞濼四月甲戌朔頒南征賞罰令六月乙亥宋遣富弼張茂實奉書來聘以書答之壬午御含涼殿放進士王寶等六十四人禁鈔銀鬻入宋秋七月壬寅朔詔盜易官馬者減死論外路官勸瘁正直者考滿代不治事者卽易之八月丙申宋復遣富弼張茂實奉書來聘乞增歲幣銀絹以書答之九月壬寅遣北院樞密副使耶律仁先

漢人行宮副部署劉六符使宋約和是時富弼爲上言大意謂遼與宋和坐獲歲幣則利在國家臣下無  
與與宋交兵則利在臣下害在國家上感其言和好始定閏月癸未耶律仁先遣人報宋歲增銀絹十萬  
兩匹文書稱貢送至白溝帝喜宴羣臣于昭慶殿是日振恤三父族之貧者辛卯仁先劉六符還進宋國  
誓書冬十一月丁亥羣臣加上尊號曰聰文聖武英略神功睿哲仁孝皇帝册皇后蕭氏曰貞懿宣慈崇  
聖皇后大赦梁王洪基進封燕國王十二月癸卯朝皇太后甲辰封皇太弟重元子涅魯古爲安定郡王  
己酉以宣獻皇后忌日上與皇太后素服飯僧于延壽憫忠三學三寺辛亥詔蠲預備伐宋諸部租稅一  
年壬子以吐渾党項多鬻馬夏國詔謹邊防己未宋遣賀正旦及承壽節使居邸帝微服往觀丁卯禁喪  
葬殺牛馬及藏珍寶

十二年春正月辛未遣同知析津府事耶律敵烈樞密院都承旨正惟吉諭夏國與宋和壬申以吳國王  
蕭孝穆爲南院樞密使北府宰相蕭孝忠北院樞密使封楚王韓國王蕭惠北府宰相同知元帥府事韓  
八南院大王耶律遼晒東京留守北院樞密副使耶律仁先同知東京留守東北面林牙蕭革北院樞密  
副使甲戌如武清寨葦淀二月壬寅禁關南漢民弓矢己酉夏國以加上尊號遣使來賀甲寅耶律敵烈  
等使夏國還奏元昊罷兵卽遣使報宋三月辛卯幸南京壬辰高麗國以加上尊號遣使來賀夏四月己

亥置回跋部詳穩都監庚子夏國遣使進馬馳五月辛卯韓魯蒲盧毛朶部二使來貢失期宥而遣還乙未詔復定禮制是月幸山西六月丙午詔世選宰相節度使族屬及身為節度使之家許葬用銀器仍禁殺牲以祭庚戌詔漢人宮分戶絕恆產以親族繼之辛亥阻卜大王屯禿古斯弟太尉撒葛里來朝丙辰回鶻遣使來貢甲子以南院樞密使吳國王蕭孝穆為北院樞密使徙封齊國王秋七月丙寅朔北院樞密使蕭孝忠薨特釋繫囚庚寅夏國遣使上表請伐宋不從八月丙申謁慶陵辛丑燕國王洪基加尙書令知北南院樞密使事進封燕趙國王戊午以前西北路招討使蕭塔烈葛為右夷裔畢庚申于越耶律洪古薨甲子阻卜來貢九月壬申朝皇太后謁望仙殿壬午謁懷陵冬十月丁酉駐蹕中會川己亥北院樞密使蕭孝穆薨追贈大丞相晉國王庚子詔諸路上重囚遣官詳讞辛亥叅知政事韓紹芳為廣德軍節度使三司使劉六符長寧軍節度使壬子以夏人侵党項遣延昌宮使高家奴讓之甲子北府宰相蕭惠為北院樞密使幽王遂哥為惕隱惕隱敵魯古封漆水郡王西北路招討使樞密副使蕭阿剌同知北院宣徽事出飛龍廐馬分賜羣臣十一月丁丑追封楚王蕭孝忠為楚國王丁亥以上京歲儉復其民租稅癸巳朝皇太后十二月戊申改政事省為中書省

十三年春正月甲子朔朝皇太后戊辰如混同江辛未嶽兀營館岡二月庚戌如魚兒濼丙辰以叅知政

事杜防爲南府宰相三月丁亥高麗遣使來貢以宣正殿學士楊佶叅知政事是月置契丹營巡院夏四月己酉遣東京留守耶律侯晒知黃龍府事耶律歐里斯將兵攻蒲盧毛朶部甲寅南院大王耶律高十奏党項等部叛附夏國丙辰西南面招討都監羅漢奴詳穩韓魯母等奏山西郡族節度使屈烈以五部叛入西夏乞南北府兵援送寶威塞州戶詔富者遣行餘留屯田天德軍五月壬戌朔羅漢奴奏所發部兵與党項戰不利招討使蕭普達四捷軍詳穩張佛奴歿于陣李元昊來援叛黨戊辰詔徵諸道兵會西南邊以討元昊六月甲午阻卜酋長烏入遣其子執元昊所遣來援使窻昌改來乞以兵助戰從之駐蹕永安山以將伐夏遣延昌宮使耶律高家奴告宋丙申詔前南院大王耶律谷欲翰林都林牙耶律庶成等編集國朝上世以來事蹟丙午高麗遣使來貢丁未錄囚秋七月辛酉香河縣民李宜兒以左道惑眾伏誅庚午行再生禮庚辰夏國遣使來朝八月乙未以夏使對不以情羈之丁巳夏國復遣使來詢以事宜又不以實對答之九月戊辰宋以親征夏國遣余靖致禮壬申會大軍于九十九泉以皇太弟重元北院樞密使韓國王蕭惠將先鋒兵西征冬十月庚寅祭天地丙申獲党項偵人射鬼箭丁酉李元昊上表謝罪己亥元昊遣使來奏欲收叛黨以獻從之辛亥元昊遣使來進方物詔北院樞密副使蕭革逐之壬子軍于河曲革言元昊親率党項三部來詔革詰其納叛背盟元昊伏罪賜酒許以自新遣之召羣臣



議皆以大軍既集宜加討伐癸丑督數路兵掩襲殺數千人駙馬都尉蕭胡觀爲夏人所執丁巳元昊遣使以先被執者來歸詔所留夏使亦還其國十一月辛酉賜有功將校有差甲子班師丁卯改雲州爲西京辛酉朝皇太后十二月己丑幸西京戊戌以北院樞密副使耶律敵烈爲右夷離畢己亥高麗遣使來貢戊申蕭胡觀自夏來歸

十四年春正月庚申以侍中蕭虛烈爲南院統軍使封遼西郡王庚午如駕鶯鶯壬午以金吾衛大將軍敵魯古爲乙室大王甲申夏國遣使進鶻以常侍幹古得戰歿命其子習羅爲帥二月庚子朝皇太后駐蹕撒刺濼三月己卯宋以伐夏師還遣使來賀辛亥高麗遣使來貢閏五月癸丑清暑永安山丁卯謁慶陵己卯阻卜大王屯禿古斯率諸酋長來朝庚辰夏國遣使來貢辛亥以西南面招討使蕭普達戰歿贈同中書門下平章事秋七月戊申駐蹕中會川冬十月甲子望祀木葉山十一月壬午朔回鶻阿薩蘭遣使來貢甲辰以同知北院宣徽事蕭阿剌爲北府宰相十二月癸丑觀漢軍習砲射擊刺癸亥決滯獄十五年春正月乙酉如混同江禁契丹以奴婢鬻與漢人二月乙卯如長春河丙寅蒲盧毛朶界曷懶河戶來附詔撫之三月甲申朝皇太后乙酉以應聖節減死罪釋徒以下辛卯朝皇太后丁酉高麗遣使來貢詔諸道歲具獄訟以聞夏四月辛亥蔡五京吏民擊鞠戊午罷遙輦帳戍軍壬戌以北女直詳穩蕭高

大爲奚六部大王甲子清暑永安山甲戌蒲盧毛朶曷懶河百八十戶來附六月癸丑以西京留守耶律馬六爲漢人行宮都部署叅知政事楊佶出爲武定軍節度使戊辰御清涼殿放進士王棠等六十八人甲戌西北路招討使耶律敵魯古坐贓免官秋七月乙酉幽王遂哥薨戊子觀穫乙未以北院宣徽使族墳爲左夷离畢前南府宰相耶律喜孫東北路詳穩丙申籍諸路軍丁酉如秋山辛丑禁扈從踐民田丁未以女直部長遽母率衆來附加太師八月癸丑高麗王欽薨遣使來告九月甲辰禁以置網捕狐兔冬十月己酉駐蹕中會川十一月丁亥以南院樞密使蕭孝友爲北府宰相契丹行宮都部署耶律仁先南院大王北府宰相蕭革同知北院樞密使事知夷离畢事耶律信先漢人行宮都部署左夷离畢族墳湯隱漢人行宮都部署耶律敵烈左夷离畢己亥渤海部以契丹戶例通括軍馬乙巳賑南京貧民十二月壬申曲赦徒以下罪是日爲聖宗在時生辰

通史卷十九

元中書右丞相總裁脫脫等修

本紀第二十

興宗三

十六年春正月己卯如混同江二月庚申如魚兒濼辛酉禁羣臣遇宴樂奏請私事詔世邁之官從各部耆舊擇材能者用之三月丁亥如黑水濼癸巳遣使審決雙州囚壬寅大雪夏四月乙巳朔皇太后不豫上馳往視疾丙午皇太后愈復如黑水濼丁卯肆赦六月戊申清暑永安山丁巳阻卜大王屯禿古斯來朝獻方物戊午詔士庶言事秋七月辛卯幸慶州自是月至九月日射獵于楚不溝霞列繫輪石塔諸山冬十月辛亥幸中京謁祖廟丙辰定公主行婦禮於舅姑儀庚午鐵驪仙門來朝以始入貢加右監門衛大將軍十一月戊寅祠太葉山己丑幸中京朝皇太后壬辰禁漏泄宮中事十二月辛丑朔女直遣使來貢辛亥謁太祖廟觀太宗收晉圖癸丑問安皇太后乙卯以太后愈雜犯死罪減一等論徒以下免庚申南府宰相杜防韓紹榮奏事有誤各以大杖決之出防爲武定軍節度使壬戌高麗遣使來貢十七年春正月丁亥如春水閏月癸丑射虎于候里吉二月辛巳振瑤穩嚙穩部是月詔士庶言國家利

便不得及已事奴婢所見許白其主不得自陳夏國王李元昊薨其子諒祚遣使來告卽遣永興宮使耶律裏里右護衛太保耶律興老將作少監王全慰奠三月癸卯以同知南京留守事蕭塔烈葛爲左夷宮畢知右夷宮畢事唐古爲右夷宮畢丙午夏國李諒祚遣使上其父元昊遺物丁卯鐵不得國使來乞以本部軍助攻夏國不許夏四月辛未武定軍節度使杜防復爲南府宰相丙子高麗遣使來貢甲申蒲盧毛朶部大王蒲鞏以造舟人來獻六月庚辰阻卜獻馬馳二萬辛卯長白山太師柴葛回跋部太師撒刺都來貢方物秋七月丁未于越摩梅欲之子不葛一及婆離人部夷窩鞏虎猷等內附甲寅錄囚減雜犯死罪八月丙戌復南京貧戶租稅戊子以殿前都點檢耶律義先爲行軍都部署中順軍節度使夏行美副部署東北面詳穩耶律朮者爲監軍伐蒲奴里酋陶得里冬十月甲申南院大王耶律韓八薨甲午駐蹕獨盧金十一月乙未朔遣使括馬丁巳賜皇太弟重元金券封皇子和魯斡爲越王阿璉許王忠順軍節度使謝家奴陳王西京留守貼不漢王惕隱旅壇遼西郡王行宮都部署別古得柳城郡王奉陵軍節度使侯古饒樂郡王安定郡王涅魯古進封楚王

十八年春正月甲午朔日有食之戊戌留夏國賀正使不遣己亥遣北院樞密副使蕭惟信以伐夏告宋

辛丑錄囚丙午如鴛鴦濼丙辰獵霸特山耶律義先奏蒲奴里捷二月庚辰幸燕趙國王洪基帳觀疾乙



西耶律義先等執陶得里以獻三月乙巳高昌國遣使來貢壬子以洪基疾愈赦雜犯死罪以下丁巳烏古遣使送款夏四月癸酉以南府宰相耶律高十爲南京統軍使五月甲辰五國會長各率其部來附庚戌回跋部長兀迭臺扎等來朝戊午五國節度使耶律仙童以降烏古叛人授左監門衛上將軍六月壬戌朔以韓國王蕭惠爲河南道行軍都統趙王蕭孝友漢王貼不副之乙丑錄囚丙寅行十二神靈禮己巳宋以遼師伐夏遣錢逸致贖禮庚辰阻卜來貢馬駝珍玩辛巳夏國使來貢留之不遣丁亥行再生禮秋七月戊戌親征八月辛酉渡河夏人遁乃還九月丁未蕭惠等爲夏人所敗冬十月北道行軍都統耶律敵魯古率阻卜諸軍至賀蘭山獲李元昊妻及其官僚家屬遇夏人三千來戰殪之烏古敵烈部都詳穩蕭慈氏奴南剋耶律幹里死焉十二月戊寅慶陵林木火己卯錄囚有弟從兄爲強盜者兄弟俱無子特原其弟

十九年春正月庚寅僧惠鑑加檢校太尉庚子耶律敵魯古復封漆水郡王諸將校及阻卜等部酋長各進爵有差贈蕭慈氏奴同中書門下平章事辛丑遣使問罪于夏國壬寅如魚兒灤二月丁亥夏將汪普猥貨乙靈紀等來攻金肅城南面林牙耶律高家奴等破之汪普被創遁去殺猥貨乙靈紀三月戊戌殿前都點檢蕭迭里得與夏戰于三角川敗之癸卯命西南招討使蕭蒲奴北院大王宜新林牙蕭撒抹等

帥師伐夏以行宮都部署別古得監戰甲辰遣同知北院樞密使蕭革按軍邊城以爲聲援己酉駐蹕息  
雞淀丙辰幸殿前都點檢蕭迭里得駙馬都尉蕭胡覲帳視疾夏四月丙寅如魚兒濼壬申蒲盧毛朶部  
惕隱信篤來貢甲申高麗遣使來貢五月己丑如涼陘癸巳蕭蒲奴等入夏境不與敵遇縱軍俘掠而還  
丁酉夏國注普來降己亥遠夷拔思母部遣使來貢六月丙辰朔置倒塌嶺都監丙寅謁慶陵庚午幸慶  
州謁太安殿壬申詔醫卜屠販奴隸及倍父母或犯事逃亡者不得舉進士回跋曷蘇館蒲盧毛朶部各  
遣使貢馬甲戌宋遣使來賀伐夏捷高麗使俱至辛巳御金鑾殿試進士秋七月壬辰駐蹕括里蒲魯癸  
巳以燕趙國王洪基領北南樞密院乙未阻卜長豁得刺弟斡得來朝加太尉遣之戊戌錄囚戊申以左  
夷离畢蕭唐古爲北院樞密副使壬子獵侯里吉八月丁卯阻卜酋長喘只葛拔里斯來朝九月壬寅夏  
人侵邊敵魯古遣六院軍將海里擊敗之冬十月庚午還上京辛未夏國王李諒祚母遣使乞依舊稱藩  
使還詔諭別遣信臣詣闕當徐思之壬申釋臨潢府役徒甲戌如中會川十一月甲午阻卜酋長豁得刺  
遣使來貢庚戌錄囚壬子出南府宰相韓知白爲武定軍節度使樞密副使楊績長寧軍節度使翰林學  
士王綱澤州刺史張宥徽州刺史知制誥周白海北州刺史閏月乙卯以漢王貼不爲中京留守辛未以  
同知北院樞密使蕭革爲南院樞密使南院大王耶律仁先知北院樞密使事封宋王十二月丁亥北

府宰相趙王蕭孝友出爲東京留守東京留守蕭塔列葛爲北府宰相南院樞密使潞王查葛爲南院大王庚戌韓國王蕭惠徙封魏王致仕壬子夏國李諒祚遣使上表乞依舊臣屬

二十年春正月戊戌駐蹕混同江二月甲申遣前北院都監蕭友括等使夏國索党項叛戶己丑如蒼耳灤甲辰吐蕃遣使來貢三月壬子朔幸黑水夏五月癸丑蕭友括等使夏還李諒祚母表乞如党項權進馬騾牛羊等物己巳夏國遣使求唐隆鎮及乞罷所建城邑以詔荅之六月丙戌詔以所獲李元昊妻及前後所俘夏人安置蘇州以伐夏所獲物遣使遺宋秋七月如秋山九月詔更定條制駐蹕中會川冬十月己卯朔括諸道軍籍十一月庚申以惕隱都監蕭謨魯爲左夷畢甲子命東京留守司總領戶部內省事丁卯罷中丞記錄職官過犯令承旨總之十二月乙酉以皇太后行再生禮肆赦

二十一年春正月辛亥如混同江二月如魚兒灤夏四月癸未以國舅詳穩蕭阿剌爲西北路招討使封西平郡王六月丙子駐蹕永安山秋七月甲辰朔召北府宰相蕭塔烈葛南府宰相漢王貼不南院樞密使蕭革知北院樞密使事仁先等賜坐論古今治道戊申祀天地己酉詔北南樞密院日再奏事壬子追尊太祖之祖爲簡獻皇帝廟號玄祖祖妣爲簡獻皇后太祖之考爲宣簡皇帝廟號德祖妣爲宣簡皇后追封太祖伯父夷離葦巖木爲蜀國王于越釋魯爲隋國王以燕趙國王洪基爲天下兵馬大元帥知惕

隱事賜詔諭之癸亥近侍小底盧寶僞學御晝免死配役終身甲子如秋山戊辰謁慶陵以南院樞密使蕭革爲北院樞密使封吳王辛未如慶州壬申追封太祖弟寅底石爲許國王八月戊子太尉烏著薨詔配享聖宗廟九月乙卯平州進白兔己未謁懷陵庚申追上嗣聖皇帝天順皇帝尊諡及更諡彰德皇后曰靖安癸亥諡齊天皇后曰仁德皇后甲子謁祖陵增太祖諡大聖大明神烈天皇帝更諡貞烈皇后曰瀋欽恭順皇帝曰章蕭后蕭氏諡曰和敬冬十月戊寅駐蹕中會川丁亥夏國李諒祚遣使乞弛邊備卽遣蕭友括奉詔諭之戊子幸顯懿二州甲午遼興軍節度使蕭虛烈封鄭王南院大王潞王查葛爲南院樞密使進封越國王戊戌射虎于南撒葛栢辛丑謁乾陵十一月壬寅朔增諡文獻皇帝爲文獻欽義皇帝及諡二后曰端順曰柔貞復更諡世宗孝烈皇后爲懷節丁未增孝成皇帝諡曰孝成康靖皇帝更諡聖神宣獻皇后爲睿智甲子次中會川回鶻阿薩蘭遣使貢名馬文豹丙寅錄囚十二月戊戌以北府宰相塔烈葛爲南京統軍使鄭王虛烈北府宰相契丹行宮都部署耶律義先惕隱釋役徒限年者

二十二年春正月乙巳如混同江二月丙子回鶻阿薩蘭爲隣國所侵遣使求援庚辰如春水三月癸亥

李諒祚以賜詔許降遣使來謝丙寅如黑水濼夏四月戊子獵鶴泥五月壬寅詔內地州縣植果六月壬

申駐蹕胡呂山癸未高麗遣使來貢秋七月己酉阻卜大王屯禿古斯率諸部長獻馬馳庚申如黑嶺聞

月庚午烏古來貢癸巳長春州置錢帛司九月壬辰夏國李諒祚遣使進降表甲午遣南面林牙高家奴等奉詔撫諭冬十月丙申朔日有食之十一月辛卯詔諸職事官以禮受代及以罪去者置籍歲申樞密院十二月丙申朔詔回鶻部副使以契丹人充庚子應聖節曲赦徒以下罪壬子詔大臣曰朕與宋主約爲兄弟歡好歲久欲見其繪像可諭來使

二十三年春正月己巳如混同江癸酉獵雙子浞戊子夏國遣使貢方物壬辰如春水甲午獵盤直坡三月丁亥幸皇太弟重元帳夏四月癸卯高麗遣使來貢癸丑獵合只忽里五月己巳李諒祚乞進馬駟詔歲貢之庚寅駐蹕永安山壬辰夏國遣使來貢六月丙申如慶州己亥謁慶陵壬寅高麗王徽請官其子詔加檢校太尉辛亥吐蕃遣使來貢秋七月己巳夏國李諒祚遣使來求婚甲戌如秋山己卯詔八房族巾幘九月庚寅獵遇三虎縱犬獲之冬十月丁酉駐蹕中京戊戌幸新建祕書監辛丑有事于祖廟癸丑以開泰寺鑄銀佛像曲赦在京囚丙子李諒祚遣使進誓表十一月乙丑阻卜部長來貢壬申帝率羣臣上皇太后尊號曰仁慈聖善欽孝廣德安靜貞純懿和寬厚崇覺儀天皇太后大赦內外官進級有差癸未錄囚甲申羣臣上皇帝尊號曰欽天奉道祐世興祿武定文成聖神仁孝皇帝冊皇后蕭氏曰貞懿慈和文惠孝敬廣愛崇聖皇后十二月丙申如中會川



二十四年春正月癸亥如混同江戊辰朝皇太后辛巳宋遣使來賀饋馴象二月己丑朔召宋使釣魚賦詩癸巳如長春河甲寅夏國遣使來賀三月癸亥皇太弟重元生子曲赦行在及長春鎮北二州徒以下罪夏五月駐蹕南崖秋七月壬午如秋山次南崖之北峪不豫八月丁亥疾大漸召燕趙國王洪基諭以治國之要戊子大赦縱五坊鷹鷂焚釣魚之具己丑帝崩于行宮年四十遺詔燕趙國王洪基嗣位清寧元年十月庚子上尊諡爲神聖孝章皇帝廟號興宗

贊曰興宗卽位年十有大矣不能先尊母后而尊其母以致臨朝專政賊殺不辜又不能以禮幾諫使齊天死於弑逆有虧王者之孝惜哉若夫大行在殯飲酒博翰疊見簡書及其謁遺像而哀慟受宋弔而衰經所爲若出二人何爲其然歟至於感富弼之言而申南宋之好許諒祚之盟而罷西夏之兵邊鄙不聳政治內修親策進士大修條制下至士庶得陳便宜則求治之志切矣于時左右大臣曾不聞一賢之進一事之諫欲庶幾古帝王之風其可得乎雖然聖宗而下可謂賢君矣

元中書右丞相總裁脫脫等修

本紀第二十一

道宗一

道宗孝文皇帝諱洪基字涅鄰小字查剌興宗皇帝長子母曰仁懿皇后蕭氏六歲封梁王重熙十一年進封燕國總領中丞司事明年總北南院樞密使事加尙書令進封燕趙國王二十一年爲天下兵馬大元帥知惕隱事預朝政帝性沈靜嚴毅每朝興宗爲之斂容二十四年八月己丑興宗崩卽皇帝位於柩前哀慟不聽政辛卯百僚上表固請許之詔曰朕以菲德託居士民之上第恐智識有不及羣下有未信賦歛妄興賞罰不中上恩不能及下情不能達上凡爾士庶直言無諱可則擇用否則不以爲愆卿等其體朕意壬辰以皇太弟重元爲皇太叔免漢拜不名癸巳遣使報哀于宋及夏高麗甲午遣重元安撫南京軍民戊戌以遺詔命西北路招討使西平郡王蕭阿剌爲北府宰相仍權知南院樞密使事北府宰相蕭虛烈爲武定軍節度使辛丑改元清寧大赦九月戊午詔常所幸園場外毋禁庚申詔除護衛士餘不得佩刃入宮非勳戚後及夷高董副使承應諸職事人不得冠巾壬戌詔夷高董及副使之族并民奴

賤不得服。臙尼水獺裘刀柄兔鶻鞍勒。珮子不許用犀玉骨突犀。惟大將軍不禁。乙丑賜內外臣僚爵賞。有差。庚午。尊皇太后爲太皇太后。辛未。遣左夷離畢蕭謨魯翰林學士韓運。以先帝遺物。遣宋癸酉。遣使以卽位報宋丙子。尊皇后爲皇太后。宴葦塗殿。以上京留守宿國王陳留爲南京留守。壬午。遣使賜高麗夏國先帝遺物。冬十月丁亥。有司請以帝生日爲天安節。從之。以吳王仁先同知南京留守。事陳王塗。字特爲南府宰相。進封吳王。壬寅。以順義軍節度使十神奴爲南院大王。十一月甲子。葬興宗皇帝於慶陵。宋及高麗遣使來會。名其山曰永興丙寅。以南院大王侯古爲中京留守。北府宰相西平郡王蕭阿剌進封韓王。壬申。次懷州。有事於太宗穆宗廟。甲戌。謁祖陵。戊寅。冬至。有事於太祖景宗興宗廟。不受羣臣賀。十二月丙戌。詔左夷離畢曰。朕以眇冲。獲嗣大位。夙夜憂懼。恐弗克任。欲聞直言。以匡其失。今已數月。未見所以副朕委任股肱耳目之意。其令內外百官。比秩滿各言一事。仍轉諭所部。無貴賤老幼。皆得直言。無諱。戊子。應聖節。上太皇太后壽。宴羣臣。命婦冊妃蕭氏爲皇后。進封皇弟越王和魯幹爲魯國王。許王阿璉爲陳國王。楚王涅魯古徙封吳王。辛卯。詔部署院事有機密。卽奏其投謗。訕書輒受及讀者。並棄市。癸巳。皇族十公悖母伏誅。甲午。以樞密副使姚景行爲叅知政事。翰林學士吳湛爲樞密副使。叅知政事同知樞密院事韓紹文爲上京留守。丙申。宋遣歐陽修等來賀卽位。戊戌。詔設學。養士。願五經傳疏置博。

士助教各一員癸卯以知涿州楊績叅知政事兼同知樞密院事庚戌以聖宗在時生辰赦上京囚是年御清涼殿放進士張孝傑等四十四人

二年春正月丙辰詔州郡官及僚屬決囚如諸部族例己巳詔二女古部與世預宰相節度使之選者免皮室軍是月幸魚兒樂二月乙酉以左夷離畢蕭謨魯知西南面招討都監事乙巳以興宗在時生辰宴羣臣命各賦詩三月丁巳應聖節曲赦百里內囚己卯御製放鷹賦賜羣臣諭任臣之意閏月己亥始行東京所鑄錢乙巳南京獄空進留守以下官夏四月甲子詔曰方夏長養鳥獸孳育之時不得縱火於郊五月戊戌謁慶陵甲辰有事于興宗廟六月丁巳詔宰相舉才能之士戊午命有司籍軍補邊戌辛酉阻卜酋長來朝貢方物丁卯高麗遣使來貢辛未罷史官預聞朝議俾問宰相而後書乙亥中京蝗蝻爲災丙子詔強盜得實者聽諸路決之丁丑南院樞密使趙國王查葛爲上京留守同知南京留守事吳王仁先爲南院樞密使乙酉遣使分道平賦稅繕戎器勸農桑禁盜賊八月辛未如秋山九月庚子幸中京祭聖宗興宗於會安殿冬十月丙子如中會川十一月戊戌知左夷離畢事耶律劃里爲夷離畢北院大王耶律仙童知黃龍府事甲辰文武百僚上尊號曰天祐皇帝后曰懿德皇后大赦乙巳以皇太叔重元爲天下兵馬大元帥徙封趙國王查葛爲魏國王魯國王和魯幹爲宋國王陳國王阿璉爲秦國王吳王涅

魯古進封楚國王百官進遷有差十二月戊申朔以韓王蕭阿剌爲北院樞密使東京留守宿國王陳留北府宰相宋國王和魯幹上京留守秦國王阿璉知中丞司事甲寅上皇太后尊號曰慈懿仁和文惠孝敬廣愛宗天皇太后

三年春正月庚辰如鴨子河丙戌置倒塌嶺節度使乙未五國部長來貢方物二月己未如大魚灤三月辛巳以楚國王涅魯古爲武定軍節度使夏四月丙辰清暑永安山五月己亥如慶陵獻酎於金殿同天殿六月辛未以魏國王查葛爲惕隱同知樞密院事蕭唐古南府宰相魏國王貼不東京留守秋七月甲申南京地震赦其境內乙酉如秋山八月辛亥帝以君臣同志華夷同風詩進皇太后九月庚子幸中會川冬十月己酉謁祖陵庚申謁讓國皇帝及世宗廟辛酉奠酎于玉殿十一月丙子以左夷離畢蕭謨魯爲契丹行宮都部署庚子高麗遣使來貢十二月庚戌禁職官於部內假貸貿易戊辰太皇太后不豫曲赦行在五百里內囚己巳太皇太后崩

四年春正月壬申朔遣使報哀于宋夏如鴨子河釣魚癸酉宋遣使奉宋主繪像來丁亥知易州事耶律頗得秩滿部民乞留許之二月丙午詔夷離畢諸路鞫死罪獄雖具仍令別州縣覆案無寃然後決之稱寃者卽具奏庚戌如魚兒灤三月戊寅募天德鎮武東勝等處勇捷者籍爲軍甲午肆赦夏四月甲辰謁



慶陵丁卯宋遣使弔祭五月庚午朔上大行太皇太后尊諡曰欽哀皇后癸酉葬慶陵夏國高麗遣使來會乙酉如永安山清暑六月乙丑以北院樞密使鄭王蕭革爲南院樞密使徙封楚王南院樞密使吳王仁先爲北院樞密使秋七月辛巳制諸掌內藏庫官盜兩貫以上者許奴婢告壬午獵于黑嶺冬十月戊戌朔以同知東京留守事侯古爲南院大王保安軍節度使奚底爲奚六部大王十一月癸酉行再生及柴册禮宴羣臣於八方陂庚寅御清風殿受大册禮大赦以吳王仁先爲南京兵馬副元帥徙封隋王壬午謁太祖及諸帝宮丙戌祠木葉山禁造玉器十二月辛丑弛馳尼水獺裘之禁乙巳許士庶畜鷹辛亥南院樞密使楚王蕭革復爲北院樞密使閏月己巳賜皇太叔重金券是歲皇子濬生

五年春如春州夏六月甲子朔躡納萬灤己丑以南院樞密使蕭阿速爲北府宰相樞密副使耶律乙辛南院樞密使惕隱查葛遼興軍節度使魯王謝家奴武定軍節度使東京留守吳王貼不西京留守秋七月丁酉以烏古敵烈詳穩蕭謨魯爲左夷離畢冬十月壬子朔幸南京祭興宗於嘉靈殿十一月禁獵十二月壬戌以北院林牙奚馬六爲右夷離畢叅知政事吳湛以弟洵冒入仕籍削爵爲民是年上御百福殿放進士梁援等百一十五人

六年春如鴛鴦灤夏五月戊子朔監修國史耶律白請編次御製詩賦仍命白爲序己酉躡納萬灤六

月戊午朔以東北路女直詳穩高家奴爲惕隱壬戌遣使錄囚丙寅中京置國子監命以時祭先聖先師  
癸未以隋王仁先爲北院大王賜御製誥冬十月甲子駐蹕藕絲淀

七年春三月庚戌如春州以耶律乙辛知北院樞密使事夏四月辛未禁吏民畜海東青鶻五月丙戌清  
暑永安山丙午謁慶陵辛亥殺東京留守陳王蕭阿剌六月壬子朔日有食之甲子以蕭謨魯爲順義軍  
節度使丁卯幸弘義永興崇德三宮致祭射柳賜宴賞賚有差戊辰行再生禮復命羣臣分朋射柳丁丑  
以楚國王涅魯古知南院樞密使事秋九月丁丑駐蹕藕絲淀冬十一月壬午以知黃龍府事耶律阿里  
只爲南院大王

元 中 書 右 丞 相 總 裁 脫 脫 等 修

本紀第二十二

道宗二

八年春正月癸丑如鴨子河二月駐蹕納葛濼三月戊申朔楚王蕭革致仕進封鄕國王夏五月吾獨婉  
惕隱屯柁窩等乞歲貢馬駝許之六月丙子朔駐蹕拖古烈辛丑以右夷离畢奚馬六爲奚六部大王是  
月御清涼殿放進士王鼎等九十三人秋七月甲子射熊于外室刺冬十月甲戌朔駐蹕獨盧金十二月  
庚辰以知北院樞密使事蕭圖古辭爲北院樞密使癸未幸西京戊子以皇太后行再生禮曲赦西京囚  
九年春正月辛亥幸駕鸞濼辛未禁民鬻銅三月辛未宋主禎殂以姪曙爲子嗣位夏五月丙午以隋王  
仁先爲南院樞密使徙封許王是月清暑曷里狝秋七月丙辰如太子山戊午皇太叔重元與其子楚國  
王涅魯古及陳國王陳六同知北院樞密使事蕭胡覲衛王貼不林牙涅刺溥古統軍使蕭迭里得駙馬  
都尉參及弟朮者圖骨旗鼓拽刺詳穩耶律郭九文班太保奚叔內藏提點烏骨護衛左太保敵不古按  
答副官使韓家奴寶神奴等凡四百人誘脅弩手軍犯行宮時南院樞密使許王仁先知北樞密院事趙

王耶律乙辛南府宰相蕭唐古北院宣徽使蕭韓家奴北院樞密副使蕭惟信敦睦宮使耶律良等率宿衛士卒數千人禦之涅魯古躍馬突出將戰爲近侍詳穩渤海阿厮護衛蘇射殺之己未族逆黨家庚申重元亡入大漠自殺辛酉詔諭諸道壬戌以仁先爲北院樞密使進封宋王加尙父耶律乙辛南院樞密使韓家奴殿前都點檢封荆王蕭惟信耶律馮家奴並加太子太傅宿衛官蕭乙辛回鶻海鄰裏耶律撻不也阿厮官分人急里哥霞抹乙辛只魯並加上將軍諸護衛及士卒庖夫弩手傘子等三百餘人各授官有差耶律良密告重元變命籍橫帳夷离董房爲漢人行宮都部署癸亥貼不訴爲重元等所脅詔削爵爲民流鎮州戊辰以黑白羊祭天八月庚午朔遣使安撫南京吏民癸酉以永興宮使耶律塔不也有定亂功爲同知點檢司事冬十月戊辰朔幸興王寺庚午以六院部太保耶律合朮知南院大王事是月駐蹕藕絲淀十一月辛丑以南院宣徽使蕭九哥爲北府宰相己未追封故富春郡王耶律義先爲許王是歲封皇子濬爲梁王

十年春正月己亥北幸二月禁南京民決水種粳稻秋七月壬申詔決諸路囚辛巳禁僧尼私詣行在妄述禍福取財物九月壬寅幸懷州謁太宗穆宗廟冬十月壬辰朔駐蹕中京戊午禁民私刊印文字十一月甲子定吏民衣服之制辛未禁大齋日屠殺丁丑詔求乾文閣所闕經籍命儒臣校讐庚辰以彰國軍

節度使韓謝十爲惕隱詔南京不得私進御用綵段私貨鐵及非時飲酒命南京三司每歲春秋以官錢  
鑾將士十二月癸巳以北院大王蕭兀古匿爲契丹行宮都部署是歲南京西京大熟

咸雍元年春正月辛酉朔文武百僚加上尊號曰聖文神武全功大略廣智聽仁睿孝天祐皇帝改元大  
赦冊梁王濬爲皇太子內外官賜級有差甲子如魚兒濼庚寅詔諸遇正旦重午冬至別表賀東宮三月  
丁亥以知興中府事楊績知樞密院事夏四月辛卯以知樞密院事張嗣復疾改知興中府事庚子清暑  
拖古烈五月辛巳夏國遣使來貢秋七月丙子以皇太后射獲熊賞賚百官有差八月丙申客星犯天廟  
詔諸路備盜賊嚴火禁九月乙亥駐蹕藕絲淀丁丑左夷離畢慥古爲孟父敝穩冬十月丁亥朔幸暨巫  
闡山己亥皇太后射獲虎大宴羣臣令各賦詩十一月壬戌有星如斗逆行隱隱有聲十二月甲午以遼  
王仁先爲南京留守徙封晉王辛亥以南京留守蕭惟信爲左夷離畢壬子熒惑與月並行自旦至午

二年春正月丁巳如鴨子河宋賀正使王巖卒以禮送還癸未幸山榆淀二月甲午詔武定軍節度使姚  
景行問以治道拜南院樞密使三月辛巳以東北路詳穩耶律韓福奴爲北院大王壬午彗星見於西方  
夏四月霖雨五月乙亥駐蹕拖古烈辛巳以戶部使劉詵爲樞密副使六月丙戌回鶻來貢甲辰阻卜來  
貢秋七月癸丑朔以西北路招討使蕭朮者爲北府宰相左夷離畢蕭惟信南院樞密使同知南院樞密



使事耶律白惕隱丙辰南院樞密使姚景行致仕庚申錄囚辛酉景行復前職丁卯如藕絲淀以歲旱遣使賑山後貧民九月壬子朔日有食之以叅知政事韓孚爲樞密副使冬十二月壬午以知樞密院事楊續爲南院樞密使樞密副使劉詵叅知政事戊子僧守志加守司徒丁酉以西京留守台朮爲南院大王辛丑以蕭朮者爲武定軍節度使是年御永安殿放進士張臻等百一人

三年春正月辛亥如鴨子河甲子御安流殿釣魚三月癸亥宋主曙殂子頊嗣位遣使告哀卽遣右護衛太保蕭撻不也翰林學士陳覺等弔祭閏月丁亥扈駕軍營火賜錢粟及馬有差辛卯駐蹕春州北淀乙巳以兀朮古匿爲北府宰相夏五月壬辰駐蹕納葛灤壬寅賜隨駕諸官工人馬六月戊申有司奏新城縣民楊從謀反僞署官吏上曰小人無知此兒戲爾獨流其首惡餘釋之庚戌宋遣使饋其先帝遺物辛亥宋以卽位遣陳襄來報卽遣知黃龍府事蕭圖古辭中書舍人馬鉉往賀壬戌南府宰相韓王蕭唐古致仕壬申以廣德軍節度使耶律藥奴爲南府宰相度支使趙徽叅知政事秋七月辛丑熒惑晝見凡三十五日九月戊戌詔給諸路囚糧癸卯幸南京冬十一月壬辰夏國遣使進回鶻僧金佛梵覺經十二月丁未以叅知政事劉詵爲樞密副使東北路詳穩高八南院大王樞密直學士張孝傑叅知政事己酉以張孝傑同知樞密院事丁巳行再生禮赦死罪以下是月夏國王李諒祚薨是歲南京旱蝗

四年春正月甲戌朔日有食之丙子如鴛鴦澳辛巳改易州兵馬使爲安撫使丁亥獵炭山辛卯遣使振西京饑民二月甲辰朔詔元帥府募軍壬子夏國王李諒祚子秉常遣使告哀癸丑頒行御製華嚴經贊丁卯北行三月丙子遣使夏國弔祭甲申振應州饑民乙酉詔南京除軍行地餘皆得種稻庚寅振朔州饑民乙未夏國李秉常遣使獻其父諒祚遺物夏四月戊午阿薩蘭回鶻遣使來貢五月丙戌駐蹕拖古烈六月壬子西北路兩斡方三十里丙寅以北院林牙耶律趙三爲北院大王右夷離畢蕭素颯中京留守秋七月壬申置烏古敵烈部都統軍司丙子獵黑嶺是月南京霖雨地震九月己亥駐蹕藕絲淀冬十月辛亥曲赦南京徒罪以下囚永清武清安次固安新城歸義容城諸縣水復一歲租戊辰册李秉常爲夏國王十二月辛亥夏國遣使來貢

五年春正月阻卜叛以晉王仁先爲西北路招討使領禁軍討之夏六月己亥駐蹕拖古烈丙午吐蕃遣使來貢壬戌以南院樞密使蕭惟信知北院樞密使事秋七月乙丑朔日有食之戊辰夏國遣使來謝封册癸未詔禁皇族恃勢侵漁細民八月謁慶陵九月戊辰仁先遣人奏阻卜捷冬十月己亥駐蹕藕絲淀十一月丁卯詔四方館副使止以契丹人充丁丑五國部阿里部叛命蕭素颯討之閏月戊申夏國王李秉常遣使乞賜印綬己未僧志福加守司徒十二月甲子行皇太子再生禮減諸路徒以下罪一等乙丑

詔百官廷議國政甲戌五國來降仍獻方物

六年春正月甲午如千鵝灤二月丙寅阻卜來朝貢方物夏四月癸未西北路招討司以所降阻卜酋長至行在五月甲辰清暑拖古烈甲寅設賢良科詔應是科者先以所業十萬言進六月辛巳阻卜來朝乙酉以惕隱耶律白爲中京留守是月御永安殿放進士趙廷睦等百三十八人秋七月辛亥獵于合魯碣特八月丙子耶律白薨追封遼西郡王九月庚戌幸藕絲淀甲寅以馬希白詩才敏妙十吏書不能給召試之冬十月丁卯五國部長來朝壬申西北路招討司擒阻卜酋長來獻十一月乙卯禁鬻生熟鐵于回鶻阻卜等界十二月戊午加圓釋法鈞二僧並守司空己未以坤寧節赦徒罪以下辛酉禁漢人捕獵

七年春正月戊子如鴨子河二月乙丑女直進馬丙寅以南院樞密使姚景行知興中府事三月己酉以討五國功加知黃龍府事蒲延懷化軍節度使高元紀易州觀察使高正並于牛衛上將軍五國節度使蕭陶蘇幹監江州防禦使大榮並靜江軍節度使幸黑水夏四月癸酉如納葛灤乙亥禁布帛短狹不中尺度者六月己卯吐蕃來貢癸未南院大王高八致仕秋七月甲申朔以東北路詳穩合里只爲南院大王西南面招討使拾得奴爲奚六部大王己丑遣使按問五京囚庚子如藕絲淀八月辛巳置佛骨于招仙浮圖罷獵禁屠殺冬十月己卯如鑿巫閭山壬戌以南府宰相耶律藥奴爲南京統軍使戊辰謁乾陵

庚辰詔百官廷議軍國事十一月戊子免南京流民租己丑振饒州饑民丙午高麗遣使來貢十二月壬子以契丹行宮都部署耶律胡觀知北院樞密使事知北院樞密使事蕭惟信爲南府宰相兼契丹行宮都部署丁巳漢人行宮都部署李仲禧北院宣徽使劉柔樞密副使王觀都承旨楊興功各賜國姓戊寅回鶻來貢是歲春州斗粟六錢





元 中 書 右 丞 相 總 裁 脫 脫 等 修

本紀第二十三

道宗三

八年春正月癸未烏古敵烈部詳穩耶律業等奏克北邊捷以戰多殺人飯僧南京中京甲申如魚兒濼  
壬寅昏霧連日二月丙辰北南樞密院言無事可陳壬戌以討北部功烏古敵烈部詳穩耶律業知北院  
大王事都監蕭阿魯帶烏古敵烈部詳穩加左監門衛上將軍戊辰歲饑免武安州租稅振恩蔚順惠等  
州民三月癸卯有司奏春泰寧江三州三十餘人願爲僧尼受具足戒許之夏四月壬子振義饒二州民  
丁巳駐蹕塔里捨己卯清暑拖古烈五月壬午晉王仁先薨六月甲寅振易州貧民己未振中京甲子振  
中興府甲戌封北府宰相楊績爲趙王樞密副使耶律觀參知政事兼知南院樞密使事丁丑高麗遣使  
來貢秋七月己卯慶州斬文高八世同居詔賜爵丙申振饒州饑民丁酉幸黑嶺丁未以御書華嚴經五  
頌出示羣臣閏月辛未射熊于殺羊山八月庚辰混同郡王侯古薨遣使致祭九月甲子駐蹕藕絲淀冬  
十月己丑參知政事耶律觀矯制營私第降爲庶人癸巳回鶻來貢十一月庚戌免祖州稅丙辰大雪許

民樵採禁地丁卯賜延昌宮貧戶錢十二月戊辰漢人行宮都部署耶律仲禧封韓國公樞密副使參知政事趙徽出爲武定軍節度使樞密副使柴德滋參知政事漢人行宮副部署耶律大悲奴陞都部署同知南院樞密使事蕭韓家奴知左夷離畢事丁丑以坤寧節大赦庚寅賜高麗佛經一藏

九年春正月丁未如雙灤夏四月壬辰如旺國崖秋七月甲辰獵大熊山戊申烏古敵烈統軍言八石烈敵烈人殺其節度使以叛己酉詔隗烏古部軍分道擊之丙寅南京奏歸義涑水兩縣蝗飛入宋境餘爲蜂所食八月丙申以耶律仲禧爲南院樞密使九月癸卯駐蹕獨遺金冬十月幸陰山遂如西京十一月戊午詔行幸之地免租一年甲子南院大王合理只致仕十二月辛未以知北院樞密使事耶律宜新爲中京留守南院宣徽使耶律撒刺爲南院大王壬辰高麗眞國並遣使來貢

十年春正月乙卯如鴛鴦灤二月癸未蠲平州復業民租賦戊子阻卜來貢三月甲子如拖古烈以耶律巢爲北院大王夏四月旱辛未以奚人達魯三世同居賜官旌之五月丙寅錄囚六月戊辰親出題試進士壬申詔臣庶言得失丙子御永安殿策賢夏秋七月丙辰如秋山癸卯謁慶陵九月庚戌幸東京謁二儀五鸞殿癸亥祠木葉山冬十月丁卯駐蹕藕絲淀丁丑詔有司頒行史記漢書十一月戊午高麗遣使來貢十二月辛巳改明年爲太康大赦

太康元年春正月乙未如混同江王寅振雲州饑二月丁卯祥州火遣使恤災乙酉駐蹕大角澤丁亥以  
穆鵝加鷹坊使耶律楊六爲工部尙書三月乙巳命皇太子寫佛書夏四月丙子振平州饑乙酉如犢山  
閏月丙午振平灤二州饑庚戌皇孫延禧生五月甲子賜妃之親及東宮僚屬爵有差六月癸巳以興聖  
宮使奚謝家奴知奚六部大王事戊戌知三司使事韓操以錢穀增羨授三司使癸卯遣使按問諸路囚  
以惕隱大悲奴爲始平軍節度使參知政事柴德滋武定軍節度使乙卯吐蕃來貢丙辰詔皇太子總領  
朝政仍戒諭之以武定軍節度使趙徽爲南府宰相樞密副使楊遵勗參知政事秋七月辛酉朔獵平地  
松林丙寅振南京貧民八月庚寅朔日有食之九月乙亥駐蹕藕絲淀己卯以南京饑免租稅一年仍出  
錢粟振之冬十月西北路酋長遐拾維搭雙古等來降十一月辛酉皇后被誣賜死殺伶人趙惟一高長  
命並藉其家屬十二月己丑以南京統軍使耶律藥奴爲惕隱漢人行宮都部署耶律霖樞密副使同知  
東京留守事蕭鐸刺夷離畢庚寅賜張孝傑國姓壬辰以西京留守蕭燕六爲左夷離畢

二年春正月己未如春水庚辰駐蹕雙灤二月戊子振黃龍府饑癸丑南京路饑免租稅一年三月辛酉  
皇太后崩壬戌遣殿前副點檢耶律轄古報哀于宋癸亥遣使報哀于高麗夏國丁卯大赦戊寅以皇太  
后遺物遣使遺宋夏六月乙酉朔上大行皇太后尊諡曰仁懿皇后戊子宋及高麗夏國各遣使弔祭甲

午葬仁懿皇后于慶陵己亥駐蹕拖古烈壬寅出北院樞密使魏王耶律乙辛爲中京留守丁未冊皇后  
蕭氏封其父祗候郎君鼈里刺爲趙王叔西北路招討使余里也遼西郡王漢人行宮都部署駙馬都尉  
霞抹柳城郡王參知政事楊遵勗知南院樞密使事北院樞密副使蕭速撒知北院樞密使事漢人行宮  
副部署劉詵參知政事己酉南府宰相趙徽致仕秋七月戊辰如秋山癸酉柳城郡王霞抹薨八月庚寅  
獵遇麋失其母憫之不射九月戊午以南京蝗免明年租稅己卯駐蹕藕淀冬十月戊戌召中京留守  
魏王耶律乙辛復爲北院樞密使十一月甲戌上欲觀起居注修注郎不攝及忽突董等不進各杖二百  
罷之流林牙蕭岩壽於烏隄部是月南京地震民舍多壞十二月己丑以左夷離畢蕭撻不也爲南院統  
軍使

三年春正月癸丑如混同江乙卯省諸道春貢金帛及停周歲所輸尙方銀二月壬午朔東北路統軍使  
蕭韓家奴加尙父封吳王甲申詔北院樞密使魏王耶律乙辛同母兄大奴同母弟阿思世預北南院樞  
密之選其異母諸弟世預夷離董之選己丑如魚兒濼辛卯中京饑罷巡幸夏四月乙酉泛舟黑龍江五  
月丙辰玉田安次蠟傷稼癸亥日中有黑子己巳駐蹕犢山乙亥北院樞密使耶律乙辛奏右護衛太保  
查刺等告北院樞密使蕭速撒等八人謀立皇太子上以無狀不治出速撒等三人補外護衛撒撥等六

人各鞭百餘徙于邊丙子以西北路招討使遼西郡王蕭余里也爲北府宰相兼知契丹行宮都部署事  
戊寅詔告謀逆事者重加官賞六月己卯朔耶律乙辛令牌印郎君蕭訛都幹誣首嘗預速撒等謀籍其  
姓名以告卽命乙辛及耶律仲禧蕭余里也耶律孝傑楊遵勗燕哥抄只蕭十三等鞠治杖皇太子囚之  
宮中辛已殺宿直官敵里刺等三人壬午殺宣徽使撻不也等二人癸未殺始平軍節度使撒刺等十人  
又遣使殺上京留守速撒及已徙護衛撒撥等六人乙酉殺耶律撻不也及其弟陳留丙戌廢皇太子爲  
庶人囚之上京己丑回鶻來貢殺東京留守同知耶律回里不辛卯殺速撒等諸子籍其家戊申遣使按  
五京諸道獄秋七月辛亥護衛太保查刺加鎮國大將軍預突呂不部節度使之選室韋查刺及蕭寶神  
奴謀魯古並加左衛大將軍牌印郎君訛都幹尙皇女趙國公主授駙馬都尉始平軍節度使祇候郎君  
耶律撻不也及蕭圖古辭並加監門衛上將軍壬子知北院樞密副使蕭韓家奴爲漢人行宮都部署乙  
丑如秋山丁丑謁慶陵八月庚寅漢人行宮都部署蕭韓家奴薨辛丑謁慶陵九月癸亥玉田貢嘉禾壬  
申修乾陵廟冬十月辛丑駐蹕藕絲淀十一月北院樞密使耶律乙辛遣其私人盜殺庶人溶于上京閏  
十二月戊午以北府宰相遼西郡王蕭余里也知北院樞密使事左夷離畢耶律燕哥爲契丹行宮都部  
署丙寅預行正旦禮是歲南京大熟



四年春正月庚辰如春水甲午振東京饑二月乙丑駐蹕掃獲野戍辰以東路統軍使耶律王九爲惕隱  
夏四月辛亥高麗遣使乞賜鴨綠江以東地不許五月丙戌駐蹕散水原六月甲寅阻卜諸酋長進良馬  
秋七月甲戌諸路奏飯僧尼三十六萬八月癸卯詔有司決滯獄九月乙未駐蹕藕絲淀庚子五國部長  
來貢冬十月癸卯以參知政事劉仲爲保靜軍節度使十一月丁亥禁士庶服用錦綺日月山龍之文己  
丑回鶻遣使來貢庚寅南院樞密使耶律仲禧爲廣德軍節度使辛卯錦州民張寶四世同居命諸子三  
班院祇候十二月丁卯以北院樞密副使耶律霖知北院樞密使事

元中書右丞相總裁脫脫等修

本紀第二十四

道宗四

五年春正月壬申如混同江癸酉賜宰相耶律孝傑名仁傑乙亥如山榆淀三月辛未以宰相仁傑獲頭  
鵝加侍中壬辰以北院樞密使魏王耶律乙辛知南院大王事加于越知北院樞密使事耶律霖爲北院  
樞密使北院樞密副使耶律特里底知北院樞密使事左夷离畢耶律世遷同知北院樞密使事夏四月  
己未如納葛濼五月丁亥謁慶陵以契丹行宮都部署耶律燕哥爲南府宰相北面林牙耶律承盞爲夷  
离畢同知南院樞密使事蕭撻不也及殿前副點檢駙馬都尉蕭酬幹並封蘭陵郡王六月辛亥阻卜來  
貢丁巳以北府宰相遼西郡王蕭余里也爲西北路招討使己未遣使錄囚是月放進士劉瓘等百一十  
三人秋七月己卯獵夾山八月庚申命有司撰太宗神功碑立于南京九月己卯詔諸路毋禁僧徒開壇  
壬午禁扈從擾民冬十月戊戌夏國遣使來貢己亥駐蹕獨盧金壬子詔惟皇子仍一字王餘並削降丁  
巳振平州貧民己未以趙王楊績爲遼西郡王魏王耶律乙辛降封混同郡王吳王蕭韓家奴蘭陵郡王

致仕十一月丁丑召沙門守道開壇于內殿癸未復南京流民差役三年被火之家免租稅一年十二月丙午彗星犯尾乙卯幸西京戊午行再生禮赦雜犯死罪以下

六年春正月癸酉如鴛鴦灤辛卯耶律乙辛出知興中府事三月庚寅封皇孫延禧爲梁王忠順軍節度使耶律頗德南院大王耶律仲禧南院樞密使戶部使陳毅參知政事夏四月乙卯獵炭山五月壬申免平州復業民租賦一年庚寅以旱禱雨命左右以水相沃俄而雨降六月戊戌駐蹕納葛灤戊申以度支使王績參知政事庚戌女直遣使來貢秋七月戊辰觀市癸未爲皇孫梁王延禧設旗鼓拽刺六人衛護之甲申獵沙嶺九月壬寅詞木葉山己酉駐蹕藕絲淀冬十月癸未朔省同知廣德軍節度使事命奉先軍節度使兼巡警乾顯二州丁卯耶律仁傑出爲武定軍節度使庚午參知政事劉詵致仕癸酉以陳毅爲漢人行宮都部署王績同知樞密院事辛巳回鶻遣使來貢十一月己丑朔日有食之癸卯召羣臣議政十二月甲子以耶律特里底爲孟父斂穩乙丑以蕭撻不也爲北府宰相耶律世遷知北院樞密使事耶律慎思同知北院樞密使事庚午免西京流民租賦一年甲戌減民賦丁亥豫行正旦禮戊子如混同

江

七年春正月戊申五國部長來貢甲寅女直貢良馬二月甲子如魚兒灤夏五月壬子駐蹕嶺西癸丑有

司奏承清武清固安三縣蝗甲寅以蕭撻不也兼殿前都點檢蕭酬幹爲漢人行宮都部署兼知樞密院事六月甲子詔月祭觀德殿歲寒食諸帝在時生辰及忌日詣景宗御容殿致奠丙寅阻卜余古赧來貢丁卯以翰林學士王言敷參知政事封北院宣徽使石篤漆水郡王秋七月戊子如秋山丙申謁慶陵八月丁卯射鹿赤山加圍場使涅葛爲靜江軍節度使九月戊子次懷州命皇后謁懷陵辛卯次祖州命皇后謁祖陵乙巳駐蹕藕絲淀冬十月戊辰以惕隱王九爲南院大王夷离畢奚抄只爲彰國軍節度使十一月乙酉詔歲出官錢振諸宮分及邊戍貧戶丁亥幸駙馬都尉蕭酬幹第方飲宰相梁穎諫曰天子不可飲人臣家上卽還宮己亥高麗遣使來貢辛亥除帛絹尺度狹短之令十二月丁卯武定軍節度使耶律仁傑以罪削爵爲民辛未知興中府事耶律乙辛以罪囚于萊州

八年春正月甲申如混同江丁酉鐵驪五國諸長各貢方物二月戊午如山榆淀辛酉詔北南院官凡給驛者必先奏聞貢新及奏獄訟方許馳驛餘並禁之己巳夏國獲宋將張天一遣使來獻壬申以耶律頗德爲南府宰相兼知北院樞密使燕哥爲惕隱蕭撻不也兼知契丹行宮都部署事三月庚戌黃龍府女直部長朮乃率部民內附予官賜印綬是月詔行租黍所定升斗夏四月壬戌以耶律世遷爲上京留守六月辛亥朔駐蹕納葛灤丙辰夏國遣使來貢丁巳以耶律頗德爲北院樞密使耶律崇哥南府宰相劉

鐫南院樞密使蕭撻不也兼知北院樞密使事王績漢人行宮都部署蕭酬幹國舅詳穩乙丑阻卜長來  
貢丙子以耶律慎思知右夷離畢事秋七月甲午如秋山南京霖雨沙河溢永清歸義新城安次武清香  
河六縣傷稼九月庚寅謁慶陵丁未駐蹕藕絲淀大風雪牛馬多死賜扈從官以下衣馬有差冬十月乙  
卯詔化哥傳導梁王延禧加金吾衛大將軍丙子謁乾陵十一月壬午以乙室大王蕭何葛爲南院宣徽  
使權知奚大部大王事圖趕爲本部大王十二月癸丑烏百敵烈統軍使耶律馬五爲北院大王庚申降  
皇后爲憲妃出居乾陵

九年春正月辛巳如春水夏四月丙午朔大雪平地丈餘馬死者十六七五月如黑嶺六月己未駐蹕散  
水原甲子以耶律阿思爲契丹行宮都部署耶律慎思北院樞密副使庚午詔諸路檢括脫戶罪至死者  
原之閏月丁丑以漢人行宮副部署可汗奴爲南院大王戊寅追諡庶人溶爲昭懷太子丁亥阻卜來貢  
己丑以知興中府事邢熙年爲漢人行宮都部署漢人行宮都部署王績爲南院樞密副使秋七月乙巳  
獵馬尾山丁巳謁慶陵癸亥禁外官部內貸錢取息及使者館于民家八月高麗王徽薨九月癸卯朔日  
有食之己酉射熊于白石山加圍場使涅葛左金吾衛大將軍己巳以高麗王徽子三韓國公勳權知國  
事辛未五國部長來貢壬申召北南樞密院官議政事冬十月丁丑謁觀德殿己卯南院樞密使劉鐫薨



壬辰混同郡王耶律乙辛謀亡入宋伏誅十一月丙午進封梁王延禧爲燕國王大赦以南院宣徽使蕭何葛爲南府宰相三司使王經參知政事兼知樞密事甲寅詔僧善知警校高麗所進佛經頒行之己未定諸令史譯史遷敘等級十二月丁亥以邢熙年知南院樞密使事辛卯以王言數爲漢人行宮都部署高麗三韓國公王勳薨是年御前放進士李君裕等五十一人

十年春正月辛丑朔如春水丙午復建南京奉福寺浮圖戊辰如山榆浞二月庚午朔萌古國遣使來聘三月戊申遠萌古國遣使來聘丁巳命知制誥王師儒牌印郎君耶律因傅導燕國王延禧夏四月丁丑女直貢良馬五月壬戌駐蹕散水原乙丑阻卜來貢丙寅降國舅詳穩班位在敝穩之下六月壬辰禁毀銅錢爲器秋七月甲辰如黑嶺九月癸亥駐蹕藕絲淀冬十二月乙未改慶州大安軍曰興平是月改明年爲大安赦雜犯死罪以下

大安元年春正月丁酉如混同江癸卯王績知南院樞密使事邢熙年爲中京留守戊申以樞密直學士杜公謂參知政事庚戌五國會長來貢良馬二月辛未如山榆浞夏四月乙酉宋主頊殂子照嗣位使來告哀辛卯酉幸六月戊辰駐蹕拖古烈壬申以王績爲南府宰相蕭撻不也兼知南院樞密使事丁丑遣使弔祭于宋戊寅宋遣王眞甄祐等饋其先帝遺物秋七月乙巳遣使賀宋主卽位戊午獵于赤山八月

丁卯幸慶州戊辰謁慶陵冬十月癸亥駐蹕好草淀戊辰夏國王李秉常遣使報其母梁氏哀甲申以蕭撻不也爲南院樞密使十一月乙未詔比者外官因譽進秩久而不調民被其害今後皆以資給遷轉丁酉以南女直詳穩蕭裡爲北府宰相辛亥史臣進太祖以下七帝實錄丙辰遣使冊三韓國公正勳子運爲高麗國王己未詔僧尼無故不得赴闕十二月甲戌宋遣蔡卞來謝弔祭

二年春正月辛卯如混同江己酉五國諸部長來貢癸丑召權翰林學士趙孝嚴知制誥王師儒等講五經大義二月癸酉駐蹕山榆淀是月太白犯歲星三月乙酉女直貢良馬夏四月戊戌北幸癸丑遣使加統軍使蕭訛都幹太子太保裨將老古金吾衛大將軍蕭雅哥靜江軍節度使耶律燕奴右監門衛大將軍仍賜賚諸軍士五月丁巳朔以牧馬蕃息多至百萬賞羣牧官以次進階乙亥駐蹕納萬濼戊寅宰相梁穎出知興中府事是月放進士張穀等二十六人六月丁亥朔以左夷離畢耶律坦爲惕隱知樞密院事耶律幹特剌兼知左夷離畢事丙申阻卜來朝癸卯遣使按諸路獄甲辰以同知南京留守事耶律那也知右夷離畢事乙巳阻卜會長余古赧及愛的來朝詔燕國王延禧相結爲友戊申以契丹行宮都部署耶律阿思兼知北院大王事壬子高墩以下縣令錄事兄弟及子悉許敘用秋七月丁巳惠妃母燕國夫人削古以厭魅梁王事覺伏誅子蘭陵郡王蕭酬幹除名置邊郡仍隸興聖宮戊午獵沙嶺甲子賜與

聖積慶二宮貧民錢乙酉出粟振遼州貧民八月戊子以雪罷獵九月庚午還上京壬申發粟振上京中  
京貧民丙子謁二儀五鸞二殿己卯出太祖太宗所御鎧仗示燕國王延禧諭以創業征伐之難辛巳召  
南府宰相議國政冬十月乙酉朔以樞密副使寶景庸知樞密院事丙戌五國部長來貢丁亥以夏國王  
李秉常薨遣使詔其子乾順知國事十一月甲戌爲燕國王延禧行再生禮曲赦上京囚戊寅高麗遣使  
謝封冊癸未出粟振乾顯成懿四州貧民十二月辛卯以蘭陵郡王蕭撻不也爲南院樞密使己亥夏國  
王李乾順遣使上其父遺物



元 中 書 右 丞 相 總 裁 脫 脫 等 修

本紀第二十五

道宗五

三年春正月乙卯如魚兒濼甲戌出錢粟振南京貧民仍復其租賦己卯大雪二月丙戌發粟振中京饑  
甲辰以民多流散除安泊逃戶徵償法三月乙卯高麗遣使來貢己未免錦州貧民租一年甲戌免上京  
貧民租如錦州庚辰女直貢夏馬夏四月戊子賜中京貧民帛及免諸路貢輸之半丙申賜隕烏古部貧  
民帛庚子如涼陁甲辰南府宰相王績薨乙巳詔出戶部司粟振諸路流民及義州之饑五月庚申海雲  
寺進濟民錢于萬秋七月丙辰蠲黑嶺丁巳出雜帛賜興聖宮貧民庚午大雨罷蠲丁丑秦越國王阿璉  
薨九月乙丑駐蹕匣魯金冬十月庚辰以參知政事王經爲三司使壬辰罷節度使已下官進珍玩癸卯  
追封秦越國王阿璉爲秦魏國王十一月甲寅以惕隱耶律坦同知南京留守事遼興軍節度使耶律王  
九爲南府宰相十二月己卯朔以樞密直學士呂嗣立參知政事

四年春正月庚戌如混同江甲寅太白晝見甲子五國部長來貢庚午免上京逋逃及貧戶稅賦甲戌以



上京南京饑許賈人自鬻丁丑曲赦西京役徒二月己丑如魚兒濼甲午曲赦春州役徒終身者皆五歲免己亥如春州赦秦州役徒三月乙丑免高麗歲貢己巳振上京及平錦來三州饑夏四月己卯振蘇吉復祿鐵五州貧民并免其租稅甲申振慶州貧民乙酉減諸路常貢服御物丁酉立入粟補官法癸卯西幸召樞密直學士耶律儼講尙書洪範五月辛亥命燕國王延禧寫尙書五子之歌乙卯振祖州貧民丁巳詔免役徒終身者五歲免之己未振春州貧民丙寅禁挾私引水犯田六月庚辰駐蹕散水原丁亥命燕國王延禧知中丞司事以同知南院樞密使慶耶律聶里知右夷离畢知右夷离畢事耶律那也同知南院樞密使事庚寅北院樞密使耶律頗德致仕秋七月戊申曲赦奉聖州役徒丙辰遣使册李乾順爲夏國王庚申如秋山己巳禁錢出境八月庚辰有司奏宛平永清蝗爲飛鳥所食庚寅謁慶陵冬十月丁丑獵遼水之濱己卯駐蹕藕絲淀癸未免百姓所貸官粟己丑知北院樞密使事耶律阿思封漆水郡王癸巳以乙室大王耶律敵烈知西北路招討使事權知西北路招討使事蕭朽哥知乙室大王事壬寅詔諸部長官親鞠獄訟十一月庚申興中府民張化法以父兄犯盜當死請代皆免十二月戊寅南府宰相耶律王九致仕癸未以孟父做穩耶律慎思爲中京留守閏十二月癸卯朔預行正旦禮丙午如混同江五年春正月癸未如魚兒濼甲午高麗遣使來貢三月癸酉詔析津太定二府精選舉人以聞仍詔諭學

者當窮經明道夏四月甲辰以知奚六部大王事涅葛爲本部大王壬子獵北山甲子霖雨罷獵五月丁亥駐蹕赤勒嶺己丑以阻卜磨古斯爲諸部長癸巳回鶻遣使貢良馬己亥以同知南院樞密使事耶律那也知右夷離畢事左祇候郎君班詳穩耶律涅里知北院大王事六月甲寅夏國遣使來謝封册壬戌以參知政事王言敷爲樞密副使前樞密副使賈士勳參知政事兼同知樞密院事秋七月庚午獵沙嶺九月辛卯遣使遺宋鹿脯壬辰駐蹕藕絲淀冬十月乙巳以新定法令太煩復行舊法庚申以遼興軍節度使何葛爲乙室大王十一月丁卯朔燕國王延禧生子大赦妃之族屬進爵有差

六年春正月如混同江二月辛丑駐蹕雙山三月辛未女直遣使來貢夏四月丁酉東北路統軍司設掌法官庚子以同知南院樞密使事耶律吐朶知左夷離畢事五月壬辰駐蹕散水原六月甲寅遣使決五京囚秋七月丙子如黑嶺冬十月丁酉駐蹕藕絲淀十一月壬戌高麗遣使來貢己巳以南府宰相寶景庸爲武定軍節度使是年放進士文充等七十二人

七年春正月壬戌如混同江二月己亥駐蹕魚兒灤壬寅詔給渭州貧民耕牛布絹三月丙戌駐蹕黑龍江夏四月丙辰以漢人行宮副部署耶律谷欲知乙室大王事五月己未朔日有食之六月甲午駐蹕赤勒嶺己亥倒塌嶺人進古鼎有文曰萬歲永爲寶用辛丑回鶻遣使貢方物癸卯以權知東京留守蕭陶

隗爲契丹行宮都部署丁未端拱殿門災秋七月戊午朔回鶻遣使來貢異物不納厚賜遣之八月庚寅以霖雨罷獵壬寅幸慶州謁慶陵九月丙申還上京己亥日本國遣鄭元鄭心及僧應範等二十八人來貢冬十月辛巳命燕國王延禧爲天下兵馬大元帥總北南院樞密使事十一月庚子如藕絲淀甲子望祀木葉山

八年春正月乙酉如山榆淀乙未阻卜諸長來降三月己亥駐蹕撻里捨淀丁未曲赦中京蔚州役徒夏四月乙卯阻卜長來貢丁丑獵西山惕隱酋長胡里只來附五月甲辰駐蹕赤勒嶺六月乙丑夏國爲宋侵遣使乞援秋七月丁亥獵沙嶺九月乙巳駐蹕藕絲淀丁未日本國遣使來貢冬十月庚戌朔遣使遣宋鹿脯丙辰振西北路饑辛酉阻卜磨古斯殺金吾吐古斯以叛遣奚六部禿里耶律郭三發諸蕃部兵討之壬申南府宰相王荆薨戊寅以左夷離畢耶律涅里爲彰聖軍節度使十一月戊子以樞密副使王是敦兼知樞密院事權參知政事韓資讓參知政事漢人行宮都部署奚回离保知奚六部大王事丁酉以通州濱水害稼遣使振之戊申北院大王合魯薨是年放進士冠尊文等五十三人

九年春正月庚辰如混同江二月磨古斯來侵三月西北路招討使耶律阿魯掃古追磨古斯還都監蕭張九遇賊與戰不利二室韋拽刺北王府特滿羣牧宮分等軍多陷沒夏四月乙卯興中府甘露降遣使

祠佛飯僧癸酉獵西山六月丁未朔駐蹕散水庚夷申以遼興軍節度使榮哥爲南院大王知左夷離畢事耶律吐朶爲左夷離畢秋七月辛卯如黑嶺壬寅遣使賜高麗羊九月癸卯振西北路貧民冬十月庚戌有司奏磨古斯詣西北路招討使耶律撻不也僞降旣而乘虛來襲撻不也死之阻卜烏古禮叛達里底拔思母並寇倒塌嶺壬子遣使籍諸路兵癸丑以南院大王特末同知南京留守事命鄭家奴率兵往援倒塌嶺甲寅駐蹕藕絲淀以左夷離畢耶律禿朶圍場都管撒八並爲西北路行軍都監乙卯詔以馬三千給烏古部丙辰有司奏阻卜長轄底掠西路羣牧丁巳振西北路貧民己未燕國王延禧生子肆赦妃之族屬並進級壬戌以樞密直學士趙廷睦參知政事兼同知南院樞密使事癸亥烏古敵烈統軍使蕭朽哥奏討阻卜等部捷甲子宋遣使告其母后曹氏哀卽遣使弔祭己巳詔廣積貯以備水旱十一月辛巳特抹等奏討阻卜捷十二月丙辰宋遣使以母后遺留物來饋

十年春正月如春水癸未惕德來貢戊子烏古扎等來降達里底拔思母二部來侵四捷軍都監特抹死之二月甲辰以破阻卜賞有功者丙午西南面招討司奏討拔思母捷癸丑排雅僕里同葛虎骨僕果等來降達里底來侵三月壬申朔日有食之山北路副部署蕭阿魯帶奏討達里底捷夏四月壬寅朔惕德萌得斯老古得等各率所部來附詔復舊地甲辰駐蹕春州北平淀丙午烏古部節度使耶律陳家奴奏

討茶扎刺捷庚戌以知北院樞密使事耶律幹特刺爲都統夷窩畢耶律禿朶爲副統龍虎衛上將軍耶律胡呂都監討磨古斯遺積慶宮使蕭紉里監戰辛亥朽哥奏頗里八部來侵擊破之己巳除玉田密雲流民租賦一年閏月庚子賜西北路貧民錢達里底拔思母二部來降五月甲辰駐蹕赤勒嶺甲寅括馬戊午西北路招討司奏敵烈等部來侵統軍司出兵與戰不利招討司以兵擊破之敦睦宮太師耶律愛奴及其子死之辛酉以知國舅詳穩事蕭阿烈同領西北路行軍事六月辛未宋遣使來謝弔祭乙酉烏古敵烈統軍使朽哥有罪除名丙戌和烈萬等部來聘癸巳惕德來貢己亥禁邊民與蕃部爲婚是夏高麗國王運薨子昱遣使來告卽遣使賻贈秋七月庚子朔獵赤山是月阻卜等寇倒塌嶺盡掠西路羣牧馬去東北路統軍使耶律石柳以兵追及盡獲所掠而還九月己未以南院大王特末爲南院樞密使甲子敵烈諸酋來降釋其罪是月幹特刺破磨古斯冬十月丙子駐蹕藕絲淀壬午山北路副部署蕭阿魯帶以討達里底功加左金吾衛上將軍癸巳西北路統軍司獲阻卜長拍撒萬蒲魯等來獻十一月乙巳惕德銅刮阻卜的烈等來降達里底及拔思母等復來侵山北副部署阿魯帶擊敗之十二月癸酉三河縣民孫賓及其妻皆百歲復其家甲戌以參知政事趙廷睦兼同知樞密院事樞密副使王師儒參知政事兼同知樞密院事己卯詔錄西北路有功將士及戰沒者贈官乙酉詔改明年元減雜犯死罪以下仍



除貧民租賦戊子西北路統軍司奏討磨古斯捷

乾隆四年校刊

遼史卷二十五本紀

四



元 中 書 右 丞 相 總 裁 脫 脫 等 修

本紀第二十六

道宗六

壽隆元年春正月己亥如混同江庚戌西南面招討司奏拔思母來侵蕭阿魯帶等擊破之乙卯振奉聖州貧民二月戊辰賜左右二皮室貧民錢癸酉高麗遣使來貢乙亥駐蹕魚兒濼三月丙午賜東北路貧民絹夏四月丁卯翰特刺奏討耶觀刮捷己亥女直遣使來貢庚寅錄西北路有功將士五月乙未朔左夷离畢耶律吐朶爲惕隱南京宣徽使耶律特末爲北院大王癸卯贈陣亡者官丁巳駐蹕特禮嶺六月己巳以知奚六部大王事回里不爲本部大王權參知政事趙孝嚴爲漢人行宮都部署圍場都管撒八以討阻卜功加鎮國大將軍癸巳阻卜長杏里底及圖木葛來貢秋七月庚子阻卜長猛達斯等來貢癸卯獵沙嶺癸丑頗里八部來附進方物甲寅翰特刺奏磨古斯捷九月甲寅祠木葉山丙辰詔西京砲人弩人教西北路漢軍冬十月甲子駐蹕藕絲淀甲戌以北面林牙耶律大悲奴爲右夷离畢癸未以參知政事王師儒爲樞密副使漢人行宮都部署趙孝嚴參知政事壬辰錄討阻卜有功將士十一月丙申女

遣使進馬己亥以都統幹特刺爲西北路招討使封漆水郡王甲辰夏國進貝多葉佛經庚申高麗王  
昱疾命其子顒權知國事十二月癸亥朔以知北院樞密使事耶律阿思爲北院樞密使是年放進士陳  
衡甫等百三十人

二年春正月甲午如春水癸卯西南面招討司討拔思母破之乙卯駐蹕瑟尼思辛酉市牛給烏古敵烈  
隈烏古部貧民二月癸亥振達麻里別古部夏四月己卯振西北邊軍六月辛酉駐蹕撒里乃秋七月甲  
午阻卜來貢丙午獵赤山八月乙丑頗里八部進馬九月丙午徙烏古敵烈部于烏納水以扼北邊之衝  
冬十月戊辰駐蹕藕絲淀庚辰高麗遣使來貢十二月己未幹特刺討梅里急破之壬戌南府宰相耶律  
鐸魯幹致仕癸亥蕭撻不也爲北府宰相耶律大悲奴殿前都點檢乙亥夏國獻宋俘

三年春正月丁亥如春水壬寅烏古部節度使耶律陳家奴以功加尙書右僕射癸卯駐蹕雙山二月甲  
辰朔南京水遣使振之丙午阻卜長猛撒葛粘入葛長禿骨撒梅里急長忽魯八等請復舊地貢方物從  
之三月辛酉燕國王延禧生子癸亥賜名撻魯妃之父長哥遷左監門衛上將軍仍賜官屬錢是春高麗  
王昱薨夏四月南府宰相趙廷睦出知興中府事參知政事牛溫舒兼同知樞密院事五月癸亥幹特刺  
討阻卜破之己巳駐蹕撒里乃六月甲申詔罷諸路馳驛貢新丙戌詔每冬駐蹕之所宰相以下構宅毋

名其民辛丑夏人來告宋城要地遣使之宋諭與夏和庚戌以契丹行宮都部署耶律吾也爲南院大王  
秋七月壬子朔獵黑嶺八月己亥蒲盧毛朶部長率其民來歸乙巳彗星見西方九月壬申駐蹕藕絲淀  
丁丑以武定軍節度使梁援爲漢人行宮都部署戊寅斡特刺奏討梅里急捷己卯五國部長來貢冬十  
月庚戌以西北路招討使斡特刺爲南府宰相十一月乙卯蒲盧毛朶部來貢戊午以安車召監巫闔山  
僧志達己未以中京留守韓資讓知樞密院事同知南院樞密使事蕭藥師奴知右夷離畢丁丑西北路  
統軍司奏討梅里急捷

四年春正月壬子如魚兒灤己巳徙阻卜等貧民于山前辛未宋遣使來饋錦綺三月庚午幸春州丙子  
有司奏黃河清夏四月辛丑以雨罷獵五月癸酉那也奏北邊捷甲戌駐蹕撒里乃六月戊寅朔夏國爲  
宋所攻遣使求援丁亥以遼興軍節度使涅里爲惕隱前知惕隱事耶律郭三爲南京統軍使甲午以參  
知政事牛溫舒兼知中京留守事秋七月戊午如黑嶺冬十月乙亥朔駐蹕藕絲淀己卯以南府宰相斡  
特刺兼丹契行宮都部署以傳導燕國王延禧十一月乙巳朔知右夷離畢事蕭藥師奴樞密直學士耶  
律儼使宋諷與夏和辛酉夏復遣使求援十二月壬辰爲燕國王延禧行再生禮曲赦三百里丙辰

五年春正月乙巳如魚兒灤己丑詔夏國王李乾順伐拔思母等部夏五月壬戌藥師奴等使宋迴奏宋



罷兵癸亥謁乾陵戊辰以南府宰相幹特刺兼西北路招討使禁軍都統己巳駐蹕沿柳湖六月甲申以奚六部大王回鹘保爲契丹行宮都部署知右夷離畢事蕭藥師奴南面林牙兼知契丹行宮都部署事乙未五國部長來朝戊戌阻卜來貢己亥以興聖宮使耶律郝家奴爲右夷離畢秋七月壬寅朔惕德長禿的等來貢辛亥如大牢古山閏九月丙子駐蹕獨盧金冬十月己亥朔高麗王暉遣使乞封册丁巳幹特刺奏討耶都刮捷丙寅以同知南京留守事蕭得里底知北院樞密使事丁卯宋遣郭知章曹平來聘戊辰振遼州饑仍免租賦一年十一月甲戌振南北二紮乙酉夏國以宋罷兵遣使來謝十二月甲子以參知政事趙孝巖爲漢人行宮都部署漢人行宮都部署梁援爲遼興軍節度使

六年春正月癸酉南院大王耶律吾也薨壬午以太師致仕禿開起爲奚六部大王丁亥如春水辛卯幹特刺執磨古斯來獻丙申詔問民疾苦二月丁未以烏古部節度使陳家奴爲南院大王己酉磔磨古斯于市癸丑出網賜五院貧民辛酉宋遣使告宋主煦殂弟佶嗣位卽日遣使弔祭三月甲申弛朔州山林之禁夏四月丁酉朔日有食之癸卯如炭山五月壬午烏古部討茶扎刺破之乙酉漢人行宮都部署趙孝巖薨丙戌駐蹕納萬濼辛卯宋遣使饋先帝遺物乙未以東京留守何魯掃古爲惕隱南院宣徽使蕭常哥爲漢人行宮都部署六月庚子遣使賀宋主辛丑以有司案牘書宋主嗣位爲登寶位詔奪宰相鄭

顯以下官出顯知興中府事韓資讓爲崇義軍節度使御史中丞韓君義爲廣順軍節度使癸丑阻卜長來貢戊午遣使決五京滯獄己未以遼興軍節度使梁援爲樞密副使秋七月庚午如沙嶺壬申耶觀刮諸部寇西北路八月斡特刺以兵擊敗之使來獻捷九月癸未望祠木葉山戊子駐蹕藕絲淀冬十月壬寅以樞密副使王師儒監修國史癸卯五國諸部長來貢甲寅以平州饑復其租賦一年十一月壬寅以天德軍民田世榮三世同居詔官之令一子三班院祇候丙子召鑿巫閭山僧志達設壇於內殿戊子夏國王李乾順遣使請尙公主十二月乙未女直遣使來貢己亥以知右夷離畢事郝家奴爲北面林牙辛亥詔燕國王延禧擬注大將軍以下官庚申鐵驪來貢宋遣使來謝帝不豫是歲封高麗王顯爲三韓國公放進士康秉儉等八十七人

七年春正月壬戌朔力疾御清風殿受百官及諸國使賀是夜白氣如練自天而降黑雲起于西北疾飛有聲北有青赤黑白氣相雜而落癸亥如混同江甲戌上崩于行宮年七十遣詔燕國王延禧嗣位六月庚子上尊諡仁聖大孝文皇帝廟號道宗

贊曰道宗初卽位求直言訪治道勸農興學救菑恤患粲然可觀及夫謗訕之令旣行告許之賞日重羣邪並興讒巧競進賊及骨肉皇基寢危衆正淪胥諸部反側甲兵之用無寧歲矣一歲而飯僧三十六萬

一日而祝髮三千徒勤小惠蔑計大本尙足與論治哉

元中書右丞相總裁脫脫等修

本紀第二十七

天祚皇帝一

天祚皇帝諱延禧字延盪小字阿果道宗之孫父順宗大孝順聖皇帝母貞順皇后蕭氏太康元年生大歲封梁王加守太尉兼中書令後三年進封燕國王大安七年總北南院樞密使事加尙書令爲天下兵馬大元帥壽隆七年正月甲戌道宗崩奉遺詔卽皇帝位于柩前羣臣上尊號曰天祚皇帝二月壬辰朔改元乾統大赦詔爲耶律乙辛所誣陷者復其官爵籍沒者出之流放者還之乙未遣使告哀于宋及西夏高麗乙巳以北府宰相蕭兀納爲遼興軍節度使加守太傅三月丁卯詔有司以張孝傑家屬分賜羣臣甲戌召僧法頤放戒于內庭夏四月旱六月庚寅朔如慶州甲午宋遣王潛等來弔祭丙申高麗夏國各遣使慰奠戊戌以南府宰相幹特刺兼南院樞密使庚子追諡懿德皇后爲宣懿皇后壬寅以宋魏國王和魯幹爲天下兵馬大元帥乙巳以北平郡王濬進封鄭王丁未北院樞密使耶律阿思加于越辛亥葬仁聖大孝文皇帝宣懿皇后于慶陵秋七月癸亥阻卜鐵驪來貢八月甲寅謁慶陵九月壬申謁懷陵

乙亥駐蹕藕絲淀冬十月壬辰謁乾陵甲辰上皇考昭懷太子諡曰大孝順聖皇帝廟號順宗皇妣曰貞順皇后十二月戊子以樞密副使張琳知樞密院事翰林學士張奉珪參知政事兼同知樞密院事癸巳宋遣黃寶來賀卽位丁酉高麗夏國並遣使來賀己巳詔先朝已行事不得陳告初以楊割爲生女直部節度使其俗呼爲太師是歲楊割死傳于兄之子烏雅東死其弟阿骨打襲

二年春正月如鴨子河二月辛卯如春州三月大寒冰復合夏四月辛亥詔誅乙辛黨徙其子孫于邊發乙辛得里特之墓剖棺戮屍以其家屬分賜被殺之家五月乙丑斡特刺獻耶覲刮等部捷六月壬辰以兩罷獵駐蹕散水原丙午夏國王李乾順復遣使請尙公主丁未南院大王陳家奴致仕壬子李乾順爲宋所攻遣李造福田若水求援閏月庚申策賢良壬申降惠妃爲庶人秋七月獵黑嶺以霖雨給獵人馬阻卜來侵斡特刺等戰敗之冬十月乙卯蕭海重叛劫乾州武庫器甲命北面林牙郝家奴捕之蕭海里亡入陪朮水阿典部丙寅以南府宰相耶律斡特刺爲北院樞密使參知政事牛溫舒知南院樞密使事十一月乙未郝家奴以不獲蕭海里免官壬寅以上京留守耶律慎思爲北院樞密副使有司請以帝生日爲天興節

三年春正月辛巳朔如混同江女直函蕭海里首遣使來獻戊申如春州二月庚午以武清縣大水弛其



破澤之禁夏五月戊子以獵人多亡嚴立科禁乙巳清暑赤勒嶺丙午謁慶陵六月辛酉夏國王李乾順復遣使請尙公主秋七月中京雨雹傷稼冬十月甲辰如中京己未吐蕃遣使來貢庚申夏國復遣使求援己巳有事于觀德殿十一月丙申文武百官加上尊號曰惠文智武聖孝天祚皇帝大赦以宋魏國王和魯幹爲皇太叔梁王撻魯進封燕國王鄭王溈爲東京留守進封越國王百官各進一階丁酉以惕隱耶律阿魯掃古爲南院大王戊戌以受尊號告廟乙巳謁太祖廟追尊太祖之高祖曰昭烈皇帝廟號肅祖妣曰昭烈皇后曾祖曰莊敬皇帝廟號懿祖妣曰莊敬皇后召監修國史耶律儼纂太祖諸帝實錄十二月戊申如藕絲淀是年放進士馬恭回等百二人

四年春正月戊子幸魚兒灤壬寅獵水嶺癸卯燕國王撻魯薨二月丁丑鼻骨德遣使來貢夏六月甲辰駐蹕旺國崖甲寅夏國遣李造福田若水求援癸亥吐蕃遣使來貢秋七月南京蝗庚辰獵南山癸未以西北路招討 得里底北院樞密副使耶律慎思並知北院樞密使事辛卯以同知南院樞密使事蕭敵里爲西北路招討使冬十月己酉鳳凰見于鄴陰己未幸南京十一月乙亥御迎月樓賜貧民錢十二月辛丑以張琳爲南府宰相

五年春正月乙亥夏國遣李造福等來求援且乞伐宋庚寅以遼興軍節度使蕭常哥爲北府宰相丁酉

遣樞密直學士高端禮等諷宋罷伐夏兵二月癸卯微行視民疾苦丙午幸鴛鴦濼三月壬申以族女南仙封成安公主下嫁夏國王李乾順夏四月甲申射虎炭山五月癸卯清暑南崖壬子宋遣曾孝廣王戩報聘六月甲戌夏國遣使來謝及貢方物己丑幸候里吉秋七月謁慶陵九月辛亥駐蹕藕絲淀乙卯謁乾陵冬十一月戊戌禁商賈之家應進士舉丙辰高麗三韓國公王顯薨子悞遣使來告十二月己巳夏國復遣李造福田若水求援癸酉宋遣林洙來儀與夏約和

六年春正月辛丑遣知北院樞密使蕭得里底知南院樞密使事牛溫舒使宋諷歸所侵夏地夏五月清暑散水原六月辛巳夏國遣李造福等來謝秋七月癸巳阻卜來貢甲午如黑嶺庚子獵鹿角山冬十月己亥宋與夏通好遣劉正符曹穆來告庚辰以皇太叔南京留守和魯幹兼惕隱東京留守越國王瀉爲南府宰相十一月乙未以謝家奴爲南院大王馬奴爲奚六部大王丙申行柴冊禮戊戌大赦以和魯幹爲義和仁聖皇太叔越國王淳進封魏國王封皇子敖盧幹爲晉王習泥烈爲饒樂郡王己亥謁太祖廟甲辰祠木葉山十二月己巳封耶律儼爲漆水郡王餘官進爵有差

七年春正月釣魚于鴨子河二月駐蹕大魚濼夏六月次散水原秋七月如黑嶺冬十月謁乾陵獵豎巫闔山是年放進士李石等百人

八年春正月如春州夏四月丙申封高麗王俱爲三韓國公贈其父顯爲高麗國王五月清暑散水原六月壬辰西北路招討使蕭敵里率諸蕃來朝丙申射柳祈雨壬寅夏國王李乾順以成安公主生子遣使來告丁未如黑嶺秋七月戊辰以雨罷獵冬十二月己卯高麗遣使來謝

九年春正月丙午朔如鴨子河二月如春州三月戊午夏國以宋不歸地遣使來告夏四月壬午五國部來貢六月乙亥清暑特禮嶺秋七月隕霜傷稼甲寅獵于候里吉八月丁酉雪罷獵冬十月癸酉望祀木葉山丁丑詔免今年租稅十二月甲申高麗遣使來貢是年放進士劉禎等九十人

十年春正月辛丑預行立春禮如鴨子河二月庚午朔駐蹕大魚灤夏四月丙子五國部長來貢丙戌預行再生禮癸巳獵于北山六月甲戌清暑玉巳癸未夏國遣李造福等來貢甲午阻卜來貢秋七月辛丑謁慶陵閏月辛亥謁懷陵己未謁祖陵壬戌皇太叔和魯幹薨九月甲戌免重九節禮冬十月駐蹕藕絲淀十二月己酉改明年元是歲大饑

天慶元年春正月釣魚于鴨子河二月如春州三月乙亥五國部長來貢夏五月清暑散水原秋七月獵冬十月駐蹕藕絲淀

二年春正月己未朔如鴨子河丁丑五國部長來貢二月丁酉如春州幸混同江釣魚界外生女直酋長

在于里內者以故事皆來朝適遇頭魚宴酒半酣上臨軒命諸酋次第起舞獨阿骨打辭以不能諭之再三終不從他日上密謂樞密使蕭舉先曰前日之燕阿骨打意氣雄豪顧視不常可託以邊事誅之否則必貽後患奉先曰蠢人不知禮義無大過而殺之恐傷向化之心假有異志又何能爲其弟吳乞買粘罕胡舍等嘗從獵能呼鹿刺虎搏熊上喜輒加官爵夏六月庚寅清暑南崖甲午和州回鶻來貢戊戌成安公主來朝甲辰阻卜來貢秋七月乙丑獵南山九月己未射獲熊燕羣臣上親御琵琶初阿骨打混同江宴歸疑上知其異志遂稱兵先併旁近部族女直趙三阿鶻產拒之阿骨打虜其家屬二人走訴咸州詳穩司送北樞密院樞密使蕭奉先作常事以聞上仍送咸州詰責欲使自新後數召阿骨打竟稱疾不至冬十月辛亥高麗三韓國國王俱之母死來告卽遣使致祭起復是月駐蹕奉聖州十一月乙卯幸南京丁卯謁太祖廟是年放進士韓昉等七十七人

三年春正月丙寅賜南京貧民錢丁卯如大魚灤甲戌禁僧尼破戒丙子獵狗牙山大寒獵人多死三月籍諸道戶徙大牢古山圍場地居民于別土阿骨打一日率五百騎突至咸州吏民大驚翌日赴詳穩司與趙三等面折庭下阿骨打不屈送所司問狀一夕遁去遣人訴于上謂詳穩司欲見殺故不敢留自是召不復至夏閏四月李弘以左道聚衆爲亂支解分示五京六月乙卯斡朗改國遣使來貢良犬丙辰夏

國遣使來貢秋七月幸秋山九月駐蹕藕絲淀十一月甲午以三司使虞融知南院樞密使事西南面招討使蕭樂古爲南府宰相十二月庚戌高麗遣使來謝致祭癸丑回鶻遣使來貢甲寅以樞密直學士馬人望參知政事丙辰知樞密院事耶律儼薨癸亥高麗遣使來謝起復

四年春正月如春州初女直起兵以紇石烈部人阿疎不從遣其部撒改討之阿疎弟狄故保來告詔諭使勿討不聽阿疎來奔至是女直遣使來索不發夏五月清暑散水原秋七月女直復遣使取阿疎不發乃遣侍御阿息保問境上多建城堡之故女直以慢語答曰若還阿疎朝貢如故不然城未能已遂發渾河北諸軍益東北路統軍司阿骨打乃與弟粘罕胡舍等謀以銀朮割移烈婁室闍母等爲帥集女直諸部兵擒遼障鷹官及攻寧江州東北路統軍司以聞時上在慶州射鹿聞之略不介意遣海州刺史高仙壽統渤海軍應援蕭撻不也遇女直戰于寧江東敗績十月壬寅以守司空蕭嗣先爲東北路都統靜江軍節度使蕭撻不也爲副發契丹奚軍三千人中京禁兵及土豪二千人別選諸路武勇二千餘人以虞候崔公義爲都押官控鶴指揮邢穎爲副引軍屯出河店兩軍對壘女直軍潛渡混同江掩擊遼衆蕭嗣先軍潰崔公義邢穎耶律佛留蕭葛十等死之其獲免者十有七人蕭奉先懼其弟嗣先獲罪輒奏東征潰軍所至劫掠若不肆赦恐聚爲患上從之嗣先但免官而已諸軍相謂曰戰則有死而無功退則有生



而無罪故士無鬪志望風奔潰十一月壬辰都統蕭敵里等營于幹鄰灤東又爲女直所襲士卒死者甚衆甲午蕭敵里亦坐免官辛丑以西北路招討使耶律幹里朶爲行軍都統副點檢蕭乙薛同知南院樞密使事耶律章奴副之十二月咸賓祥三州及鐵驪兀惹皆叛入女直乙薛往援賓州南軍諸將實婁特烈等往援咸州並爲女直所敗

天祚紀一五年十二月己巳夏國復遣李造福若水求援癸酉宋遣林洙來議與夏約和○林洙宋史作

林據

遼史卷二十七考證

遼史卷二十八

元 中 書 右 丞 相 總 裁 脫 脫 等 修

本紀第二十八

天祚皇帝二

五年春正月下詔親征遣僧家奴持書約和斤阿骨打名阿骨打遣襄刺復書若歸叛人阿疎遷黃龍府於別地然後議之都統耶律斡里朶等與女直兵戰于達魯古城敗績二月饒州渤海古欲等反自稱大王三月以蕭謝佛留等討之遣耶律張家奴等六人齋書使女直斥其主名冀以速降夏四月癸丑蕭謝佛留等爲渤海古欲所敗以南面副部署蕭陶蘇幹爲都統赴之五月陶蘇幹及古欲戰敗績張家奴等以阿骨打書來復遣之往六月己亥朔清暑特禮嶺壬子張家奴等還阿骨打復書亦斥名諭之使降癸丑以親征諭諸道丙辰陶蘇幹招獲古欲等癸亥以惕隱耶律末里爲北院大王是月遣蕭辭刺使女直以書辭不屈見留秋七月辛未宋遣使致助軍銀絹丙子獵于嶺東是月都統斡里朶等與女直戰于白馬灤敗績八月甲子罷獵趨軍中以斡里朶等軍敗免官丙寅以圍場使阿不爲中軍都統耶律張家奴爲都監率番漢兵十萬蕭奉先充御營都統諸行營都部署耶律章奴爲副以精兵二萬爲先鋒餘分五

部爲正軍貴族子弟千人爲硬軍扈從百司爲護衛軍北出駱駝口以都點檢蕭胡觀姑爲都統樞密直學士柴誼爲副將漢步騎三萬南出靈江州自長春州分道而進發數月糧期必滅女直九月丁卯朔女直軍陷黃龍府己已知北院樞密使蕭得里底出爲西南面招討使辭刺遷女直復遣賽刺以書來報若歸我叛人阿疎等卽當班師上親征粘罕兀朮等以書來上陽爲卑哀之辭實欲求戰書上上怒下詔有女直作過大軍翦除之語女直主聚衆誓面仰天慟哭曰始與汝等起兵蓋苦契丹殘忍欲自立國今主上親征奈何非人死戰莫能當也不若殺我一族汝等迎降轉禍爲福諸軍皆曰事已至此惟命是從乙巳耶律章奴反奔上京謀迎立魏國王溥上遣駙馬蕭昱領兵詣廣平淀護后妃行宮小底乙信持書馳報魏國王時章奴先遣王妃親弟蕭諦里以所謀說魏國王王曰此非細事主上自有諸王當立北南面大臣不來而汝言及此何也密令左右拘之有頃乙信等齎御札至備言章奴等欲廢立事魏國王立新蕭諦里等首以獻單騎問道詣廣平淀待罪上遇之如初章奴知魏國王不聽率麾下掠慶曉懷祖等州結渤海羣盜衆至數萬趨廣平淀犯行宮順國女直阿鶻產以三百騎一戰而勝擒其貴族二百餘人並斬首以徇其妻子配役繡院或散諸近侍爲婢餘得脫者皆奔女直章奴詐爲使者欲奔女直爲邏者所獲縛送行在腰斬于市剖其心以獻祖廟支解以徇五路冬十一月遣駙馬蕭特末林牙蕭察刺等將騎



兵五萬步卒四十萬親軍七十萬至駝門十二月乙巳耶律張家奴叛戊申親戰于護步答岡敗績盡亡其輜重己未錦州刺史耶律朮者叛應張家奴庚申北面林牙耶律馬哥討張家奴癸亥以北院宣徽使蕭韓家奴知北院樞密使事南院宣徽使特末爲漢人行宮都部署

六年春正月丙寅朔東京夜有惡少年十餘人乘酒執刃踰垣入留守府問留守蕭保先所在今軍變請爲備蕭保先出刺殺之戶部使大公鼎聞亂卽攝留守事與副留守高清明集奚漢兵千人盡捕其衆斬之撫定其民東京故渤海地太祖力戰二十餘年乃得之而蕭保先嚴酷北海苦之故有是變其裨將渤海高永昌僭號稱隆基元年遣蕭乙薛高興順招之不從閏月己亥遣蕭韓家奴張琳討之戊午貴德州守將耶律余覲以廣州渤海叛附永昌我師擊敗之二月戊辰侍御司徒撻不也等討張家奴戰于祖州敗績乙酉遣漢人行宮都部署蕭特末率諸將討張家奴戊子張家奴誘饒州渤海及中京賊侯檠等萬餘人攻陷高州三月東面行軍副統酬斡等擒侯檠于川州夏四月戊辰親征張家奴癸酉敗之甲戌誅叛黨饒州渤海平丙子賞平賊將士有差而蕭韓家奴張琳等復爲賊所敗五月清暑散水原女直軍攻下瀋州復陷東京擒高永昌東京州縣族人痕字鐸刺吳十撻不也道刺酬斡等十三人皆降女直六月乙丑籍諸路兵有雜畜十頭以上者皆從軍庚辰魏國王溥進封秦晉國王爲都元帥上京留守蕭撻不

也爲契丹行宮都部署兼副元帥丁亥知北院樞密使事蕭韓家奴爲上京留守秋七月獵秋山春州渤海二千餘戶叛東北路統軍使勒兵追及盡俘以還八月烏古部叛遣中丞耶律撻不也等招之九月丙午謁懷陵冬十月丁卯以張琳軍敗奪官庚辰烏古部來降十一月東面行軍副統馬哥等攻曷蘇館敗續十二月乙亥封庶人蕭氏爲太皇太妃辛巳削副統耶律馬哥官

七年春正月甲寅滅麻馬粟分給諸局是月女直軍攻春州東北面諸軍不戰自潰女古虜室四部及渤海人皆降復下泰州二月涑水縣賊董龐兒聚衆萬餘西京留守蕭乙薛南京統軍都監查刺與戰于易水破之三月龐兒黨復聚乙薛復擊破之于奉聖州夏五月庚寅東北面行軍諸將涅里合魯涅哥虛古等棄市乙巳諸圍場墮地縱百姓樵採六月辛巳以同知樞密院事余里也爲北院大王秋七月癸卯獵秋山八月丙寅獵狝斯那里山命都元帥秦晉王赴沿邊會四路兵馬防秋九月上自燕至陰涼河置怨軍入營募自宜州者曰前宜後宜自錦州者曰前錦後錦自乾自顯者曰乾曰顯又有乾顯大營巖州營凡二萬八千餘人屯衛州蒺藜山丁酉獵蝟子山冬十月乙卯朔至中京十二月丙寅都元帥秦晉國王瀉遇女直軍戰于蒺藜山敗績女直復拔顯州旁近州郡庚午下詔自責癸酉遣夷離畢查刺與大公鼎諸路募兵丁丑以西京留守蕭乙薛爲北府宰相東北路行軍都統奚霞未知奚大部大王事是歲女直

阿骨打用鐵州楊朴策卽皇帝位建元天輔國號金楊朴又言自古英雄開國或受禪必先求大國封冊遂遣議和以求封冊

八年春正月幸鴛鴦濼丁亥遣耶律奴哥等使金議和庚寅保安軍節度使張崇以雙州二百戶降金東路諸州盜賊蜂起掠民自隨以充食二月耶律奴哥還自金金主復書曰能以兄事朕歲貢方物歸我上中京興中府三路州縣以親王公主駙馬大臣子孫爲質還我行人及元給信符并宋夏高麗往復書詔表牒則可以如約三月甲午復遣奴哥使金夏四月辛酉以西南面招討使蕭得里底爲北院樞密使五月壬午朔奴哥以書來約不踰此月見報戊戌復遣奴哥使金要以酌中之議是月至納葛濼賊安生兒張高兒聚衆二十萬耶律馬哥等斬生兒于龍化州高兒亡入懿州與霍大哥相合金主遣胡突衰與奴哥持書報如前約六月丁卯遣奴哥等齎宋夏高麗書詔表牒至金霍大哥陷海北州趣義州軍帥回離保等擊敗之通祺雙遼四州之民八百餘戶降于金秋七月獵秋山金復遣胡突衰來免取質子及上京興中府所屬州郡裁減歲幣之數如能以兄事朕冊用漢儀可以如約八月庚午遣奴哥突迭使金議冊禮九月突迭見留遣奴哥還謂之曰言如不從勿復遣使閏月丙寅遣奴哥復使金而蕭寶訛里等十五人各率戶降于金冬十月奴哥突迭持金書來龍化州張應古等四人率衆降金十一月副元帥蕭撻不

也薨十二月甲申議定冊禮遣奴哥使金寧昌軍節度使劉宏以懿州戶三千降金時山前諸路大饑乾顯宜錦興中等路斗粟直數緡民削榆皮食之既而人相食是年放進士王翬等百三人

九年春正月金遣烏林答贊謨持書來迎冊二月至駕鴛灤賊張撒八誘中京射糧軍僭號南面軍帥余觀擒撒八三月丁未朔遣知右夷裔軍事蕭習泥烈等冊金主爲東懷國皇帝己酉烏林答贊謨奴哥等先以書報夏五月阻卜補疎只等叛執招討使耶律幹里朶都監蕭斜里得死之秋七月獵南山金復遣烏林答贊謨來責冊文無兄事之語不貢大金而云東懷乃小邦懷其德之義及冊文有渠材二字語涉輕侮若遙芬多戰等語皆非善意殊乖體式如依前書所定然後可從楊詢卿羅子韋率衆降金八月以趙王習泥烈爲西京留守九月至西京復遣習泥烈楊立忠先持冊藁使金冬十月甲戌朔耶律陳圖奴等二十餘人謀反伏誅是月遣使送烏林答贊持書以還

十年春二月幸鴛鴦灤金復遣烏林答贊謀持書及冊文副本以來仍責乞兵于高麗三月己酉民有羣馬者令取其一給東路軍庚申以金人所定大聖二字與先世稱號同復遣習泥烈往議金主怒遂絕之夏四月獵胡土白山聞金師再舉耶律白斯不等選精兵三千以濟遼師五月金主親攻上京克外郭留守撻不也率衆出降六月乙酉以北府宰相蕭乙薛爲上京留守知鹽鐵內省兩司東北統軍司事秋獵

沙嶺冬復至西京

乾隆四年校刊

遼史卷二十八 本紀

四





元中書右丞相總裁脫脫等修

本紀第二十九

天祚皇帝三

保大元年春正月丁酉朔改元肆赦初金人興兵郡縣所失幾半上有四子長趙王母趙昭容次晉王母文妃次秦王許王皆元妃生國人知晉王之賢深所屬望元妃之兄樞密使蕭奉先恐秦王不得立潛圖之文妃姊妹三人長適耶律撻曷里次文妃次適余覲一日其姊若妹俱會軍前奉先諷人誣駙馬蕭昱及余覲等謀立晉王事覺昱撻曷里等伏誅文妃亦賜死獨晉王未忍加罪余覲在軍中聞之大懼卽率千餘騎叛入金上遣知奚王府事蕭遐買北府宰相蕭德恭太常袞耶律諦里姑歸州觀察使蕭和尚奴四軍太師蕭幹將所部兵追之及諸閭山縣諸將議曰主上信蕭奉先言奉先視吾輩蔑如也余覲乃宗室豪俊常不肯爲奉先下若擒余覲他日吾黨皆余覲也不若縱之還卽給曰追襲不及奉先旣見余覲之亡恐後日諸校亦叛遂勸驟加爵賞以結衆心以蕭遐買爲奚王蕭德恭試中書門下平章事兼判上京留守事耶律諦里姑爲龍虎衛上將軍蕭和尚奴金吾衛上將軍蕭幹鎮國大將軍二月幸鴛鴦濼夏

五月至曷里狝秋七月獵炭山九月至南京冬十一月癸亥以西京留守趙王習泥烈爲惕噤

二年春正月乙亥金克中京進下澤州上出居庸關至鴛鴦灤聞余覲引金人婁室孛堇奄至蕭奉先曰  
余覲乃王子班之苗裔此來欲立甥晉王耳若爲社稷計不惜一子明其罪誅之可不戰而余覲自迴矣  
上遂賜晉王死素服三日耶律撒八等皆伏誅王素有人望諸軍聞其死無不流涕由是人心解體余覲  
引金人逼行宮上率衛兵五千餘騎幸雲中遣傳國璽于桑乾河二月庚寅朔日有食之既甲午知北院  
大王事耶律馬哥漢人行宮都部署蕭特末並爲都統大和宮使耶律補得副之將兵屯鴛鴦灤己亥金  
師敗奚王霞末于北安州遂降其城三月辛酉上聞金師將出嶺西遂趨白水灤乙丑羣特使謨魯斡降  
金丙寅上至女古底倉聞金兵將近計不知所出乘輕騎入夾山方悟奉先之不忠怒曰汝父子誤我至  
此今欲誅汝何益于事恐軍心忿怨爾曹避敵苟安禍必及我其勿從行奉先下馬哭拜而去行未數里  
左右執其父子縛送金兵金人斬其長子昂以奉先及其次子昱械送金主道遇遼軍奪以歸國遂並賜  
死逐樞密使蕭得里底召撻不也典禁衛丁卯以北院樞密副使蕭僧孝奴知北院樞密使事同知北院  
樞密使事蕭查刺爲左夷裔畢戊辰同知殿前點檢事耶律高八率衛士降金己巳偵人蕭和尚牌印郎  
君耶律晒斯爲金師所獲癸酉以諸局百工多亡凡扈從不限吏民皆官之初詔留宰相張琳李處溫與

秦晉國王瀆守燕處温聞上入夾山數日命令不通卽與弟處能子爽外假怨軍內結都統蕭幹謀立瀆遂與諸大臣耶律大石左企弓虞仲文曹勇義康公彌集蕃漢百官諸軍及父老數萬人詣瀆府處温邀張琳至白其事琳曰攝政則可處温曰天意人心已定請立班耳處温等請瀆受禮瀆方出李爽持赭袍被之令百官拜舞山呼瀆驚駭再三辭不獲已而從之以處温守太尉左企弓守司徒曹勇義知樞密院事虞仲文參知政事張琳守太師李處能直樞密院李爽爲少府少監提舉翰林醫官李爽陳祕十餘人曾與大計並賜進士及第授官有差蕭幹爲北樞密使駙馬都尉蕭旦知樞密院事改怨軍爲常勝軍於是肆赦自稱天錫皇帝改元建福降封天祚爲湘陰王遂據有燕雲平及上京遼西六路天祚所有沙漠已北西南西北路兩都招討府諸蕃部族而已夏四月辛卯西南面招討使耶律佛頂降金雲內窻邊東勝等州皆降阿疎爲金兵所擒金已取西京沙漠以南部族皆降上遂遁於訛莎烈時北部謨葛失曠馬馳食羊五月甲戌都統馬哥收集散亡會于漚里謹丙子以馬哥知北院樞密使事兼都統六月瀆寢疾聞上傳檄天德雲內朔武應蔚等州合諸蕃精兵五萬騎約以八月入燕并遣人問勞索衣裘茗藥瀆甚驚命南北面大臣議而李處温蕭幹等有迎秦拒湘之說集蕃漢百官議之從其議者東立惟南面行營都部署耶律窻西立處温等問故窻曰天祚果能以諸蕃兵大舉奪燕則是天數未盡豈能拒之否則秦

湘父子也拒則皆拒自古安有迎子而拒其父者處温等相顧微笑以盥扇亂軍心欲殺之溱歛枕長歎曰彼忠臣也焉可殺天祚果來吾有死耳復何面目相見耶已而溱死衆乃議立其妻蕭氏爲皇太后主軍國事奉遺命迎立天祚次子秦王定爲帝太后遂稱制改元德興處温父子懼禍南通童貫欲挾蕭太后納土于宋北通于金欲爲內應外以援立大功自陳蕭太后罵曰誤秦晉國王者皆汝父子悉數其過數十賜死嚮其子爽而磔之籍其家得錢七萬緡金玉寶器稱是爲宰相數月之間所取也謨葛失以兵來援爲金人敗于洪灰水擒其子陀古及其屬阿敵音夏國援兵至亦爲金所敗秋七月丁巳朔敵烈部皮室叛烏古部節度使耶律棠古討平之加太子太保乙丑上京毛八十率二千戶降金辛未夏國遣曹价來問起居八月戊戌親遇金軍戰于石鞏驛敗績都統蕭特末及其姪撒古被執辛丑會軍于歡撻新查刺金兵追之急棄輜重以遁九月敵烈部叛都統馬哥克之冬十月金兵攻蔚州降十一月乙丑聞金兵至奉聖州遂率衛兵屯于落昆髓秦晉王溱妻蕭德妃五表于金求立秦王不許以勁兵守居庸及金兵臨關崖石自崩戍卒多壓死不戰而潰德妃出古北口趨天德軍十二月知金主撫定南京上遂由埽

里關出居四部族詳穩之家

三年春正月丁巳奚王回离保僭號稱天復元年命都統馬哥討之甲子初張毅爲遼興軍節度副使民



推轂領州事秦晉王濬旣死蕭德妃遣時立愛知平州馘知遼必亡練兵畜馬籍丁壯爲備立愛至馘弗  
納金帥粘罕入燕首問平州事於故參知政事康公弼公弼曰馘狂妄寡謀雖有鄉兵彼何能爲示之不  
疑圖之未晚金人招時立愛赴軍前加馘臨海軍節度使仍知平州旣而又欲以精兵三千先下平州擒  
張馘公弼曰若加兵是趣之叛也公弼請自往覘之馘謂公弼曰遼之八路七路已降獨平州未解甲者  
防蕭幹耳厚賂公弼而還公弼復粘罕曰彼無足慮金人遂改平州爲南京加馘試中書門下平章事判  
留守事庚辰宜錦乾顯成川豪懿等州相繼皆降上京盧彥綸叛殺契丹人二月乙酉朔興中府降金來  
州歸德軍節度使田顥權隰州刺史杜師回權遷州刺史高永昌權閭州刺史張成皆籍所管戶降金丙  
戌誅蕭德妃降濬爲庶人盡釋其黨癸巳興中宜州復城守三月駐蹕于雲內州南夏四月甲申朔以知  
北院樞密使蕭僧孝奴爲諸道大都督丙申金兵至居庸關擒耶律大石戊戌金兵圍鞬重于青塚硬寨  
太保特母哥竊梁王雅里以遁秦王許王諸妃公主從臣皆陷沒庚子梁宋大長公主特里亡歸壬寅金  
遣人來招癸卯答言請和丙午金兵送族屬鞬重東行乃遣兵邀戰于白水灤趙王習泥烈蕭道靈皆被  
執上遣牌印郎君謀盧瓦送免紐金印僞降遂西遁雲內駙馬都尉乳奴詣金降己酉金復以書來招答  
其書壬子金帥書來不許請和是月特母哥挈雅里至上怒不能盡救諸子請之五月乙卯夏國王李乾

順遣使請臨其國庚申軍將耶律敵烈等夜劫梁王雅里奔西北部立以爲帝改元神祿辛酉渡河止于金肅軍北回鹘保爲衆所殺六月遣使冊李乾順爲夏國皇帝秋九月耶律大石自金來歸冬十月復渡河東還居突呂不部梁王雅里歿耶律朮烈繼之十一月突烈爲衆所殺

四年春正月上趨都統馬哥軍金人來攻棄營北遁馬哥被執謨葛失來迎驢馬馳羊又率部人防衛時侍從乏糧數日以衣易羊至烏古敵烈部以都點檢蕭乙薛知北院樞密使事封謨葛失爲神于越王特母哥降金二月耶律遙設等十人謀叛伏誅夏五月金人旣克燕驅燕之大家東徙以燕空城及涿易檀順景薊州與宋以塞盟左企弓康公弼曹勇義虞仲文皆東遷燕民流離道路不勝其苦入平州言於留守張穀曰宰相左企弓不謀守燕使吾民流離無所安集公今臨巨鎮握強兵盡忠於遼必能使我復歸鄉土人心亦惟公是望穀遂召諸將領議皆曰聞天祚兵勢復振出沒漠南公若仗義勤王奉迎天祚以圖中興先責左企弓等叛降之罪而誅之盡歸燕民使復其業而以平州歸宋則宋無不接納平州遂爲藩鎮矣卽後日金人加兵內用平山之軍外得宋爲之援又何懼焉穀曰此大事也不可草草翰林學士李石智而多謀可召與議石至其言與之合乃遣張謙率五百餘騎傳留守令召宰相左企弓曹勇義樞密使虞仲文叅知政事康公弼至灤河西岸遣議事官趙秘校往數十罪曰天祚播遷夾山不卽奉迎一

也勸皇叔秦晉王僭號二也詆訐君父降封湘陰三也天祚遣知閤王有慶來議事而殺之四也檄書始至有迎秦拒湘之議五也不謀守燕而降六也不顧大義臣事于金七也根括燕財取悅于金八也使燕人遷徙失業九也教金人發兵先下平州十也爾有十罪所不容誅左企弓等無以對皆縊殺之仍稱保大三年晝天祚象朝夕謁事必告而後行稱遼官秩六月榜諭燕人復業恆產爲常勝軍所占者悉還之燕民旣得歸大悅翰林學士李石更名安弼偕故三司使高黨往燕山說宋王安中曰平州帶甲萬餘數有文武材可用爲屏翰不然將爲肘腋之患安中深然之令安弼與黨詣宋主詔帥臣王安中詹度厚加安撫與免三年常賦弼聞之自謂得計秋七月金人屯來州閤母聞平州附宋以二千騎問罪先入營州弼以精兵萬騎擊敗之宋建平州爲泰寧軍以弼爲節度使以安弼黨爲徽猷閣待制令宣撫司出銀絹數萬犒賞弼喜達迎金人諜知舉兵來襲弼不得歸奔燕金人克三州始來索弼王安中諱之索急斬一人貌類者去金人曰非弼也以兵來取安中不得已殺弼函其首送金天祚旣得林牙耶律大石兵歸又得陰山室韋謨萬失兵自謂得天助再謀出兵復收燕雲大石林牙力諫曰自金人初陷長春遼陽則車駕不幸廣平淀而都中京及陷上京則都燕山及陷中京則幸雲中自雲中而播遷夾山向以全師不謀戰備使舉國漠地皆爲金有國勢至此而方求戰非計也當養兵待時而動不可輕舉不從大石遂殺

乙薛及坡里括置北南面官屬自立爲王率所部西去上遂率諸軍出夾山下漁陽嶺取天德東勝靈邊雲內等州南下武州遇金人戰于奄遏下水復潰直趨山陰八月國舅詳穩蕭撻不也筆硯祇侯察刺降金是月金主阿骨打死九月建州降金冬十月納突呂不部人訛哥之妻諳葛以訛哥爲本部節度使昭古牙率衆降金攻興中府降之十一月從行者舉兵亂北護衛太保才者舍利詳穩牙不里等擊敗之十二月置二總管府

元中書右丞相總裁脫脫等修

本紀第三十

天祚皇帝四

五年春正月辛巳党項小斛祿遣人請臨其地戊子趨天德過沙漠金兵忽至上徒步出走近侍進珠帽却之乘張仁貴馬得脫至天德己丑遇雪無禦寒具亦者以貂裘帽進途次絕糧亦者進麩與棗欲憩亦者卽跪坐倚之假寐亦者輩惟齧冰雪以濟饑過天德至夜將宿民家給曰偵騎其家知之乃叩馬首跪而大慟潛宿其家居數日嘉其忠遙授以節度使遂趨党項以小斛祿爲西南面招討使總知軍事仍賜其子及諸校爵賞有差二月至應州新城東六十里爲金人完顏婁室等所獲八月癸卯至金丙午降封海濱王以疾終年五十有四在位二十四年金皇統元年二月改封豫王五年葬于廣寧府閭陽縣乾陵傍耶律濬者世號爲北遼濬小字涅里興宗第四孫南京留守宋魏王和魯斡之子清寧初太后鞠育之旣長篤好文學昭懷太子得罪上欲以濬爲嗣上怒耶律白斯不知與濬善出濬爲彰聖等軍節度使天祚卽位進王鄭乾統二年加越王六月拜南府宰相首議制兩府禮儀上喜徙王魏其父和魯斡薨卽以



溥襲父守南京冬夏入朝寵冠諸王天慶五年東征都監章奴濟鴨子河與溥子阿撒等三百餘人亡歸先遣敵里等以廢立之謀報溥溥斬敵里首以獻進封秦晉國王拜都元帥賜金券免漢拜禮不名許自擇將士乃募燕雲精兵東至錦州隊長武朝彥作亂劫溥溥匿而免收朝彥誅之會金兵至聚兵戰于阿里軫斗敗績收亡卒數千人拒之溥入朝釋其罪詔南京刻石紀功保大二年天祚入夾山奚王回離保林牙耶律大石等引唐靈武故事議欲立溥溥不從官屬勸進曰主上蒙塵中原擾攘若不立王百姓何歸宜熟計之遂卽位百官上號天錫皇帝改保大二年爲建福元年大赦放進士李寶信等一十九人遙降天祚爲湘陰王以燕雲平上京中京遼西六路溥主之沙漠以北南北路兩都招討府諸蕃部族等仍隸天祚自此遼國分矣封其妻普賢女爲德妃以回離保知北院樞密使事軍旅之事悉委大石又遣使報宋免歲幣結好宋人發兵問罪擊敗之尋遣使奉表于金乞爲附庸事未決溥病死年六十百官僞諡曰孝章皇帝廟號宣宗葬燕西香山永安陵遺命遙立秦王定以存社稷德妃爲皇太后稱制改建福爲德興元年放進士李球等百八人時宋兵來攻戰敗之由是人心大悅兵勢日振宰相李純等潛納宋兵居民內應抱關者被殺甚衆翌日攻內東門衛兵力戰宋軍大潰踰城而走死者相籍五表于金求立秦王不從而金兵大至德妃奔天德軍見天祚天祚怒誅德妃降溥庶人除其屬籍耶律雅里者天祚皇帝

第一子也字撒鷲七歲欲立爲皇太子別置禁衛封梁王保大三年金師圍青塚寨雅里在軍中太保特母哥挾之出走間道行至陰山聞天祚失利趨雲內雅里馳赴時扈從者千餘人多於天祚天祚慮特母哥生變欲誅之責以不能全救諸王將訊之仗劍召雅里問曰特母哥教汝何爲雅里對曰無他言迺釋之天祚渡河奔夏隊帥耶律敵烈等劫雅里北走至沙嶺見蛇橫道而過識者以爲不祥後三日羣僚共立雅里爲主雅里遂卽位改元神厯命士庶上便宜雅里性寬大惡誅殺獲亡者笞之而已有自歸者卽官之國謂左右曰欲附來歸不附則去何須威逼耶每取唐貞觀政要及林牙資忠所作治國詩令侍從讀之烏古部節度使乂哲迭列部統軍撻不也都監突里不等各率其衆來附自是諸部繼至而雅里日漸荒怠好擊鞠特母哥切諫乃不復出以耶律敵烈爲樞密使特母哥副之敵烈劾西北路招討使蕭乂里熒惑衆心志有不臣與其子麻涅並誅之以遙設爲招討使與諸蕃戰數敗杖免官從行有疲困者輒振給之直長保德諫曰今國家空虛賜賚若此將何以相給耶雅里怒曰昔畋於福山卿誣獵官今復有此言若無諸部我將何取不納初令羣牧運鹽礮倉粟而民盜之議籍以償雅里乃自爲直每粟一車償一羊三車一牛五車一馬八車一駝左右曰今一羊易粟二斗且不可得乃償一車雅里曰民有則我有若令盡償民何堪後獵查刺山一日而射黃羊四十狼二十一因致疾卒年三十耶律大石者世號爲西

遼大石字重德太祖八代孫也通遼漢字善騎射登天慶五年進士第擢翰林應奉尋陞承旨遼以翰林  
爲林牙故稱大石林牙歷泰祥二州刺史遼興軍節度使保大二年金兵日逼天祚播越與諸大臣立秦  
晉王濬爲帝濬死立其妻蕭德妃爲太后以守燕及金兵至蕭德妃歸天祚天祚怒誅德妃而責大石曰  
我在汝何敢立濬對曰陛下以全國之勢不能一拒敵棄國遠遁使黎民塗炭卽立十濬皆太祖子孫豈  
不勝乞命於他人耶上無以答賜酒食赦其罪大石不自安遂殺蕭乙薛坡里括自立爲王率鐵騎二百  
宵遁北行三日過黑水見白達達詳穩牀古兒牀古兒獻馬四百馳二十羊若干西至可敦城駐北庭都  
護府會威武崇德會蕃新大林紫河馳等七州及大黃室韋敵刺王紀刺茶赤刺也喜鼻古德尼刺達刺  
乖達密里密兒紀合主烏古里阻卜普速完唐古忽母思奚的札而畢十八部王衆諭曰我祖宗艱難創  
業歷世九主歷年二百金以臣屬逼我國家殘我黎庶屠翦我州邑使我天祚皇帝蒙塵于外日夜痛心  
疾首我今仗義而西欲借力諸蕃翦我仇敵復我疆宇惟爾衆亦有軫我國家憂我社稷思共救君父濟  
生民於難者乎遂得精兵萬餘置官吏立排甲具器仗明年二月甲午以青牛白馬祭天地祖宗整旅而  
西先遣書回鶻王畢勒哥曰昔我太祖皇帝北征過卜古罕城卽遣使至甘州詔爾祖烏母主曰汝思故  
國耶朕卽爲汝復之汝不能返耶朕則有之在朕猶在爾也爾祖卽表謝以爲遷國于此十有餘世軍民

皆安土重遷不能復返矣是與爾國非一日之好也今我將西至大食假道爾國其勿致疑畢勒哥得書  
卽迎至邸大宴二日臨行獻馬六百驢百羊三千願質子孫爲附庸送至境外所過敵者勝之降者安之  
兵行萬里歸者數國獲駝馬牛羊財物不可勝計軍勢日盛銳氣日倍至尋思于西域諸國舉兵十萬號  
忽兒珊來拒戰兩軍相望二里許諭將士曰彼軍雖多而無謀攻之則首尾不救我師必勝遣大院司大  
王蕭幹里刺招討副使耶律松山等將兵二千五百攻其右樞密副使蕭刺阿不招討使耶律木薛等將  
兵二千五百攻其左自以衆攻其中三軍俱進忽兒珊大敗僵屍數十里駐軍尋思于凡九十日回國  
王來降貢方物又西至起兒漫文武百官冊立大石爲帝以甲辰歲二月五日卽位年三十八號萬兒罕  
復上漢母號曰天祐皇帝改元延慶追諡祖父爲嗣元皇帝祖母爲宣義皇后冊元妃蕭氏爲昭德皇后  
因謂百官曰朕與卿等行三萬里跋涉沙漠夙夜艱勤賴祖宗之福卿等之力冒登天位爾祖爾父宜加  
卹典共享尊榮自蕭幹里刺等四十九人祖父封爵有差延慶三年班師東歸馬行二十日得善地遂建  
都城號虎思斡耳朶改延慶爲康國元年三月以大院司大王蕭幹里刺爲兵馬都元帥敵刺部前同知  
樞密院事蕭查刺阿不副之茶赤刺部禿魯耶律燕山爲都部署護衛耶律鐵哥爲都監率七萬騎東征  
以青牛白馬祭天樹旗以誓于衆曰我大遼自太祖太宗艱難而成帝業其後嗣君耽樂無厭不恤國政

盜賊蠭起天下土崩朕率爾眾遠至朔漠期復大業以光中興此非朕與爾世居之地申命元帥斡里刺  
曰今汝其信賞必罰與士卒同甘苦擇善水草以立營量敵而進毋自取禍敗也行萬餘里無所得牛  
馬多死勒兵而還大石曰皇天弗順數也康國十年歿在位二十年廟號德宗子夷列年幼遺命皇后權  
國后名塔不烟號感天皇后稱制改元咸清在位七年子夷列卽位改元紹興籍民十八歲以上得八萬  
四千五百戶在位十三年歿廟號仁宗子幼遺詔以妹普速完權國稱制改元崇福號承天太后後與駙  
馬蕭朶魯不弟朴古只沙里通出駙馬爲東平王羅織殺之駙馬父斡里刺以兵圍其宮射殺普速完及  
朴古只沙里普速完在位十四年仁宗次子直魯古卽位改元天禧在位三十四年時秋出獵乃蠻王屈  
出律以伏兵八千擒之而據其位遂襲遼衣冠尊直魯古爲太上皇皇后爲皇太后朝夕問起居以待終  
焉直魯古死遼絕耶律淳在天祚之世歷王大國受賜金券贊拜不名一時恩遇無與爲比當天祚播越  
以都元帥留守南京獨不可奮大義以激燕民及諸大臣興勤王之師東拒金而迎天祚乎乃自取之是  
篡也况忍王天祚哉大石旣帝淳而王天祚矣復歸天祚天祚責以大義乃自立爲王而去之幸藉祖宗  
餘威遺智楚號萬里之外雖寡母弱子更繼迭承幾九十年亦可謂難矣然淳與雅里大石之立皆在天  
祚之世有君而復君之其可乎哉諸葛武侯爲獻帝發喪而後立先主爲帝者不可同年語矣故著以爲



戒云

贊曰遼起朔野兵甲之盛鼓行畿外席卷河朔樹晉楨漢何其壯歟太祖太宗乘百戰之勢輯新造之邦英謀叡略可謂遠矣雖以世宗中才穆宗殘暴連遭弑逆而神器不搖蓋由祖宗威令猶足以震疊其國人也聖宗以來內修政治外拓疆宇既而申固鄰好四境乂安維持二百餘年之基有自來矣降臻天祚既丁末運又缺人望崇信姦回自椽國本羣下離心金兵一集內難先作廢立之謀叛亡之迹相繼遽起馴致土崩瓦解不可復支良可哀也耶律與蕭世爲甥舅義同休戚率先挾私滅公首亂構難一至於斯天祚窮感始悟奉先誤己不既晚乎澹雅里所謂名不正言不順事不成者也大石苟延彼善於此亦幾何哉